

西北革命史徵稿

中卷



西北革命史徵稿（中卷）

先烈紀傳目次

井勿幕	錢鼎	郭希仁	張雲山	萬炳南	胡景翼
岳維峻	朱先照	張銑	吳星映	張東白	柏惠民
李元鼎	李良材	李異材	李協	楊鶴年	宋元愷
樊毓秀	續桐溪	常自新	原斯健	張殿霖	雷恆焱
胡文驥	高森	任尹	嚴維翰	鄒子良	馬文明
胡應文	姚振乾	李雲峯	朱長春	王仲元	曹位康
趙丕衡	董雨龍	劉幼賓	陳同	吳善卿	嚴飛龍
胡明貴	劉粹軒	張身菴	馬耀羣	焦子靜	張瑞璣
尚鎮圭	王兆離	陳同熙	楊銘源	吳聘儒	王銘丹
曹印侯	楊仁天	彭世安	張光奎	井岳秀	張寶麟

吳世昌

王榮鎮

陳得貴

向紫珊

石玉山

張玉成

薛豫華

王克明

邱彥彪

彭泗海

張建有

陳樹發

郭錦鏞

劉剛才

劉世傑

陳殿卿

馬玉貴

惠黎賢

薛駿

韋虞

紀爾暘

王 橎

黨廷佐

袁 槟

王鴻遇

張淵

方象茲

郭子餘

吳 鵬

陳德卿

齊以禮

趙貞吉

姚南燕

李桂森

袁守禮

焦 林

杜守信

南南軒

南風燕

胡德明

楊景震

孟述孔

張鎮方

王泮坪

陳宗舜

王亞繁

張肇基

章雨蒼

孫岳

曹世英

郭 堅

樊鍾秀

高峻

盧占魁

王 珂

惠思溫

王陸一

劉守中

耿 直

張義安

董威

田玉潔

簡大猷

劉錫馨

王紹德

朱思聰

張仲良

王玉汝

呂撫宸

仇第田

柏 壅

范克立

曹靈秀

王林生

雷寶琨

田種玉

李豐功

白自成

王會文

趙邦樞

程步瀛

郭 法

屈正南

余欽烈

郭 壇 同 升

王尙賢

張鴻道

張士俊

毛元茂

蒙發源 武志文

李含芳

左國寶

武 鈞

薛其昌

于鳴皋 李福蔭

李文華

王崇瑞

程煥奎

熊占彪

雷雲西 田西軒

馮仲裕

楊瑞亭

梁國璋

張九才

李德陞 蕭榮綬

李秀實

張維直

靳經國

胡亮天

弓富魁 趙西山

郭俊傑

張贊元

王 烈

張廷芝

王之翰 党毓峴

李向榮

楊逢時

李玉祥

康 任

吳志德 張如翼

閻鎮元

龔性田

高銘新

楊 旺

蔣世傑 梁夢西

段 疡

甄士仁

武士敏

唐嗣桐

史登魁 何 琰

黑憲章

李天佐

石象儀

杜延五

陳龍光

張成亮

劉繼邦

華孝康

史之照

張 欽 耿文鴻

史宗法

史國樞

史仲書

張 昌 緣天相

衛總成

劉鵬

康霖蒼

杜保田

范升初 赤亞武

彭世銘

馬彥森

張景剛

楊 介

楊文選

袁青雲

丁增華

樊俊榮

丑彥俊

王保民

何順天

劉覺民

李維直

雷電

賀家棟

黃立中

鄒可權

陳金勝

馬望亭

方孝慈

盧子山

劉淦

張熾章

先烈紀傳

井勿幕

井勿幕初名泉字文淵蒲城人父纏齋公以財雄於鄉身歿後家稍中落勿幕於諸兄弟爲最幼年十五因避債務赴四川依其戚重慶知府張振之年餘得與川人士交遊熊錦帆但怒剛諸人尤爲密契聞孫總理在日本組織同盟會遂相偕出走由三峽經武漢寧滬東渡謁之爲總理及黃克強先生所器許實爲西北人士加盟之首未幾受命回陝籌組分會當是時秦中士紳如吳寶三張拜雲郭希仁李仲特李桐軒王子端焦子靜師子敬陳會亭朱漱芳尙天德寇勝浮常銘卿柏小餘嚴文軒等皆提倡維新致力教育陰圖革命而新軍官佐如張翔初張伯英錢定三張益謙彭仲翔党自新張聚庭諸人密祕運動軍隊自成一派友朋同志間雖稍通聲氣而猶未切實聯絡也勿幕歸乃以總理命及國內外進行革命方略密示各方組織陝西同盟分會手訂會章及黨人通訊密語暗號並結聯哥老會首領及三秦游俠健者由是秦中革命潮流趨合爲一推李仲特爲會長常銘卿爲東路支會會長已則往來奔走晉豫隴蜀等省各地同志皆與聯

絡辛亥三月廣州之役失敗勿幕與總部諸人議改由西北發難南北呼應欲以牽制清庭即復歸陝屢與洪會黨人張雲山萬炳南等盟於城南大小雁塔尅期大舉武昌義旗既建陝西各地紛起響應新軍同志首先光復西安推張翔初爲都督勿幕爲北路招討使是時山西黨人景梅九李岐山等起義河東以實力不支向陝求援西安方面適因錢定三遇難渭南清兵陷潼關東路危急無暇遠圖勿幕親率所部自大慶關渡河首佔潞村攻克運城三晉革命氣勢爲之一壯會清吏升允率甘回各軍數十營東下連陷邠長浜隴圍攻乾醴別部侵入三淳勿幕命胡景翼率衆一團禦之於張午原大敗之敵軍少挫乃與我軍相持乾醴之間以迄清帝遜位然後撤去中華民國臨時政府成立勿幕被任中央稽勳局副局長及和議告成 孫總理辭臨時大總統職勿幕亦自請遣散部曲爲衆倡首同盟會既改組國民黨遂專理西北黨務助成多數同志當選參衆兩院議員子身南遊徜徉滻上讀書尙友意度逍閑討袁軍興應召赴滇旋隨熊錦帆由滇入川任護國招討軍總參謀長聞陳樹藩代陸建章爲陝西督軍發電推崇袁氏違衆孤行乃與京滬同志促成李印泉長陝藉以牽制陳氏自就關中道尹以爲隨時應付之地樹藩旋附安福系加入督軍團魯散國會以武力逼取省長印信勿幕亦忿而辭職六年冬靖國

軍起三原討樹藩戰數月不利于右任歸總戎政勿幕主張之力爲多七年葉荃率滇軍入陝陝靖國軍勢復盛先是胡景翼爲樹藩所給執羈留西安欲藉以撫降胡部念非勿慕莫可使者以胡部均勿幕辛亥起義時舊人故也乃假以調人名義使入三原畀以統馭實力之權藉以抵制葉軍勿幕既至卽被各路公推爲總指揮奉于總司令命率部赴鳳翔親勞各軍歸過興平適降將賈福堂據城抗命卽令隨行部隊攻之第一路司令郭堅亦命所部李東材營駐南仁堡策應勿幕往與計事遂遇害主使不明語在靖國軍戰守紀要中遺體由舊部田玉潔收殮歸葬蒲城東門外越廿有七年陝西省黨部請於中央卜地公葬於西安南郊少陵原勿幕生而穎異讀書過目成誦文字書法若出天成幼時與其兄崧生縱論天下大勢對清政多所指斥崧生長勿幕十歲嘗自歎以爲弗如在日本時年甫十八嘗書孤憤詞以見志曰大丈夫生當斯世宜效死疆場爲民族存正氣否亦當轟轟烈烈如荆卿劍博浪椎諸律舉事無成敗亦已寒祖龍之胆壯河山之色爲祖先留生氣爲民族續命脈安肯伈伈俛俛忍辱事仇俯首異族統治之下哉其舞劍詞曰英雄不學時勢裝匹馬單刀論短長拔劍斬蛟叱滄海看他寇盜與侯王龍蛇走歲月忙健兒卅六會跳梁中原風景淒涼身在水雲鄉及後奔走革命不復以筆墨爲意偶有

所作隨手棄擲以故文稿散佚無復存者惟秋興八首爲遇害前在西安所作其詩曰落葉鳴秋霜滿林河山四戰氣蕭森白旗冉冉摩天漢玄鳥飛飛戀歲陰因果能收瓜李種恩仇不解虎狼心征夫莫問寒衣就腸斷西風野戍砧其二黃金台上隼旗斜新令中央集國華永憶三千稱上客休驚八月泛靈槎清絲夜半隨悲管戍鼓天邊入暮笳莫笑他年舊賓侶風前猶作傲霜花其三獨上高樓送落暉東方月出_一臺微只言明鏡桂初發無那勁風雲亂飛白帝佳兵慙事往嫦娥羈業怨心違持槊躍馬已應足淮水湯湯淮士肥其四長安賭郡一先碁得失分明動客悲冀北秋空無馬日中原月朗獲梟時白衣未送先王老翠羽還爭五霸馳只有夷齊能採蕨古來忠孝耐人思其五誰言愚叟苦移山梅嶺崔巍戰伐間尙有衣冠存舊地何無羽葆人天關清流已作黃流侶入國猶爲去國顏太息秋風真冷落朝朝催盡鬢毛斑其六知在峨嵋最上頭長江東下萬方秋國容定許羣魔息天意應憐萬姓愁將士霜前飛鷺隼樓船日下泛輕鷗漢家自古偏安地莫守岷州棄九州其七龍戰玄黃未奏功英魂處處悼歌中九關虎豹千山雪四海幡幢萬里風朝市翻成臧血碧江山盡是火旗紅奸雄未盡英雄少歲晚還悲馬上翁其八天設終南瓦礫迤山陰可有小塘陂頻年苦奏南冠曲萬里情殷越鳥枝羽檄曾傳三令下文章

應許北山移深林未遂平生志獨臥吟成草露垂靖國軍時于總司令上其事於廣東大元帥府得贈陸軍中將二十三年國民政府明令褒卹中常會議決生平事實宣付黨史委員會立傳勿墓死時年三十一初室羅氏繼室馬氏各生一女皆早夭兄崧生公以其次子紹文爲之嗣

錢 鼎

錢鼎字定三白河人系出漢趙王錢鏐次孫保傳其初流寓湖北襄樊父某於清季輾轉來陝西之白河遂佔籍焉鼎少讀書有大志應試入邑庠肄業安康新城書院旋來長安考入陸軍小學受知於樊樊山張藻諸人選送陸軍學堂習步兵憲清政不綱有志改革嘗聯絡各省同志如郭瑞浦呂公望林笈青張仲仁党自新曹建安王普諸人創組陸軍同學會及醒獅社鼓吹排滿革命畢業後回陝服務充新軍二標一營督隊官辛亥九月初一日陝軍起義率徒手兵百餘人首入西關收陸軍學堂軍械入城奪軍裝局協攻滿城畫謀策悉出其手西安光復被推爲秦隴復漢軍副大統領建議以兵守潼關遏清軍西來之路且自請行時省垣初定軍令未一撥派營隊未能隨時出發僅率護衛二十餘人暨軍裝車數輛先發初八日至臨潼部隊仍未至適陸軍學生張世璫等自省

歸乃與臨紳曹印侯等議以所提民團授世瑗率取渭南渭南令楊調元先召渭北刀客嚴紀鵬之衆數百人入城據守世瑗至曉以大義楊令卽開城降馳書告捷鼎遂於十一日下午至渭南嚴衆在西關列隊迎入見鼎人少意甚輕之且涎其軍裝頓萌欲奪之念武進士韓某楊令所恃以招團守城者也罔識革命意義省垣反正心固非之至是乃煽惑嚴衆謀於夜半圖之楊令見禍機已伏倉卒投井死韓等因藉爲口實鼓煽生變而鼎不知也方使人召集士紳商善後遽聞變作急與左右登屋彈壓無效而從者數十人多死乃偕弟國寶衝出越城而下陷泥淖中爲賊追及遂遇害從者有臨潼劉鎮嶽張世瑗四川余隆勳余國楨渭南白霞仙邵陽楊元楨馬緒洛陳清和洵陽徐合子等皆死焉鼎有文學口辯十餘歲入學堂肄業嘗作感時詩有顧瞻禹蹟陸沉象劍作龍吟皆欲裂之句耆宿見者咸驚異之後益肆力於兵學嘗北游燕趙津沽膠州青島南至滬瀆渡楊子江達杭州灣察形勢訪豪傑海內儒流悉與納交西北革命系統有三一爲陸軍學會一爲同盟會陝支部一爲哥老會而哥老會黨徒徧佈下層社會與軍伍中勢力尤強鼎早年卽入哥老會後復加入同盟會以故西北革命勢力合流事前溝通聯絡鼎力居多及武昌事起陝軍亟謀響應開會定謀恆視鼎一言爲重平時推重張鳳翹謂足以肩荷大

故力辭大統領職而自請守關當一面子身東行遂及於難無子以族子爲嗣事定軍政府以副統領請卹入祀忠義祠弟乙垣畢業陝西陸軍小學常慕李秀成石達開之爲人以民族英雄自期清宣統元年卽蓄髮披肩際朋輩皆以錢長毛呼之旋考入武昌陸軍中學在鄂加入同盟會辛亥舉義隨黎都督元洪與清軍戰於漢陽不知所終

郭 希 仁

郭希仁原名忠清字時齋一字思齋後改希仁以字行臨潼人光緒壬寅癸卯併科舉人時值庚子辱盟以後朝野人士咸思自強希仁深究古今興亡之因與東西各國富強之術慨然有康濟之志民國建元前五年（清光緒三十三年）嘗赴日本考察政治教育居留年餘返國後主張改革之志益決會蒲城令李體仁指縣學堂教員常銘卿與學生爲革命黨逮常與學生三十餘人答辱之消息至省城值陝教育會開週年紀念會衆憚於清吏淫威無敢言其事者希仁奮起大呼曰李體仁擢殘教育毒蠱師生致使學校重地血肉橫飛士氣俱盡吾深爲秦人羞更爲秦人痛矣遂放聲大哭全場震動李遂褫職卽辛亥以前所謂蒲案爲革命之導線者也當是時希仁方與曹印侯劉藹如賀紱之諸人組設麗澤館於西安日以礪志圖強相切磨並與景梅九馬開臣郭瑞浦李岐山

林卽卿李仲特鄒子良王子端焦子靜師子敬張翔初任師竹王一山耿季儒諸革命黨人深相結納民元前二年由梅九及陳會亭介入同盟會是年陝諮議局成立當選議紳被推副議長當時同志言論多激烈而希仁獨以穩健稱羣擬之於劉文叔謂謹厚者亦爲之由是加盟者日益衆陝西同盟分會成立遂被推爲會長主持西安策畫任務陝西新軍爲道員王毓江所把持王爲巡撫恩壽私人通賄鬻官且爲革命進行障礙軍界黨人彭仲翔馬彥若等聯名指控不能動希仁由諮議局公揭恩王狼狽不法狀於諮政院遂撤王職恩亦引去於是秦人之在軍者始得以次擢遷要職漸握實權作革命活動矣辛亥九月朔西安起義建大統領府初設軍令府參謀處民政府公推希仁主持參謀兼民政嗣改軍令府爲軍政部專理軍事合民政府參謀處爲總務府總理軍民各事下設參議處參政處祕書廳銓敘局以党自新彭仲翔茹卓亭張慶庭張靖清陳伯生李子逸常銘卿高幼尼張瑞璣王錫侯諸人分任其事而希仁實總其成時省垣初定各地豪傑蠭午俱起哥老會黨人恃功驕恣氣燄尤張各首領意見紛歧互不相下希仁一身調停其間譬解百端容納各派意見消弭內爭部署外內任務羣情洽服既而清兵東犯潼關三陷三復西則升允大軍圍攻乾州醴泉進薄咸陽一時人心動搖有議悉兵出武關與

武漢會合者希仁力主堅守鎮靜一面敦請藍田牛夢周興平張曉山及黨人金和暄吳善卿白星橋張生干先後分赴東西路議和藉緩敵師卒保危局共和既奠希仁與井勿幕首主裁兵減政恢復元氣凡清季秕政及軍政之爲民病者欲悉舉而廓清之顧事多扞格知不可留卽稱疾以去旋被舉爲國會參議院議員堅辭不赴民國二年擬作歐陸之遊有勸止之者希仁曰吾病夫拘於墟者之不能爲遠猷也竊欲察隣國之政爲中國十年後計耳遂赴歐道出北京五省協會開會歡迎臨場欣然辭多謙抑獨諄諄勉後來者努力績學以改進國家社會爲責任於是徧厯俄德法義英比瑞荷諸國所至悉心考察其政治教育農林水利諸大端民四歸國見袁世凱盜國之謀日著乃聚徒講學於華山北麓名其居曰共學園一時有志之士從游者衆隱爲策畫討袁之糧各地黨人來會者有高陽孫禹行崞縣續西峯天水鄧寶珊興平史可軒及以後靖國軍中名將董振五赤炳文等數十餘人其在渭北各縣往來運動者有劉允丞王誠齋吳希真諸人皆與之通聲氣袁之爪牙陸建章世所謂屠伯者也時方督陝邏騎四出捕殺黨人甚衆疑希仁將逮之希仁乃偕劉藹如潛入山西與當時反袁最力之張瑞璣有所計議未幾建章敗去乃復歸民六任陝西水利局局長兼林務專員當其遊歐洲時見德法荷蘭河渠之整

齊堰闢之靈便水工普徧農商交利因慨吾國之河政頽敗溝洫荒廢時李儀祉再至德國學習鐵道工程希仁乃謂儀祉曰吾國西北多旱飢饉頻仍子盍改習水利繼鄭白之舊蹟以爲民利鐵道工程似非所急務也儀祉從之希仁歸後與友人論水利書有曰吾陝頻遭旱荒民食維艱竊擬大興水利以爲根本永久之計而苦無把握比到歐洲留心觀察並會以平日思想於水利總義總法略得端緒若得大力提倡普遍開辦卅年後庶可使西北無荒旱之憂卽各種實業之緣水利以興者亦可次第發達矣及長水利局調查涇河谷口疏濬草灘河渠修理申店潏河渠莫陵廟灞陵區沙河倉各壩河堤閻家灘邊堤補治商縣府君廟丹河堤長武縣胡家河渠立法設計不遑朝夕值兵事屢作未能大有所爲民九李儀祉學成歸國卽舉以自代其當時所計畫而未及施行如涇渭洛郿等渠皆以次興工者實希仁有以預樹其基亦卽昔與儀祉約言吾當歸而創其始基子將來總其大成而爲踐其久要者也民七長陝西教育廳仍兼水利林務並任孔教教育天足紅十字等會會長設音樂研究所國語傳習所孤兒院通俗圖書館修理孔廟審定教規時值新文化運動蓬勃之際反孔反舊禮教之風瀰漫全國以此頗遭時流評詆希仁毫不爲所動嘗手編尊孔百喻並著新舊說一篇以見意其略曰「竊嘗謂學當止論

是非不當論新舊是故善學舊者舊可得新必不至於頑固善學新者新不厭舊何至於迷鶩夫亦在真知灼見而已若夫聖賢溫故知新深造自得之要義則又學者所不可不知若稍識舊學之門戶卽自號通家甫涉新學之藩籬卽蔑視一世是指祖先之屋址以傲人倚富豪之門牆以自炫也嗚乎可哉至於四書六經諸子百家歷史文字以及前代儒先之學說雖不能遍觀博識然當披覽而研究之則學業經濟醞釀深而識量以闊且亦足發愛國之深情動恢復之觀念若概目爲陳腐無用令後來者承其風氣直弁髦視之不復致省譬如嬰孩襁褓而離鄉闔於其井里墳墓祖先名字亦并不能記憶故鄉之景物未印於腦則戀愛之情緒不生於心他且至於成人望其關懷桑梓不萌鄙薄之念難矣顧亭林先生周遊郡國所至嘗考其古蹟金石論者謂其足繫人眷懷故國之思而况經濟文物之燦者乎一民九關中大旱饑華洋義賑委員會開會某災區當急賑某洋員按章詰難多所指駁一日復開會洋員持議如初希仁怒直前叱之曰汝洋人視吾中國人命如草芥今先斃汝再議賑事乃抵以拳諸委員驚異解脫之議立決逾年義賑會修築灞滻各河堤五處某洋員復勒不發款希仁扶病往與之爭洋員憚其威直悉從之而堤工以成嗣又屢以軍事時政建議當道不見納乃盡辭各職不復出希仁在官

不治私財辭教育廳長後節俸餘四千金以三千金分捐孔教會建芸閣學舍及咸林中學暨其他私立各學校又以在水利局薪俸購置測量儀器以故去官未逾年即極艱苦疾久醫藥無所取資售其所乘車時劉鎮華主陝政聞之餽以千金希仁曰俸薪某所應得若憐其貧而資之某絕不受人憐也蓋希仁卸職水利局後尙有欠薪未發其嚴於辭受如此民國十二年五月二十一日卒於西安年四十二友朋贈金治殮乃得歸葬希仁貌清癯駢脩韻目炯炯有光沈毅淵默粹然儒者然臨事英斷威武莫能屈事過仍溫溫和易平居簡敝布衣粗食澹如虛博極羣書志道深思殫力於著述講演數十年如一日卽祈寒酷暑未嘗稍懈操勞過度寢以成疾然猶扶病講述伏枕秉筆終致不起其著述刊行者計有近思記思齋文存能近取譬春秋隨筆儒教綱要說文部首說文漫錄五聲辨難水利譚從戎記略平見東遊記歐洲遊記瞰社學譚六十年交涉記略知人類鈔聖蹟備考政術叢談國史講演錄天演通音轉舉隅及懸年自述與日記數十種其未刊行者有張構渠學問之方詩集說詩集傳補正方言輯存左氏傳箋記鄉職要略管子約編等書常謂秦人之病在對於著述發表過於審慎吾輩應立矯而獎勵之以收拋磚引玉之效蓋先生之學不拘一家言稽古證今而不泥於跡比類屬事而必合於道博通以

挈其要精審以抉其微不隨不激務準於是而要以事實求是爲歸蓋早具古聖賢康民利物翼世濟危之志故其見於文章講演及事功也皆成己成物之大者其致某君論學書有云弟少治舉業二十後稍閱書籍自後雜治宋學及今天演家言以其間涉獵羣經攫取其粗綱大意比合於世事妄意爲致用之資就中唯春秋周禮稍多用工夫欲條舉成書苦爲社會奔走奪其日力卒不能就近來始悟向者鹵莽滅裂之病且趁此投閑歲月存細治經一番六經不能兼治擬先治詩禮以二者於身心最切要也其入手方法必先參先儒古訓以求文義明瞭但訓詁家言必擇其精當不支躁釋矜平如王伯申父子之著作不取攻駁爭勝如班固所譏便詞巧說碎義難逃無關大體文義既明則就經文玩索必反之吾身而有裨益按之世事而有關係不苟爲泛博以騰口舌義理必虛心涵泳以求精確其不安於心者寧闕疑不强解孔子曰知之爲知之不知爲不知又曰於其所不知蓋闕如也性情有所偏見必謬漢學家多好強詞勝人此最學人大病朱子在宋學中號爲涵養深純者矣然詩集傳十三四亦不安於人心此亦其不及聖人之一端又云孔子遺述堯舜憲章文武修周公之基刪定六經以垂統緒爲中國文化之紐使無孔子秦皇一焚項羽一大歷代典籍撕滅盡矣立國精神當何屬哉再就歷史一端言之歷

史爲立國之一大要素爲東西學者所公認先孔子而與孔子齊名者爲老子老子不傳
歷史後孔子而與孔子爭名者爲墨子墨子亦不傳歷史孔子晚年本魯國史作春秋又
使弟子子夏等求周史記得百二十國寶書參互考訂左丘明因據之以作傳成一部詳
明編年史太史公繼春秋而作史記而後漢書以下各史皆模仿以成司馬溫公又本諸
史仿左傳作通鑑後人用其成法於是數千年之歷史貫穿無遺中國數千年來所以蹶
而復振亡而復興者實惟歷史凝結之力中國學者不讀中國歷史則已若尙讀中國歷史
而反排斥孔子詆毀孔子譬狂童之唾天類小人之剝廬非但數典忘祖而已可見其
學說涯略云子二長家春次振岳

張雲山

張雲山字鳳崗長安人清末入陝甘總督陶澍營當兵轉戰西寧新疆積功至都司
後充陝西陸軍混成協司號官與西北革命黨人聯絡辛亥武昌事起卽密會諸豪俊尅
期響應於九月一日與張鳳翹錢鼎萬炳南諸人以全協人據西安攻破滿城被推爲
兵馬大都督督師防守乾州與清軍相持百餘日大小數百戰城無完堞死傷枕藉而氣
不少餒及清帝遜位詔書至始各罷兵共和成以光復功授陸軍中將補秦軍第一鎮統

制後改第一師師長陸建章督陝後削其兵權改任陝北鎮守使不便到任年餘以咯血
舊疾卒年三十九雲山本哥老會黨人而性和易黨徒依附者衆乃自號通統山以容納
之及建節稱都督遂復廣印票布分設碼頭以公議洪令小戳記與兵馬大都督關防雙
重並用一時省外各州縣不明真像風聲所播但聞有洪會命令幾至不知其他無業游
民攀緣趨附者日益衆門如廟市出入凌亂彼此相見無尊卑但呼大哥拱手左舉爲禮
卽款洽輸誠幕府初設又無文士對於軍府文移視若無覩其徒又各以名位自高至有
以見官大一級聽調不聽宣各字樣榜門爲炫者黨人憂之乃共推宋伯魯爲其祕書長
稍稍引用士人爲司筆札委曲開導始稍就範伯魯字芝洞後改芝田醴泉人曾爲遜清
侍御戊戌政變以維新黨被黜編管在籍寓居長安素爲雲山所敬服者也及出守乾州
其部下之統軍者多未經戰陣遇敵率先奔潰而新附之黨徒又多所在擾民雲山亦漸
厭之嗣由郭希仁等再三開陳乃經其黨中六都督會議裁撤各地碼頭軍事當局更爲
選派陸軍員生多人以助之又有曹印侯之敢死軍王一山之炸彈隊在外作戰始克共
保完城和議既成黨政諸人方汲汲於組織議會設施政治雲山無事日惟就其節府門
外廣場中架木爲高臺上置銅鋤仿戲劇中包孝肅故事聚集市人爲之演說自貪官污

更以至鼠竊狗偷無不倡言指斥一若世道人心皆可由其一人之威力勦導使之擾亂反正化_{等爲良亦其識度然也}迨陸建章督陝後時局改觀陝西各軍次第裁汰幾盡雲山自知不能見容而位隆財多未能潔身遠引乃不惜卑躬屈節伺承顏色執贊拜門輦金納賄冀得博其歡心以圖保全馴至幽憂致疾終以不起而其徒之赫赫一時者自萬炳南被誅後見機引退克保晚節者亦不乏人新國既啓百度維新時代潮流不復再容舊日思想二百餘年抗清復明祕密組織之洪門黨會至此乃成曇花之一現迴光返照轉瞬消滅往事傳聞僅爲社會上留一淡遠印像供人迴憶而已亦時勢爲之也其黨徒中在辛亥著績者約數十人要皆以雲山爲之魁云

萬炳南

萬炳南湖北鄖西人清末來陝入陸軍混成協第一標三營充正目與張雲山錢定三等三十六人結盟密謀革命辛亥西安光復時以數十人攻佔滿城通華門被推爲秦隴復漢軍副大統領出守鳳翔與升允所率甘軍崔正午部拒戰凡四閱月共和告成後數月以騎橫伏法年三十二炳南亦哥老會黨人而素性强悍既有功光復遂益驕軍械局會議時恃其人徒衆盛語言桀驁至欲攫取軍事大權幾經疏通終以副大統領畀

之及出駐鳳翔愈形橫恣除婪索餉械遇敵告急而外軍府法令一切置若罔聞日惟納黨徒擴充勢力自謂功高賞薄流言載道因斬索槍彈親至督府意氣飛揚既出將行遂遭殘戮自茲以後會黨徒衆始知軍府之威稍稍歛抑就範矣

胡景翼

胡景翼字勵生富平人祖德新同治間以鄉團禦叛回陣亡祖母吳節苦撫孤成立父彥麟母侯氏禱於耀州藥王山之笠師佛洞生景翼故後又自號笠僧幼而魁梧奇偉識解超人聞鴉片中東諸戰役則大憤誓雪國恥嘗畫鷹日形爲鵠射之年十五入西安健本學堂肄業好讀孫吳兵書及中外名人傳記時率同學戰陣部勒以兵法爲戲讀史慕明中山王徐達驅胡元功每以自況朋輩戲呼爲中山王因號中山嗣因與孫公中山同廢不用自鐫印章曰頻陽將軍是同鄉蓋富平爲古頻陽縣將軍者秦將王翦也後復另鐫一章曰一生低首拜關岳其自負類如此民國元前三年風傳列強有瓜分中國之議景翼卽印散傳單警告西安各校學生主張青年救國自是廣交遊結死士因井勿幕宋元愷湯銘源諸人介入同盟會是時陝西民黨多文士未能大有爲景翼倡議聯結哥老會黨及渭北各縣刀客以期集事刀客者秦人別稱三輔游俠之諺語也遂因友人

孫茂林等介識洪會黨人崔俊傑劉復漢余彥魁等數十人並偕同學李仲三馮毓東等與盟於長安城南小雁塔寺會暑假返里與同志楊雲龍計超等商議聯結刀客計劃與李仲三及同學尙武遊同蒲一華潼關朝邑一帶運動鹽梟王獅子部下嚴飛龍及同縣王守身等期在各外縣響應革命假滿返校又與會黨首領張雲山萬炳南等結識且介井勿幕鄒子良李仲三諸人入會而以一身周旋其間辛亥春復偕李仲三張雲山萬炳南王振海等三十餘人盟於雁塔號三十六弟兄密圖大舉旋由學校畢業與同志約不升學歸里聯合胡應文楊雲龍馬正德胡彥海石象儀等數十人約於六月六日於耀縣藥王山起義因大吏已有所聞防範甚嚴改計復入省城密有所圖會井勿幕得同盟會總部消息謂各省大舉在八九月間而陝大吏亦知事急扣發新軍槍彈且派人密捕景翼乃復歸渭北聯合各地同志一俟省垣新軍子彈發下即同時發難謀定未幾而武昌事起陝軍旋於西安響應推張鳳翹爲都督景翼亦率所聚各方豪俠樹幟於耀州藥王山井勿幕旋任陝北安撫招討使駐節三原季景翼爲第一標統帶時同耀兩縣爲會黨張南輝所據擾民無紀律人民呼籲使署求救景翼奉命率四十騎直入耀城見南輝促使離城張之部衆數倍景翼皆震懼聽命景翼歸館酣臥聞張部已出城過半乃突起率

衆登城擊之乘勝追逐商民歡呼雷動時山西民軍失敗并勿幕率衆渡河往援而升允率甘回各軍自邠長來攻別部進至三水淳化景翼率部禦之與敵戰於張戶原竟日不遑食飲及敵退始歸營疾呼取飲立盡一缶檢視所部槍械子彈已罄矣共和告成勿幕首請解甲渭北各部隊悉願屬景翼景翼自以學尙未成亦棄兵與張義安等偕赴日本留學道出上海旅滬同鄉開會歡迎景翼對衆演說以大無畏勸勉同人聆其言者咸謂名下無虛士也既抵日本欲入陸軍學校格於成例乃入成城學校民國二年外蒙獨立留日學生推景翼爲征蒙軍司令歸至上海知政府別有用意而止二次革命起黃克強致書張鳳翹約以陝軍爲應援張不聽景翼聞而歎曰陝軍若出關駐鄭洛通電主和則舉足爲南北重輕今不此之圖而苟安一時助長袁氏帝制自爲之心國家從茲多事矣三年一月復遊日本時民黨羣集於東京設浩然廬授黨人以兵法遂入之同學皆一時失敗英雄因得徧與交遊數月畢業將歸國因于右任介見孫公中山孫公屬以陝事且曰俟經濟稍裕當以數萬元供用答曰數萬元何所濟我有精神無不濟也孫公大奇之乃偕馮毓東歸自天津至北京與劉守中入山西與續桐溪弓富魁等締交策劃討袁適白狼入陝擬乘機舉事會亂平未果遂歸里讀書養晦習技擊以自藏陸建章督陝後

裁汰陝軍略盡惟陳樹藩所部第四混成旅以破白狼功僅存或邀景翼往詣之入教導營軍官連樹藩詫曰若曾充統帶此豈所能堪耶速自審勿亂營規使余難繩他人景翼慨然願受約束遂折節力學不少縱樹藩乃深器之令代備補連連長旋給曹世英高峻等攻蒲城擊之敗走陝督陸建章以用兵神奇擢游擊營營長使駐富平洪憲改元陸建章助之是時西北革命黨人多失根據羣集關中謀發難建章知渭北爲民黨策源地盛陳兵仗以鎮懾之使子承武旅長率其精銳號模範團者巡行渭北聲勢威赫觀者震懾至富平景翼迎承武入縣署執禮甚恭而密伏兵於夜半擊之激戰兩日盡殲其衆擒承武衆議欲推景翼爲司令趨省城景翼不可曰有旅長在遂讓樹藩爲護國軍總司令而自率部疾趨臨潼斷建章歸路進薄省城東關建章沮喪卑詞乞和荐樹藩代己爲陝西督軍蹻踉離陝去不半月而事定樹藩旣督陝嘉景翼功而慮其驕僅遷爲第一旅第二團團長移防商州龍駒寨抑志練兵年餘精整嚴肅當時所稱十大連爲陝軍模範者也六年陳樹藩附安福加入督軍團國會被迫解散南遷廣州東南各省因有護法之役陝西警備軍統領耿直謀去樹藩擊之不中敗退岐山樹藩令景翼追擊之景翼念樹藩非黨人徒以智力自雄欲俟實力擴充而後正言以聲討之因縱耿部使東行自率部綴其

後樹藩亦疑其有貳志使其親將曾繼賢嚴錫龍等駐三原促使景翼部悉赴前敵且斬其軍實備補營營長張義安知事機已迫且以嚴部多匪類惡之遂在三原發難夜襲會嚴軍殲之景翼馳至遂樹幟號陝西靖國軍樹藩以兵來攻大破之令張義安提師進圍長安樹藩屢戰不利乃引劉鎮華所部鎮嵩軍入關爲助義安旋陣亡景翼退兵渭北樹藩復自將大軍渡渭來攻景翼令岳維峻等與戰數月敵不能進會于右任自開道歸陝景翼聯諸軍推爲靖國軍總司令重編各軍爲六路而以景翼所部爲第四路是時兩軍相持久戰線南北亘百餘里景翼乃親往巡視前防姜宏模者亦景翼舊部嘗獻計討陳與景翼意不合因守中立於固市景翼馳書招之欲與計事宏模陽諾誘景翼入城而陰以告樹藩遂被逮入西安侃侃以死自誓意氣不少屈樹藩念前勞且重其爲人不忍加害羈之而已自此日居危樓中潛研學問奉宿儒毛俊丞爲師徧覽經史百家旁及金石詩編規摹漢魏篆隸行草無體不工積二年學益大進樹藩嘗欲縱之使歸招所部降景翼弗許乃令井勿幕行九年直皖戰作景翼將田玉潔藉此時機隻身赴省親往說陳始令歸既抵三原復被推爲靖國軍總指揮乃一意整軍理財振興教育與民休息又創建立誠中學校於其故里莊裏鎮爲育才救國計十年直軍入關遂樹藩走漢中景翼聞

馮玉祥爲前鋒佩其軍譽頗相結乃助撫樹藩餘衆自是信使往還兵氣漸銷因念五年苦戰以渭北八縣民力養數萬之衆禦九省之師滿目瘡痍怒焉憫惻乃權宜取消靖國軍別有企圖雖爲黨人訾讐亦不以爲意嘗夜半叩于右任之門欲有所白于拒不納乃使人告之曰余終不負革命並不負于先生也遂改編所部爲陸軍暫編第一師十一年直奉戰起馮玉祥率師東行招景翼與俱景翼念西北革命勢力偏促一隅難期發展欲東向中原另圖進取藉以漸達目的乃佯附直系且以與馮交契深義當往助遂下令輕裝出關諸將領或駭疑未肯遽前景翼曉以大勢首先出發水陸兼程東進猶虞遲滯焦灼至項殲聲嘶未旬日已抵洛陽值豫軍趙傑寶德荃等攻鄭州守軍第八混成旅不能支城將陷玉祥迭電告急景翼令鄧寶珊李紀才弓富魁諸將率部馳援大破趙傑之兵城圍遂解景翼旋至鄭州令岳維峻李雲龍等進攻近郊之敵將士均殊死戰連克多莊八郎寨金台子諸要隘敵勢大挫越數日復進上岡楊村姚莊各敵壘更以騎兵繞其後敵大潰追奔逐北連下開封歸德豫局大定而京畿戰事亦息此佩孚知景翼有將才欲引以爲助而忌其出身民黨不敢任以腹心遂置諸保洛間令防衛京漢路使分駐正定順德彰德一帶復薄其餉將士飢苦異常直軍將領亦爲之不平而景翼略無怨懟意

且助靳雲鶚剿平豫南匪患由是益見重十二年曹锟以賄選任總統全國譁然景翼密誠部下曰大亂將至吾輩將預爲備不宜飽食終日無所用心也逾年秋齊燮元興兵攻浙吳佩孚亦集諸道之師攻奉天直奉再戰景翼念時機已至不宜躊躇乃密使李仲三劉守中張慶諸人分往南苑大名等處陰聯馮玉祥孫岳謀乘機除曹吳謝國人中秋夕接洛陽動員令立率全部出發至通州遲遲不進佩孚一口數電催之俱以餉械兩缺辭佩孚疑之不敢以重兵東進而榆關守兵單連戰皆北奉軍氣大振佩孚不得已復遣使促景翼乃留一旅於通州自率部北進沿途分布直抵喜峯口前鋒至熱河之下泉與奉軍遇戰勝之捷報朝至京曹吳方慶幸而夕已回師與馮孫收復北京囚曹锟一夕而事定乃與馮孫聯名主和建立國民軍一二三軍佩孚聞訊疾歸天津令其旅長潘鴻鈞率南來新勝之師扼楊村以窺京師人心大震景翼令岳維峻率部趨唐山攻敵側背使李紀才李雲龍助國民一軍攻敵於楊村紀才乘夜襲敵俘潘鴻鈞敵軍盡覆佩孚不能始棄天津泛海南遁直軍之在榆關灤州者均先後爲奉軍及岳維峻師繳收其械張作霖既至天津議戴段祺瑞爲臨時執政而吳佩孚已迂道回洛陽率其殘餘渡河北犯臨時執政府乃任命景翼督辦河南軍務以爲豫事非景翼莫屬也景翼南行至彰德與敵

遇連戰皆捷直趨鄭州而鎮嵩軍師長慾玉琨率部扼黃河鐵橋情勢叵測乃令師長何遂率部自下游渡河入開封慾玉琨見勢不可敵而師又無名遂引退豫西景翼乃入開封就河南督辦職先是景翼與馮孫等既組國民軍即聯名電請孫公中山北上主持國是孫公遂由海道至天津方議召開國民大會而遽以疾薨景翼力發憤欲從政治入手與國人更新邀集黨國各元老及諸名流至開封隆以厚禮由是京漢道中冠蓋相望爲民國以來所未有其對豫事首重剿匪以岳維峻爲剿匪總司令董治兵戎任賢選材澄清吏治首令教育基金獨立並恢復自治制度修築全省公路各項要政莫不次第舉行而慾玉琨在洛陽恣睢囂張謀割據豫西不聽命劉鎮華更以在陝兵力助之景翼派人疏通屈意求全不能得乃與戰於鞏洛間大破之玉琨走死豫局甫定景翼乃規畫振濟收撫潰散午夜憂勞不遑食息俄而疔生於臂割治數次猶接見賓客指揮軍事蚤作晚息終日孳孳不少休病勢由是加劇自知不起乃對來視疾者歎曰勞人思息吾殆將逝矣因電執政府請以岳維峻代已職預留遺囑勉勵部屬諄諄以軍國大計爲念語不及私十四年四月十日薨於河南軍務督辦任內年僅三十有四賓客將吏來吊者莫不失聲景翼局量恢廓海涵地負明睿鑒物誠信任人大計所關當機立斷統兵馭衆將略天

成體貌魁碩莊嚴而性和易不飾威儀同輩諸將進見者皆以笠僧呼之接人無方類無町畦遇宿儒長者卽問學俠少年也卽與技擊角力縱酒諧笑不拘形骸尤好獎掖青年後進一言之善一技之長輒爲之譽揚不去口體肥重善寐據案作書不數行輒一再寐旣醒復書首尾不亂與賓客對談方洽忽隱几齁齁鼾聲作矣或再三寐覺而所言事厯厯無誤忘者與外賓讌飲歡笑間亦輒寐或濡首乳酪中外賓初訝之久亦知其爲習性也景翼歿豫民或傳其未死遺愛之深可以想見黎總統時已授延威將軍及歿以陸軍上將卹妻林氏子希仲東吳大學畢業

岳維峻

岳維峻字西峯系出南宋武穆王族後自湯陰遷蒲城遂爲蒲城人考振興清季以侍衛出補山西靈璧都司洊升參將母王氏生維峻維岐維峻魁梧善射年十六入武庠值清季外交失敗政變頻煩因鄙棄武科好從鄉里豪傑遊井勿幕胡景翼介入同盟會謀革清室辛亥九月義軍起西安遂從井勿幕安撫渭北轉戰河東共和成入軍官敎導營畢業充胡景翼游擊營連長民五護國之役助景翼殲陸建章之軍於富平俘陸子承武以功升營長六年靖國軍興嘗任前敵總指揮敗陳樹藩軍於三原景翼陷敵後代爲

靖國軍第四路司令以涇原一隅之地當敵八省之兵大小百餘戰及景翼被釋後復以
兵柄歸之十一年隨景翼東出關任陝軍第一師第一旅旅長駐彰德練兵十三年與景
翼密定大計聯合馮玉祥孫岳共建國民軍囚曹锟與吳佩孚之兵戰於廊房湯村間大
破之旋隨景翼至豫任國民二軍第二師師長兼河南剿匪總司令平豫西懲玉琨之亂
景翼薨遂代爲河南軍務督辦逾年出兵山東討張宗昌前鋒失利降將田維勤等乘機
煽變因率部至陝州復爲鎮嵩軍餘部所扼乃悉以兵授諸將隻身渡河入晉被留太原
年餘西安圍解始歸與馮玉祥改組前國民一二三軍爲國民聯軍自任南路總司令率
李雲龍姜宏模丑彥俊諸部出武關下宛鄧轉戰豫南與北伐之師會於中原國民聯軍
旋改爲第二集團軍維峻被任爲第一方面軍總指揮旋復改編爲陸軍第一師任師長
以太夫人病辭職赴滻侍疾十八年復起爲陝西招撫使招集舊部編爲步兵十營以兩
路司令統轄之駐防襄樊轉移羅山羅山之南爲宣化店羣山蜿蜒林深箐密匪匪屯聚
五六載令第二路司令張萬信率部往剿毀其巢穴是時正值國軍北伐因有豫西司
令之命調守周口淮陽突破敵趙集重圍卅餘里與敵連戰數旬維持東西戰線屏藩平
漢路後方使中央戰略得以完成以功受任第三總隊司令自側面擊破許昌之敵豫戰

遂定還師駐防湖北孝感奉令改編爲陸軍第三十四師仍任師長益銳意練兵輯民修治道路保衛商旅提倡農村水利孝感之民懷之至今二十年春奉武漢行營命督師剿匪臨行謂諸將曰有賊無我有我無賊殺賊不盡不歸矣三月五日親率步兵三團砲兵一營特務兵一連自孝感經小河溪進發連克陽平口二郎畝馬吼嶺雙橋諸要隘八日進駐雙橋鎮雙橋地勢險惡岡巒重疊林木叢密察其形勢已慮孤軍深入易受敵制徵念友軍必依預定時期到達左右夾攻匪必無倖而軍書屢促卒不獲報心已訝之是夕匪數來襲均擊走之戰徹夜未已至九日匪以十倍之衆三路來攻自寅至午未獲喘息官兵傷亡過半彈盡力竭援兵不至戰愈力而匪愈衆全線被圍猶率殘部以白刃肉搏手掣機槍左右掃射四顧隨從尙存幾盡匪既逼近火器失效遂爲所執初被幽於七里坪繼移檀樹岡最後遷新集先是匪以維峻爲西北軍人領袖欲借名爲號召甘言厚遇勸誘百端均嚴詞拒絕不爲所動由是匪遂虐遇之維峻屢圖自戕終不得間而官兵同時陷賊者數百人賊多縕之使歸乃密書剿匪方略乘間授歸者使報武漢行營且更傳語所部官兵精誠團結效忠黨國勿以己之死生爲念久之監者稍鬆懈其舊部被脅者漸多來就慰因與密謀使之暴動事洩被殺者五百人自是防之益嚴動止不獲自由矣

二十一年秋聞國軍圍攻黃安甚急以爲有機可乘復密結在俘官兵及被虜人民謀內應事機不密爲賊偵悉遂於八月十一日遇害臨刑時指數賊之罪惡罵不絕口左右腕悉被斬斷然後死年五十後賊引去舊部參議王季常收尋遺骸歸公葬華山之麓
政府以陸軍上將卹國史立傳弟維岐能文亦好結納俠士抵掌論時政得失慨然有志
澄清辛亥時與維峻同在井勿幕軍中造成光復之功民五與李岐山馮欽哉諸人組織
討袁軍渡河攻佔榮河猗氏後援不繼兵敗陣亡年二十八子錦藩維峻死時因子秀藩
少亡遂兼祧焉

梁子章 馬志超

梁子章馬志超均蒲城人自靖國軍時皆充維峻連長隨同作戰忠勇超人雙橋之役維峻既陷賊二人同時亦被執羈係年餘並與維峻同日遇害子章死時年四十七志超年二十七志超無子子章子二得印得明

張 銑

張銑字拜雲蒲城人清末以舉人選授耀州敎諭_後於外每迭乘清室腐敗絕意進取光緒二十六年由京返陝與同邑李桐軒乾州王偉齋諸人於大荔創辦求友學堂提

倡新學開導風氣是時伊犁將軍長庚將赴任網羅西北人才銑以重名被邀預致八百金爲聘將行未果即以其金與富平焦子靜合股開設公益書局爲祕密運動革命機關西潼鐵路初由陝人士倡始興脩繼爲陝撫曹鴻勛奏歸官辦陝人頗不平銑赴京上書郵傳部爭之仍歸商辦返陝後任路局文牘暗中聯絡比國某公司祕密購運槍彈招募工程隊以爲革命之準備焉宣統元年旋以疾卒年四十七

朱先照

朱先照字漱芳晚號佛光三原人遜清舉人自謂系出明秦王後裔弱冠設帳授徒卽以種族思想啓迪及門鑒於甲午戰後國勢日岌創設勵志學齋廣購科學書籍及新聞報紙以開風氣自于右任以下革命諸子多爲其及門弟子入民國後年事已高當道以顧問名義尊禮之及陳樹藩附安福乃怫然曰吾不能教猱升木助長內亂矣遂不辭而歸靖國軍時總部提倡組設學術講演會聘爲主講日以革命大義鼓舞諸軍年七一以壽終一子早卒于右任時已任監察院院長爲之請於國民政府營公葬焉一孫自強

吳星映

吳星映字寶三朝邑人清末以知縣候補湖北署麻城縣事年餘被劾歸因見清庭

腐敗絕意仕途寓居省垣與蒲城張拜雲富平焦子靜諸人合資組設公益書局爲祕密運動革命機關嘗聯合紳士上書郵傳部爭西潼鐵路改歸商辦並創辦延長石油公司及健本學堂謀從文化實業入手進行革命辛亥光復任軍府參議廳任當道皆以革命先進推崇之年六十卒於家

張東白

張東白名維寅蒲城人光緒甲午科舉人人工書善畫寸縑尺楮人爭寶之爲文章自出機杼不蹈故轍詰經解書亦不墨守舊說嘗爲南山某縣教諭數月輒棄去攜一猴一琵琶而歸旋充省立師範學堂敎習見清政不綱外侮迭乘知非改弦更張不能救國與同縣張拜雲井崧生常銘卿王子端及富平焦子靜諸人皆稱莫逆性通脫不凝滯於萬物與人坦率不自爲崖岸町畦貌似沈默遇知己則偶一發抒談言微中又或援古證今往往出人意表以之鼓吹革命收效甚宏民國奠定澹泊自甘當道諸人爭相延致以爲矜寵民六焦子靜在白水獨立稱護法軍陳樹藩以兵攻之子靜有私產曰西山書局在西安樹藩沒之入公東白偶至西安樹藩卽舉以爲贈東白受之不辭嗣是每至卽寓居其中主事者悉仍舊業務狀況賬目盈絀略不過問及樹藩敗子靜旅滻未歸卽召其子

交還之另出日用賬一本僅數年間故舊往來食宿讌談之所需而已靖國軍時或偶至各軍間不分畛域有詢以敵方軍事情形者則答以不知及至省亦如之臨行間所需則曰憶離家時老妻囑購色布數尺作褲他無所需也或贈以金錢悉不受其廉介類如此民國十一年冬十二月卒於家年六十九一子曾永

柏 惠 民

柏惠民字小餘涇陽人父森字子餘歲貢生讀書尙友樂善好施與三原賀復齋咸陽劉古愚均在師友之間嘗捐貲修孔廟刊印正學有用書籍數百卷以捐賑活人議敍中書名聞遐邇惠民幼承庭訓以學道經世爲懷讀書務觀大略不計精熟尤好閱新聞報章與同里姚文山討論古今興廢中外大勢深相契合稍長入三原工業學堂肄業是時學制初更風氣未開惠民首斥家財於本縣石橋鎮創立惠民小學又於其村創辦女子學校書籍課本皆所捐備及見清政日非外侮凌逼因讀黑奴籲天錄及孫中山小傳鉄券諸書遂密入同盟會與同志張立卿王治平等以連銷新書爲名於三原組織勤公社爲密祕機關庚戌春井勿幕銜孫總理命自日本返陝籌設同盟會陝西支部惠民密迓至家與耀縣宋相臣三原鄒子良等十餘人草擬會章暨黨人通信方法相與攝影於

其家園之水榭亭山是派人四出聯絡蒲富同耀乾醴興武各縣皆有會員並與西安郭希仁李桐軒焦子靜諸人相聯合實爲西北革命步驟一致之始惠民又出五千金派鄒子良等於宜君馬欄鎮開辦鐵礦容納入會同志並試造炸彈另以五千金推黨人張奚若赴滻購造子彈之器材以沿途查詰甚嚴改買黃色炸藥及宣傳革命書籍多箱流傳甚廣是年陝省諮詢局成立惠民膺選議紳開幕之日撫藩各大員臨蒞之時衆議循官場例全體候迎門外惠民曰吾儕此來乃代表民意者既非現任官吏又非候補屬員班迎何所取義耶旣爭之不得卽辭疾歸專致力於培養人材捐萬金爲本縣教育經費大吏奏獎道員銜親友咸賀惠民曰吾求吾心之所安耳豈以財獵顯名哉陝撫升允聞惠民好與雜峻新學至交遊疑其有異嘗以語惠民舅兄三原胡平甫使改其行又廣布耳目偵察之由是不得安居於家漫書絕句云仗劍獨立感慨多吾儕壯志共消磨赴湯蹈火男兒事不取自由奈時何因決心出遊以避憎弋辛亥春治裝赴滻途出洛陽見其地鐵工精良卽定造馬刀千把鋼矛千頭來復銃百個揚言習武防匪使人連歸分地儲藏耀縣樂王山民軍初起時所持武器卽此物也至滻因于右任偏交宋教仁人鳳陳英士諸黨人時值廣州戰役敗後全國民氣憤慨各省在滻學生紛紛回籍運動革命惠

民日在克復學報社招待西北各省青年資助歸里又與趙菊樵馬樹雄徐朗西諸人組織平民共濟會提倡各工廠工人儲蓄救國事爲孫總理聞知手書博愛二大字贈之以示褒獎是年九月西安光復後東西兩路與敵作戰彈械缺乏電滻告急惠民慨然以家資担保購得外國步槍萬枝彈數萬粒大砲四尊運回作戰勝事賴以克濟民國二年宋教仁遇害惠民在家聞耗大哭逆知袁氏必將盜國內亂方長乃改水榭亭爲隱憂亭況于右任爲書榜額並序其後惠民家本巨富因連年資助革命興辦教育斥貲甚鉅又遵先世遺教造橋修路施藥濟貧暨捐賑沿江各省水災加以時局突變商業停滯祖遺四川商店數十家陸續倒閉房產水田竹林山場不下數千畝皆折變殆盡僅餘故里土田數頃賴以自活陝人因革命毀家者推惠民爲首晚歲家難頻經憂勞多病醫藥無資陝省政府聘爲諮詢給月薪焉抗戰初期寓居西安每聞敵機報警或故友臨存猶殷殷與談國事唏噓若不自勝民國二十九年卒於家年五十三子紀會

李元鼎

李元鼎字子彝又字芝逸蒲城人晚慕元道州之爲人以家在漫川西自號漫西曼士詩文多署老曼祖雲萼字棣棠以舉人選授漢中府學敎授平生治學主篤行重條理

於先儒主敬主靜之說皆不爲苟同而獨勤於治禮以爲禮者履也惟踐履以明道而後所明者非虛故特嚴義利之辨慎出處之節久丁昌邑庠生早卒元鼎隨祖父讀書漢中步趨啓發已植爲學始基既而雲夢歿於任所元鼎扶櫬歸里僚友贈助辭受有法見者皆謂其能當大事服闋補縣學生員旋食廩餉學使沈淇泉拔入三原宏道學堂宏道者舊爲書院與涇陽之味經崇實兩書院皆名講席也時清廷初改新章因取味經崇實併入宏道改名高等學堂其生徒則學使者於科歲試時擇各縣諸生之異茂者充入之故其中多一時雋乂元鼎得與朝夕砥礪學益鴻博自庚子以後國恥日深富強之說騰於朝野學生尤憤慨皆思出國遊學以圖復興適陝西有官費選送留日學生之舉於宏道考選十二人元鼎與焉既至日本復得與全國各地賢豪上下其議論志益發抒初由濟美學校轉入明治大學分校經緯學校畢業後入早稻田大學文科同盟會成立即加盟焉與同志組刊夏聲雜誌爲當時西北鼓吹革命有力刊物并勿暮歸陝數次運動革命嘗苦機密洩露無善法元鼎爲設計通訊橫斜格及縱橫連繫法用之故西北黨人所謀無敗露者辛亥前二年回陝任西安實業學堂敎習陝諮議局成立任祕書長辛亥九月初一日陝西光復建大都督府文告敎令多出其手後長敎育司草創擘畫規制粲然先

後選派東西洋留學生百餘人成就甚衆及洪憲亂萌幡然去職漫遊北平考古攬勝歸後閉門讀書者二年餘護國軍興復出時北洋軍權尙盛乃留西安以讀書吟詠自晦靖國軍起微服至三原于右任方爲陝靖國軍總司令于亦宏道舊同學也卽延任祕書長戰爭連年南北停戰議和北政府謂陝西非民軍張瑞璣奉和會命來陝劃界持論抑揚乾縣又被圍攻元鼎與爭折以正義張卽屈服乾閏乃解論者有微旨之譽民十二年靖國軍諸部各自爲謀以求出路獨楊虎城部駐西路持正義不爲所動元鼎從于總司令赴武功又至鳳翔始終主力戰與于意合及于取道隴蜀南行倉卒間元鼎由蘭州追至隴南竟與相失遂折歸從者李壽亭蔡祥符間關崎嶇備受困阨旋敎授長安當局延聘不出十五年居圍城中八閱月日惟擁書吟詩雖飢餓不以介意十七年應召至京爲中央黨部編委員嗣任審計部副部長轉監察院監察委員擢審計部長成立第三廳完成審計制度籌設各省審計處舉行審計人員考試任事二年計政規模均樹始基二十四年辭歸國民參政會成立被選參政員連任第二屆參政員抗戰軍興被舉參政會華北慰勞視察團團長備憲洛陽南陽江陵上溯巫峽歸陝三十一年辭職歸被選陝西省臨時參議會議長三十一年連任三十三年八月疾卒於家年六十五元鼎性疆毅耐

繁劇勇於負責友朋之間有所諱謬諾言必踐行文作字一主謹嚴尋常書牘皆不肯漫然爲之尤善詩初擬漢魏樂府中年稍稍變格五十以後多律詩獨喜陳后山及簡齋兩家謂簡齋清勁后山醇深自謂所作近簡齋愧不到后山也著有老曼齋詩存五千餘首藏於家甘泉毛俊臣先生傳高郵王氏之學元鼎居長安特師事之親承指授經詁韻攝各學俊臣嘗集唐詩爲聯語贈之有晚有弟子傳芬芳之句元鼎得之甚喜願爲侯芭可以見其志趣矣子恂曰大學畢業

李 良 材

李良材字桐軒蒲城人弱冠入邑庠家貧設帳課徒自給因習筆算地理諸學得入省立輿圖館供職測量各縣地圖又與同縣張拜雲組織求友學堂於同州以科學提倡後進嗣任本縣高等小學校校長教員常銘卿爲邑令李體仁搆陷幾興大獄良材在省多方營救卒得寢息卽革命前三年轟動一時之蒲案是也清宣統二年陝省諮議局成立被舉爲副議長屢以往來公文據理力爭折服當道平亥起義之際各省交通阻隔良材夙與黎黃陂有舊自請赴鄂聯絡藉通聲氣間關南下幾瀕於危民元旣建奉派全國讀音統一會會員創製今日通行之國音字母英文V字一音在中國南北俱無其讀萬

勿忘文武也皆如玩窩王溫五有其音者厥惟陝西南北各省會員皆欲除之良材與高
培支力爭謂覘國之文明恆以音之多寡爲衡陝西語音多沿古代焉有數千年固有之
古音而可廢除乎衆莫能抗乃爲万母以存其音後領陝西革命史局以政局紛亂未能
實地進行乃與同人共組易俗學社以改良戲曲促進社會爲己任所編一字獄如皋獄
黑世界孤兒記雙姪記瓜地打狼賀家墳諸劇本皆能膾炙人口流傳一時良材幼性恬
淡不徇俗務自始讀書卽厭薄舉業而不爲平生論學恆自持一主義曰凡事必起於不
得已而爲之者則人不厭其爲非出自然機心相應煩惱隨之者卽謂之多餘事舉業者
卽多餘事之一種也革命以來周旋軍政之間少所許可故終身不落黨派其言曰舍其
見而苟同於人者恥也無其意而假其名者盜也利國者不顧家福民者必忘身惡有問
舍求田而爲英雄者乎惡有利已而不害人者乎惡有以慈悲假面示人而非惡魔者乎
遇不可與言者則終不與之言謂其取諸民者不義有毒性有怨氣非慈心能化而以養
身者不祥莫大焉故不就各軍徵辟以編劇授徒終焉所著有集孟政讀兵農說及詩若
千首晚歲精研佛典於密宗尤有深得嘗著蓮古居士傳以自道凡生平民國二十一年
春微疾端坐而逝壽七十三配馬氏子三長博出嗣其兄仲特次協另有傳次隼

李異材

李異材字仲特蒲城人清廩庠生幼好天文算數之學常夜觀星象深思算理不師而能自通及肄業三原宏道學堂所學益大進嘗盡畫九乘方廉隅諸圖著有開方數理二卷又著級數比類天地人元泰五卷以明曲線橢圓周率對數諸理皆前人所不能爲不能道者初應陝甘總督約聘主講蘭山書院未幾以母病辭歸旋充西安高等學堂算術教習慣清政不綱東南各省革命思想盪激日甚遂入同盟會被推西北分會會長與井勿幕景梅九諸同志組織祕密機關以學術倡導諸生鼓吹革命與鄧力子契合尤深又與王子端焦子靜諸人創設健本學堂陰培革命幹部他如西潼鐵路延長石油礦北山牧場皆爲之合力提倡盡耗所入無少吝惜辛亥光復多所建白共和成以當政者類無遠略因杜門學佛不復預聞時事靖國軍之初起包陳樹藩浼其赴三原調解比至語舉義諸人曰時局混沌中有此一幟革命之曙光也吾老矣公等宜爲國自重遂歸里竟不復命歷任當道皆禮聘爲顧問諮詢七十九卒於家無子以弟桐軒之子博爲

嗣

李 協

李協字儀祉良材之仲子也幼承家學穎悟過人年十七以冠軍捷歲試肄業崇實

書院學使沈衛奇其文拔入宏道高等學堂於普通學科而外尤注重外國語文清末由西潼鐵路局派送德國柏林工業大學習鐵路水利二科辛亥革命回國參加民國成立返德復學郭希仁遊歐洲恆與偕處因語之曰鐵路事體較大且需衆材衡以目前國內情勢興建鐵路或當在十年以後鄉邦苦旱民生維艱鄭渠久淤美利坐廢子盍專攻水利繼前賢爲鄉邑謀福苟有成效雖推及全國可也儀祉亦爲然遂專習水利一門民四學成歸國時南通張季直創辦河海工程專校於南京延儀祉任校長民十一年回陝任陝西水利局局長兼渭北水利工程局總工程師籌畫引涇事宜十二年任陝西教育廳長十三年兼任西北大學校長是年冬渭北水利工程設計完竣踰年親赴平津京滻等地籌措引涇工款因事變滯留北京任北京大學教授年餘回陝當道延任建設廳長堅辭不就允就水利局局長職十六年春赴榆林考察無定河是年秋任南京第四中山大學教授因赴四川重慶任市政府工程師築成渝公路十七年任華北水利委員會及總工程師製定導淮計畫並兼任浙江省建設廳工程顧問設計杭州灣新式海塘十

九年任陝西省政府委員兼建設廳長進行引涇工事及秦中各項新建設二十年兼任國民政府救濟水災委員會委員兼總工程師主辦江河復堤工程二十一年夏涇渠第一期工程完工因辭建設廳長職復任水利局局長考察漢南水利兼籌畫洛惠渠工程感於水利人材之缺乏創設陝西水利專修班即今農林專校水利組之前身也二十二年任黃河水務委員會委員長兼總工程師籌畫實施黃河治本治標各工程親赴黃河上游查勘至是又兼籌渭惠渠工程二十三年至二十四年渭洛兩渠先後興工遂辭黃河水務委員會委員長職仍專任陝西水利局長籌畫梅惠渠工程涇渠第二期工程至是亦完工二十五年又任揚子江水利委員會顧問兼工程師是時渭惠渠第一期工程告竣二十六年親赴揚子江中上游查勘並赴江北一帶調查導淮工程情形是年冬渭惠渠第二期工程告竣洛梅二渠亦將完工綜計儀祉從事水利工程教育者凡十年培植水利人材徧於全國從事江河治導工程凡九年澤被十七省救濟災民無算從事灌溉工程者凡十五年成就灌漑區域三萬餘頃利澤幾徧關中自秦漢以來未之有也平生關於水利著作及規劃暨雜文詩歌書牘都數百種於導淮治河尤具灼見能言人之所不敢言淡食粗衣自奉儉樸而待人和厚慷慨有古豪傑之風事伯叔父如父視姪輩

如子俸修所入悉以供諸姪教育之需處事公開交接推誠實事求是不爲夸言高論疾革時猶誠諸同事及門人殷殷以科學治水爲念民國二十七年三月卒年五十七

楊鶴年

楊鶴年字松軒華縣人清末廩庠生早歲與郭希仁游加入同盟會因補清室無能屢招外侮念非從教育入手莫能救國遂於其鄉發起教育研究會附設兩等小學爲試驗場所當初辦時經費僅有二金又駐同志者皆不以爲意獨立孤行卒底於成辛亥改革嘗任教育司副司長未幾辭歸民元以後倡辦咸林中學屢遇阻力百折不回十六年合併兩校增設師範職業二部並附設咸林醫院公儲局合作社園藝部各組織造成關中一中小教育兼備之學府爲全省冠陝人之言教育事業者獨推鶴年爲先進民國十七年十二月疾卒於校年五十七子二鍾鍵鍾華

宋元愷

宋元愷字向辰耀縣人遠祖師襄明末爲順天府尹因嚴斥流寇李自成殉難山西聞喜明史有傳元愷爲其十一世孫父先發字滋生初力農繼習商性豪爽喜濟人急聞於鄉里元愷十六歲失怙祖母張撫育成立性任俠見吏辱鄉民卽痛斥之冠歲入邑庠

旋食廩餉由陝經書院入宏道學堂學益進光緒乙巳留學日本入陸軍士官學校嗣轉明治大學經濟科總理組織同盟會倡導革命卽毅然加入庚戌奉派赴朝鮮大連北平運動又偕井勿幕歸陝集同志於涇陽柏氏花園水榭亭討論進行同盟會務被推與井勿幕柏筱除鄒子良四人總其事與各方同志取得聯絡在耀縣山中設牧羊場創辦鐵礦以爲革命預備施任西安農業學堂日文教員兼高等學堂兵學教授一時教員學生加入同盟會者甚多辛亥八月武昌首義西安於九月一日起義響應元愷親往軍裝局分給槍彈於各校學生遣歸組各縣民團保衛地方時有誤殺教士者當局派元愷與外人交涉保護教會安全事得已遂被推任外交司司長繼復親統炸彈隊西征擊退甘軍於興平薛祿鎮民國成立改任交通司司長嘗建議富道先後派遣留東西洋學生至二百名之多旋辭職仍赴日本任留學生經理二次革命失敗總理復創中華革命黨於日本元愷仍任爲陝西支部長卽派樊靈山高幹臣歸陝組織支部又在日與同志翻譯德意志主戰論刊行於世五年秋辭留學生經理職返陝改組西安樂羣學社以政治經濟知識訓練黨人民六七月張勳復辟元愷奉總理密命組陝西討逆軍自任總司令李岐山郭方剛副之李爲山西革命健將時留滯北平未及返而元愷已率隊渡河公佈討逆

檄文郭部軍律廢弛不無滋擾元愷召集主管者嚴加斥責並正法某隊長郭爲涕泣求情未允由是生隙及與晉軍衝突郭部失援遂殉難於晉之稷王山年三十八民入靖國軍同人始派其妻兄馬天閑微服赴晉奉遺體歸葬易棺之際猶見滿腔赤血裹於白紗綢衫中未散也

樊毓秀

樊毓秀字靈山耀縣人少孤貧聰穎端儼無子弟之過好讀書晨夕鑽研甚苦清光緒卅一年入邑庠旋入三原宏道學堂肄業時清政不綱封疆日蹙革命學說流播全國宏道學堂爲三輔人文淵藪又多報章西籍毓秀饜飫其中遂毅然以改革政治自任提倡春秋九世復仇之說信從者衆當事者覺其異假他事除其籍同時驅逐者十餘人毓秀爲之渠毓秀素嗜數學已知凡百科學俱以數學爲原則晨夕繩鑾探討最力每試輒冠其曹既被擯遂發憤遊滻上入南洋公學卒業數學專科宣統改元時事愈亟革命潛力佈滿海內時陝人之留學日本者亦多內渡聚滻上謀陝事毓秀曾受總理委託首先歸陝同井勿幕諸人於耀州組織同盟會陝西有同盟會自此始辛亥八月武昌舉義九月一日陝西革命軍光復西安毓秀亦聚衆響應於耀州不數日全陝光復而清軍趙倜

率其所統毅軍攻入潼關同時升允挾甘肅數十營進犯乾州關輔大震乾州守將張雲山誓以死守顧其所部皆新集之衆未經訓練不能制敵省垣當道急檄毓秀率部往助兼程赴援內外協勢屢挫敵鋒共和告成當道爭畀以要職皆辭不就仍赴日本留學三年熊希齡當國與陝當道盜賣延長石油礦物議大譁宋元愷時爲中華革命黨西北支部長遣毓秀與曹俊夫等六人回國抗爭實欲乘時舉義事爲當道直知機牙四布毓秀行至臨潼得耗亟返日本得免民五袁氏僭號蔡松坡建義旛於滇南各省響應毓秀同曹俊夫於白水獨立遙應西南事定遂辭軍職復爲學校教員以自晦及張勳復辟全國騷動宋元愷率衆北伐假道山右欲出井陘以扼北京之吭毓秀與偕行無何段祺瑞出師馬廠張勳敗走大局初定近畿各省俱同時取消獨立此軍尙與晉軍搏戰安邑萬泉間雖連戰皆捷而傷亡日多陷入長圍全軍覆焉毓秀初被執敵主者奇其狀貌欲活之毓秀閉目大罵遂遇害年廿三時民國六年七月十五日也是役也宋元愷以革命巨人舉事從之者衆然元愷特總其大綱其戰守機宜飛芻輓粟之任皆毓秀一身肩之嘗數日夜目不交睫而綜理微密軍無廢事諸人每歎以爲不可及當軍勢危急時毓秀本可由他道跳免及聞元愷殉難則危坐以待死蓋其殉國之志素定決不以姑留此身之說

自欺其志以負死友也其義烈有如此者

續 桐 溪

續桐溪字西峯號寒泉山西崞縣人少躊躇讀書重質行稍長抱種族之痛肆業山西大學居恒慷慨論世事隱結豪傑其後成公團守大同以及從亡十餘年之革命同人多定交於斯時山西資遣學生留學日本桐溪餞而密語之曰國殆不國諸君幸約同志歸而有事其士卒則我任之無何同盟會興遂注籍焉嘗設川路學校陰以兵法教諸生以民報爲課本前後使王建屏王建基徐翰文弓富魁李榮湯浦霖李棲鶴等數十人出殺虎口往歸化包頭一帶聯絡健兒舉事未成翰文死之洎辛亥之役包頭郭鴻林後套李棟臣歸綏曹傳章豐鎮王鎮亞托克托城吳英等鑿午俱起而閻錫山敗於娘子關去之土默特不兩月提萬人返忻者率桐溪三四年間祕約之黨與也桐溪雖家居而風采動天下郵問者趨謁者戶爲之穿辛亥春魯黨人劉冠三訪求同志自晉返京師告景梅九曰吾見續西峯於崞嘆觀止吾贊吾行可不再北矣時當道訓川校密桐溪乃應試得優貢因朝考至京第與田桐景梅九諸同志計議衆初日時至當南響北應桐溪奮然曰苟時至雖北響南應可也同人嘆服乃以南桂馨楊彭齡結新軍以李成林賈國華結警

察又遣李嵩山刦新械於應州已得而遇害及陽夏舉義陝又乞新械於晉彭齡因之遂死陸鍾琦舉閻錫山爲都督桐溪覩事集卽遣賀炳煌告錫山請從間道疾搗北京錫山方與吳祿貞期於石家莊未之許袁世凱旣使人殺祿貞桐溪星夜至省謂錫山曰革命之舉有進無退昔彭越以游兵絕楚糧道楚遂覆假我以一旅之師爲君彭越可乎乃畀以忻代寧公團長名義歸里布置部曲頃刻而定北上過代州錫山部團長張瑜方攻雁門桐溪曰仰攻不易吾趨應州斷其道然後夾擊可立盡也瑜不能從卒敗桐溪率衆至繁峙揚言將趨井陘忽北向入茹越口衆愕然桐溪笑曰吾前鋒已入大同但力弱不能守稍遲且復失衆從之卒如所言旣得大同而毅軍淮軍合圍攻之相持五旬薪米皆絕而衆志益固雙方旣莫能下有平亭之者桐溪遂率衆歸忻代甯原防民國元年正月至忻知太原巡撫爲李盛鐸亟馳告錫山以袁世凱心叵測必反革命請電大總統孫公發命進兵討盛鐸自願任前鋒旣而和議成公團旋被勒散而畀以巡警道職單騎至省視事設平民廠於太原設民警局於各縣以植自治之基且寓軍事訓練焉嗣因袁世凱剪李岐山張士秀於河東忽然投紱歸無何宋教仁被刺當軸復使人密偵桐溪於是在邑之西山治煤漆郎山鑿鐵礦河底村築魚池宏道鎮設布織廠忻有渠曰廣濟元之蒙

古渠也昔引滹沱河水以溉三縣民田明末漸廢桐溪復之得沃壤六百餘頃凡諸建置
蓋皆爲集舊部之流亡民至今食其賜非徒以封殖自晦也及金永衡袁世凱命按晉日
以捕除民黨爲事桐溪乃彌飾荒嬉日與黎園子弟論曲而密爲討袁之計史宗法鄧養
志受中華革命黨命來與議直豫魯秦大舉有期訓者如織會張漢卿馮欽哉先發難於
包頭欲迎桐溪同時密緝之令亦下桐溪洋洋如常夜二鼓忽從劇園更衣急率四騎與
宗法等一日夜馳抵保德入陝追者灤河始止時袁之爪牙陸建章督陝桐溪乃暫匿神
木府谷間輒走訪井崧生鄭思成勸發難皆被拒先是胡景翼奉孫總理命偕劉允丞馮
子明訪桐溪謀舉秦晉聯軍以出走不相值及是遂南下訪之於富平景翼急攜之冒雨
步行八里至寃子鎮與允丞會桐溪衣履垢敝腰插羊胫骨煙筒見者皆以爲塞外乞食
者雖馮子明岳維峻莫知爲誰郭希仁爲關中人望自歐洲歸講學於華山下得允丞介
往與定交而胡德天自五台至孫禹行自通州至鄧寶珊自新疆憲燕雲秦隴至一時黨
人鱗萃雲合咸以桐溪爲重世稱華下革命集團者是也四年赴約井勿幕共圖陝事
遂走日本謁孫總理以出兵自任而不居其名讓晉支部長於閻志遠孫總理討袁宣言
所謂當以晉陝一軍出關北卽指此也是年冬雲南義軍起桐溪匆匆歸至滇見唐繼堯

至川見熊克武皆於戰略有所建白旋偕勿幕入陝時北軍方扼徐州迂道徒行至則陳樹藩已乘機得陝政因與勿幕見陳知不足與語乃北走韓邵率健兒宵濟河累取榮河猗氏諸縣至延鄉遭晉軍夜襲跳而免既而袁死黨禁解始自北京歸營婚葬被選參議院議員張勳復辟桐溪偕徐永昌郭宗道訪張錫元於通州訪蔡成勳於通北勸其夜襲勳又訪馮玉祥於廊房師垂發有尼之者策不得行是年冬胡景翼舉靖國軍職於三原逾年爲陳樹藩所給執并勿幕繼爲總指揮復被刺桐溪入陝之謀屢阻乃與永昌宗道炳煌謁孫總理於廣州值七總裁改制總理赴滬乃折入滇時唐繼堯建滇黔湘鄂川陝豫七省聯帥之職駐於畢節桐溪謂之曰莫廢聯省之七不有陝耶萃秦中人材以討陳樹藩且經年如去樹藩以一軍出靖南以制豫一軍出榆林以制晉然後以大兵趨大名保定即北京可立覆也所以曠日持久者秦蜀路塞孤軍無援耳君誠以黔蜀爲利合力以通漢中全國底定將視此舉繼堯色動許爲出師又商諸熊克武於是又有葉荃石青陽等援陝之役既而南北議和北方派張瑞璣南方派桐溪並爲陝西劃界專使遂借以返陝居三原爲岳維峻策畫軍事苦心調護諸部者年餘及樹藩既敗直軍閻相文入關景翼與桐溪計所從桐溪主暫受北命借此出關以張吾軍其語甚密胡卒從之以成驅曹

之功又與張溥泉劉允丞謀戡定北方之序期會於邯鄲之叢臺孫總理返粵後國會中
民黨同志輒就桐溪商北方軍事焦易堂田桐王用賓彭養光諸人奔走尤力桐溪日與
保洛爪牙相周旋一一廉得其情實及黎元洪出走桐溪亦去至天津榜其寓曰寒廬一
時反曹吳者俱來相過從豫之樊醒民部曲咸來取進止初晉之國民黨在北京注籍者
曰民社在太原者爲平民中學皆以桐溪爲領袖十三年春派趙守鈺鄧鴻業南下請祕
成指揮部以圖曹吳八月直奉再戰桐溪與允丞議俟吳入奉命馮玉祥胡景翼孫禹行
王承斌乘其不備反攻之使之俱盡乃祕派王用賓赴粵請孫總理北來主持大計九月
十八日奉軍力將不支急電津促內應於是又有國民軍班師之役孫總理以十二月四日
至津而段祺瑞已乘機稱臨時執政桐溪恨時機已失乃令段宗林組國民新報又商於
孫禹行爲胡德夫武勉之各成一旅而躬爲胡孫擘畫大計三月孫總理病逝北京桐溪
聞之大痛已而丁母艱無何季弟桃溪歿無何胡景翼暴卒於豫由是積衰成疾幾不起
迨岳維峻徯徨於豫桐溪扶病過之爲陳陝豫晉連合之策旣而徐永昌帥師出潼關鄧
寶珊奉命援馳先後過鄭州謁桐溪桐溪爲陳三面受敵之危以山河表裏攻守皆便之
策告議論紛如卒莫能決不數月其言悉驗豫局旣大震維峻召寶珊歸瀕行過病榻桐

溪爲言豫中各軍未可輕戰宜速守河北寶珊不悟以攻武漢自任桐溪張目不答其後開封鄭州相繼淪陷奉軍入滄州天津國民二軍數萬潰於靖函開國民三軍入南口敗効略盡桐溪悲痛椎心瀕終告郭宗道曰同志自信太過寡能通籌全局者故爲敵所乘雖然吾儕革命黨人也無退無懈請以此意徧告之語不及私卒時年四十七

常自新

常自新字銘卿蒲城人光緒某科舉人因并勿幕介入同盟會從事祕密運動曾任本縣高小學堂教員鼓吹革命異常激烈爲縣令李體仁所拘嚴刑鞫訊庭笞數百血肉狼藉始終不屈入獄後爲文向各界呼援署名陝西一沙粒其文云本年八月蒲城縣高等小學堂管理員劉友仁選授教職赴任學生遂立自治規則稟請縣署俟至年終另舉管理知縣李體仁於九月初一日來學堂與諸生面談規則甚合望衆皆遵守爲妙並云若能如此一可不費公款二可從緩覓人學生卽將所定規則呈請鑒核李亦無辭初十日劣生蘇民章冉澍等以謀充管理不遂挾忿誣控略云敎習唆使學生自治以固祿位學生博歡敎習圖積多分率屬拉雜無據之言李批云稟如果實敎習學生均欠文明著將稟批抄錄傳示學堂兩敎習常自新陳同熙卽行函辭李亦不覆十三日敎習搬去行

李學生守候一日無可受課後具稟辯諭言多項撞李令閱稟大怒亦疑出自常手遂於本日下午差役數名手持蒲城縣正堂封條竟將奉旨設立之小學堂用交叉封條封禁多數學生皆從操場逃出暫寓北街關帝廟尙望官威少霽仍可回堂先是本縣教育分會廚役某恆夜出不歸致屢被竊月之某日晚該役又不言而去適被書記雷電窺見尾值所向乃至巡警局賭博蓋與縣署轎班合開之賭博場也雷卽喝罵廚役亦逃拿獲賭具亂錢回會會長常自新因充高等小學堂敎習長不在會次日始知責其越界拿賭實屬不合法已勢成騎虎只得面請李令懲辦李羞惱成怒捏稟學司以敎育會不應多事且所拿者乃整錢非亂錢乃飯碗非骰盆余學司亦不詳查只批將滋事之人嚴拿懲辦李令遂得護符于廿二日下午親領健役二百餘名各持器械槍砲緊封四門行同捕盜直至敎育會將舉人常自新親手拉出左右批頰庶務常瀛勸學員李九標門夫杜姓全數鎖拿旋去北廟廟門不開喝令差役越牆啓門至上殿破扉而入亂打亂鎖甚至十二三歲之小學生皆全數被縛得勝回衙高坐堂皇將本縣舉人敎育會會長學堂敎習常自新痛責數百其餘會員學生皆批頰二百笞三百五百不等無一能免一時血肉橫飛哭聲震天亂髮被面臉血模糊用刑旣畢卽飭拘押械繫在東西黑卡上舉人常自新與

盜賊同押晚間繫以大練旋即鳴鑼街市令差役喝叫凡在教育會者速遞悔詞恐非誣興大獄不能快意教習潼關舉人陳同熙乘隙宵遁逃進省城教育會演說員寇重慶及一漏網學生先後到省各告教育總會總會已派員往查咨呈各大憲矣會長面稟學司學司言卽寄李令一函勿得胡鬧云云當李令之稟教育會越界拿賭也余提學司不但不察其真僞且有推波助瀾之詞痛詆常教習而贊美李令之能幹李又稟稱教員不合應卽暫停一個月再蘇誣訐之詞既不詢其是否實情又不查其課本積分之數但謂李令令抄批送學堂閱看並無不合而不問其卽轟逐教習之舉動也蒲城學務萌蘖之生由於徐署令普苦心經營甫及兩年橫被擢殘慘無人理是誰之過歟現時常與學生均爲囚徒其誣興大獄亦在意中而省城各學堂人心洶懼以爲嗣後尙敢讀書充當教員乎昨日開會集議有痛哭者合座無不流涕其演說均有云縣令之威如此則提學司可知舉人如此則他教員可知學生如此則平民可知奉旨設立之高等小學堂如此則華門圭竇可知奉旨已停刑訊之後如此則以先可知悲哉痛哉陝人其終無遺噍乎云云後仍與李仲特王子端諸同志同辦健本學堂培植革命基本人材光復後歷任都督署祕書教育司次長各職未幾引退鄉居不復與聞時政後以事他出過洛河失足溺水

卒年三十四子三天序天同天口

原斯健

原斯健字象乾蒲城人肄業本縣高等小學志氣激昂抱負非常并勿幕李桐溪常銘卿王子端諸同盟先進咸器重之民國紀元前四年因教育會與縣令李體仁衝突革命祕密漏洩與校長常銘卿同時被拘遭遇極刑當時斃命年十五事詳革命紀事中

張殿騤

張殿騤永壽人清末肄業省立第一中學辛亥九月朔西安反正奉軍政府令回縣募兵並探甘軍消息而清吏升允率敵騎忽至有與殿騤不睦者構陷告密遂被執臨刑時兄弟爭死見之者莫不墮淚焉年僅二十二歲事定後軍政府爲立爲國捐軀豐碑以旌之子二澍藩澍灝

雷恒焱

雷恒焱字岷山醴泉人本省陸軍中學堂畢業辛亥九月隨同新軍光復西安復隨張雲山部轉戰邠州長武間挺身往見升允於十八里鋪告以清帝退位請罷兵息民爲允所殺投屍眢井中未數日敵亦不戰而退矣

胡文驥

胡文驥字德卿三原世家子初隨父宦遊江浙後歸陝讀書宏道學堂值辛亥義軍起遂從戎充某部隊官與甘軍戰於乾州兵敗被俘清吏升允稔其家世欲釋之溫辭諭降文驥厲聲曰余實秦隴復漢軍隊官憤鞬虜據我河山久思驅除爾夷狄之種固識順逆我以漢族懿孫仗義而來早置死生於度外豈能屈膝犬羊哉允怒立命殺之至死神色自若罵不絕口年十八

高森

高森字子光華縣人武庠生胆略過人辛亥九月朔西安光復秩序未定華縣會黨嘯聚數百人襲據縣城肆行刦掠民商惴惴森家在鄉間聞之隻身入城見其豪曉以大義導使歸正會黨悅服願聽驅策森撫編其衆受任復漢軍二標一營管帶躬預潼關茅津各役東路議和後隨吳都督世昌西援咸陽與升允軍戰於城下吳都督帶傷墮馬幾爲敵擒衆皆奔散森突冒槍彈負吳以歸嗣雙方作戰十餘日民元正月六日森以勇敢銳進竟歿於陣年三十六子卓棟

任尹

任尹字師竹耀縣人清郡廩庠生從咸陽劉古愚先生於味經書院忼爽尙氣疾惡如讎與蒲城張拜雲相結識拜雲倡辦西潼鐵路舉爲書記因得徧交井勿慕郭希仁焦子靜暨諸黨人加入同盟會擴大革命組織諸黨人在麗澤館開祕密會議商討進行方略決由運動新軍入手而新軍督練公所提調王毓江爲陝撫恩壽私人防範黨人甚嚴陳會亭倡議排去之而未得其隙尹挺身自任與甘聘莘計議調得王之劣跡多款聯絡軍界彭仲翔張聚庭等三十餘人具揭託諮議局轉諮恩撫查辦王遂罷官去諸黨人之在軍籍者始得以次超遷奠定辛亥首義之基省垣部署略定尹復與同志分途向外縣活躍因返耀縣擘劃一切爲州牧孫壽朋偵悉顧無確據不能興大獄乃嗾使其爪牙惡役名八毒者窺探其行動尹平日素惡若輩魚肉鄉民遇事屢懲創之若輩恨之刺骨辛亥二月初七日耀州城東藥王山過會入毒伺尹於醉後譏評時事得失之際捽尹仆地以刀斷其兩足復截其全體而死年三十七

嚴維翰

嚴維翰字文軒澄城人清末省立優級師範學堂畢業嘗閱讀章太炎所撰民報因大感奮與井勿慕宋元愷任師竹諸人共組陝西同盟分會任書記以文字鼓吹革命甚

力當時西安師範及高等各學堂學生受其宣傳祕密加盟者日多影響辛亥光復之功甚大及任師竹在耀州遇難維翰悲憤成疾辛亥五月歿於西安年二十九民元後井勿幕李仲特鄒子良寇遐等四十餘人共爲公啓釀資立石誌績焉

鄒子良

鄒子良名炳炎以字行原籍甘肅寧州寄居三原幼貧嘗爲某富室書館傭隨主人子續續塾教授書吏卽能領悟因刻苦自脩借他人書誦之皆上口某老儒見其劬學狀詢以書旨解答無誤且出新解老儒驚異因勸主人優遇之數年應童子試得售旋獲主人資助留學東瀛加入同盟會偏交海內志士銳意改革歸陝後與南雪亭王瑞軒李肯堂李授洲孫伯衡王若泉諸同志於西安創辦女子小學提倡放足經費皆由發起人負擔時爲光緒二十八年陝西風氣未開子良首令其妻解放以爲衆倡妻母與妹繼之由是效法者日衆而女校以興三年後移西嶽廟始改爲公立女學堂宣統二年井勿幕歸陝組織西北同盟分會衆推子良與柏筱餘宋向辰等四人總攬會務並擔任聯絡洪會黨人辛亥西安光復時嘗自組敢死隊與新軍共破滿城嗣入張雲山幕府百計聯絡消弭黨會之爭繼膺前敵軍務經略隨張西守乾州與升允所統甘回各軍作戰數月共

和成任張軍參謀長因不滿於當道所設施未幾辭職擬創辦模範新村於耀州藉以實現新民主主義既而二次革命事發旬日而敗袁世凱遣軍四出雄藩大鎮次第芟夷國民黨人咸被指目子良短小精悍蹈厲奮發之氣常溢於眉宇間性既剛直至此益憤慨倡言詆觸致被逮捕臨刑時意氣慷慨自指太陽穴謂行刑者曰槍視此可也遂飲彈而死年三十六配室李玉蘭先卒繼室師斐亦饒具丈夫氣取俄虛無黨女傑蘇斐亞之意爲名子良死時方留學日本後亦以憂憤嘔血卒

馬文明

馬文明字開臣長安人性忼爽急人之困不惜財物因鄒子良入同盟會父承麻素以刊布通俗勸善書版故人皆稱爲馬善人家有書肆卽以之爲祕密機關時與郭希仁鄒子良李仲三諸人密計大事辛亥光復任秦隴復漢軍兵馬大都督張雲山參謀長隨軍駐守乾州與升允所率回軍馬安良部激戰數月運籌帷幄不辭勞瘁共和算定又助郭希仁禁種鴉片肅清煙毒二次革命起奔走運動尤爲激烈當道承北庭意旨捕而殺之與鄒子良同時遇害年三十六子學援

胡應文

胡應文一名靜字定伯耀縣人性忼爽尙氣節自少讀書好習政治家言未弱冠卽洞悉世界大勢國基阽危非革命無以救亡圖存同縣宋向辰樊靈山介入同盟會於耀州城內設商肆爲祕密機關庚戌夏并勿幕鄒子良諸人擇地於耀州北廟灣設一牧羊場次年又在宜君縣之姚村鎮開設鐵廠藉以聯合各地豪俠爲舉事預備皆以應文主持之辛亥九月初一日義師起西安應文得訊立集健兒數百建義旗於州東藥王山爲響應并勿幕旋任北路安撫招討使設司令部於三原編所部爲防禦五營任應文爲指揮兼領籌餉事并旋帥衆援晉而毅軍廿軍同時來攻省東西路戰事急軍隊盡臨前敵北路尤空虛軍府乃任應文爲北山民團使是時士匪會黨所在蠭起乘勢擾民間里騷然應文率鄉團聯絡各縣官紳擒著名匪首斬之更募行團一如陸軍營制精心教練分駐耀州及金鎖關等處地方賴以安謐自提倡革命迄於共和告成就中如開會結社同志往來餽贍起義後軍餉之挪移辦團時公賣之墊賠費均不貲往往斥其家財不少吝惜人有稱道之者應文曰今且置生命於不顧遑論財產耶其豪邁類如此民國元年權同官縣知事招集流亡查拿匪類修城垣築河堤整頓學校籌設警察無不次第舉辦在任五月地方秩序井然二年改署洵陽縣知事其年冬鳳翔變兵流竄南山所過攻城

刦殺至洵陽應文聞變倉卒親率團警登城守禦相持數時卒以力單械鈍中彈墜城下水中殉職越三日始由縣東五十里許之深潭尋獲屍軀焉年甫二十八歲子博學大學畢業

姚振乾

姚振乾同官人少任俠好交遊常以組織會黨興復漢族爲志於縣城設麵房招待黨人爲祕密機關辛亥九月西安義軍起卽同本邑白喜糾合壯士數百人據縣城反正旋以所部屬北路招討使井勿幕奉令克復宜君中部洛川鄜州等縣事定釋兵練團保民後復參與討袁之役因不滿主將所爲卸事歸尋以疾卒

李雲峯

李雲峯字龍山長武人清邑庠生精技擊喜談兵與臨潼曹印侯郭希仁乾縣吳希真等相友善加入同盟會於邠長一帶聯絡同志待時舉事聞西安反正卽與邑人王仲元等張掛義旗迎秦隴復漢軍六標二營石得勝入城同謀西征而清吏升允率甘回軍忽至得勝遇害仲元被執雲峯逃至乾州復隨張雲山大軍禦清軍於冉店橋戰不利隻身赴省請援共和告成權華縣知事後復參與二次革命及護法靖國各戰役爲劉鎮華

所殺年四十子武

朱長春

朱長春字正宜長安人初以武庠生補陝西巡撫部院戈什後調甘督署供差聞陝西革命風潮日漲稱病假歸參加祕密團體革命軍起任秦隴復漢軍第四標先鋒隊總隊長與甘軍作戰乾醴間出奇制勝謀勇兼長富在甘時常爲甘督升允賞拔因告奮勇親往敵營求見升允言革命救國宗旨及大勢所歸請罷兵允怒使人釘死於醴泉東城門年三十六

王仲元

王仲元長武人民國紀元前一年經同邑李龍山介紹入同盟會辛亥九月聞西安反正卽與龍山據縣城爲遙應及省城派石得勝營來長武兵無紀律仲元與龍山獨負城防責而升允調固原提督張行志率清軍忽至雪夜襲城入仲元被執遇害龍山僅以身免

曹位康

曹位康字建安原籍河南沁陽清季隨父來陝從三原范卓甫朱佛光兩先生讀書

遂入三原庠考入陸軍小學堂升入保定陸軍速成班騎兵科畢業與諸同學密入同盟會歸陝任新軍馬隊隊長辛亥九月初一日與党仲昭張伯英諸同志入城奪軍裝局攻破滿城光復西安任西路安撫招討使以十餘騎略定鳳翔改任大統領府衛隊統領率部東援潼關西援醴泉與升允甘軍戰於張戶原共和告成厯任騎兵團團長第二混成旅步兵第五團團長爲陸建章所忌編遣其衆僅使帶一營駐三原後復參預護國復辟各役靖國軍時爲陳樹藩所疑解其兵柄暴亡於西安年三十四

趙丕衡

趙丕衡字規生藍田人初入西安府中學肄業意不悅逾年轉入陸軍小學則大喜未畢業值辛亥革命軍起聯合同志首先加入旋西路告急謁當局陳抵禦法奉派爲秦隴復漢軍西路前營總教練官至邠州與清軍遇獻兩路攻敵之策主將不能用冉店橋敗後歸省請援約同志練炸彈隊自任總教練兼右隊隊官與敵戰於乾州譚祿鎮建議攻敵糧秣所在地主將復不聽兵敗被圍憤極罵曰敗國事者必貪生畏死之徒也此後軍事可知矣遂同王幹臣晁孟俠任新齋率本隊士卒百餘人縱橫奮擊斃敵無算彈盡力竭被戕年二十九事定後入祀忠義祠子國琪

董雨麓

董雨麓湖南人清廩庠生民國紀元前五年（清光緒三十三年）來陝任中學堂體育教習辛亥加入同盟會西安光復時任秦隴復漢軍七標營長與清軍戰於咸陽共和成解兵仍服務教育界創製牛皮筏游泳法十六年後歸里隱居

劉幼賓

劉幼賓河北省人保定陸軍學堂畢業派入陝西新軍混成旅見習擢遷排長辛亥九月朔隨同陝軍反正任秦隴復漢軍總部參謀初隨張雲山守乾縣及潼關三次失陷省垣大兵盡數開赴西路禦敵吳世昌僅率二百餘人東援進駐華陰幼賓爲行營參謀夜查城防晝治軍書文牒函件隨時批答毫無留滯身勞形瘁幾至失明東路和議成後復隨軍西援咸陽勞苦之狀一如在東路時事定翩然歸里音問遂疎矣

陳同

陳同字素子浙江諸暨人沈靜多謀辛亥前一年來陝聯絡西北同盟份子及哥老會黨人密謀革命辛亥九月民軍起義充秦隴復漢軍副大統領萬炳南部參謀長事定解職漫遊不受各軍徵辟靖國軍時任總部軍務處處長後遂歸隱黃山二十一年卒於

南京

吳 善 輒

吳善卿字忠孚長安人清末陝西新軍混成旅成立應征充第一標三營左隊正兵拔升上士因錢定三加入革命組織辛亥舉義攻滿城有功升任三標二營營長後在乾醴與甘軍戰屢却強敵奮不顧身竟於醴泉縣東郭外陣亡年二十五

嚴 飛 龍

嚴飛龍朝邑人初爲俠於鄉里屢以事抗官軍嘗走匿甘肅辛亥九月革命軍起飛率其徒衆千餘人屬井勿幕爲秦軍第六協第十標標統渡河克蓮城與敵戰於茅津渡臨陣勇敢不顧身東路議和復率部西援與甘軍戰於醴泉三日夜攻城先登亡於城下年二十八事定後首入祀陝西忠義祠

胡 明 貴

胡明貴富平人清陝西巡防營營長平時與哥老會黨有連辛亥九月初一日西安義軍起時明貴駐防華陰廟聞訊即召合華潼間豪傑健兒率部反正逐潼商道瑞清據關響應省城逾數日豫軍來攻而省垣因錢定三遇害渭南援兵久未集明貴率數百人

與戰於潼關東原力竭被執越日遇害年六十潼關始陷於豫軍

劉粹軒

劉粹軒河南新蔡縣人文行卓然爲一時知名之士辛亥武昌首義河南爲清軍控制黨人志士無機可乘聞西安反正乃與劉鎮華楚賞齋王天縱等二十餘人聯袂西來參加東路作戰嗣聞南北議和雙方各令前防停戰而清軍第六鎮與趙倜毅軍猶屢攻潼關乃與張伯英商以秦軍專使名義直赴敵營交涉違令停戰竟爲清軍所害

張身菴

張身菴潼關人清武庠生曾任甘肅固原守備以親老辭官歸里因彭仲翔張伯英入同盟會於西安書院門設商業研究所爲祕密機關辛亥九月初二日率商團助民軍進攻滿城衝鋒先登竟以身殉年四十七子國瑞

馬耀羣

馬耀羣華陰人居鄉爲遊俠有大志辛亥九月聞西安舉義卽招集壯士數百人聯合駐華陰巡防隊胡明貴潛入潼關驅逐清吏據關反正響應省城後奉檄西援乾醴有功任秦隴復漢軍營長陸建章督陝後卸職歸田十九年病歿於家年五十六子今餘

劉 淦

劉淦字介福富平人清末以廩庫生入三原宏道學堂肄業文行優異冠同儕畢業後任健本學堂敎習加入同盟會宣統元年考得優貢庚戌朝考報罷就職直隸州州判分發甘肅實則藉此遠遊考察各地風氣有所運動也辛亥戰事後回陝襄助陝省各項建設第一屆省議會成立被選議長創始法制樹立民意精神中經洪憲之變議會被迫解散雖爲袁黨所指目而始終不屈及袁死議會復開仍任議長會期屆滿後歷署寶雞鎮巴等縣知事旋復被舉國會衆議院議員未赴而國會南遷遂不復出從事社會教育事業主辦易俗社社務者先後二十餘年淦爲人有口善談名理每於羣衆之中高談雄辯四座恆爲長者及革命先進云民國三十六年冬以微疾卒年七十三

張 煥 章

張熾章字季鸞榆林人父以進士官山東曲阜知縣貧瘁以歿季鸞時年十三扶柩返里困窘異常榆林道桂林陳兆璜見其文奇之召之入署命與子共讀王寅秋入涇陽崇實書院山長劉古愚徵君欣然問曰子不遠千里而來將毋欲學文乎誤矣余固不能

文也季鸞造次莫知所對而一生力行之基即植於此癸卯春徵君膺聘任甘肅大學堂總教習季鸞以事不果從越年徵君歿於蘭州季鸞聞訃哭失聲甲辰由宏道學堂考送日本先後肄業經緯成城諸校與諸同學組織夏聲雜誌鼓吹新知提倡革命旋加入同盟會亥辛返國至滬擔任民立報館記者民國紀元被任臨時政府祕書未幾復轉入報界二年與曹成甫李季直創辦京津民立報聲討袁世凱成甫旋被害季鸞亦入獄久之始釋赴滬任中國公學教授四年主辦民信日報五年復北上主中華新報筆政八年辦上海中華新報十三年冬復北走京津聯合同志欲本經驗以言其所欲言顯揚正義以公天下之是非因與吳君達銓胡君政之接收天津大公報名言諫論不偏不激由是大公報爲國內唯一之新聞紙季鸞聲譽遂鵠起矣首都革命後嘗任隴海鐵路局副督辦兼善後會議二軍代表九一八事變起報館遷入法租界旋移上海七七事變後又遷漢口復隨政府轉移重慶並分擴各地出版二十七年被選第一屆國民參政會參政員連選連任常以國家大計建議中樞每至安危所關涕泣陳詞當軸恆爲之心折退而治業廢寢忘食故年甫五十卽髮白體羸而豪氣終不少減真理所在直言力爭不屈不撓常以準備失敗爲辦報密訣當十餘歲時與同學言志卽曰願爲無冕之王卒伸其志生平

知友皆當代名宿如于右任陳布雷諸氏未能屈指計也民國三十年九月六日以肺疾卒年五十四

焦子靜

焦子靜本名冰以字行富平人父爲按察司吏主驛傳房子靜年十四隨至西安學吏事數年以應對敏給受知於臬司端方性慷慨好交遊與蒲城張拜雲耀縣任師竹爲密友結合同志創立自治社以開通風氣提倡地方自治爲宗旨及井勿幕奉孫總理命回陝運動革命組織同盟會陝西支部自治社社員多數參加同盟會又與同志創辦健本學堂培植革命幹部人材組設公益書局密運革命書報廣爲宣傳皆爲當時祕密機關後子靜以同盟會名目顯著爲避清吏偵察計創立追遠會名雖不同而其主張無二致也辛亥九月剪新軍倉卒起義子靜星夜馳至富平策動渭北黨人赴省應援旋任督辦河北民團使兼游擊司令收攬豪俊綏靖地方民二當選國會衆議院議員鑑於國基脆弱反動勢力不容輕視故在會中絕不輕易發言惟偏交南北名流豪雋耆舊同志時刻惕備欲有所爲國會因不受袁世凱之脅迫旋遭非法解散憤然歸里適值白狼犯陝有焦彥芳者會黨也聚衆千餘踞縣境之月竄山謀響應子靜偕官紳率衆剿平之子

靜在京時遂知袁必叛民國已承總理密命負準備討伐之責卽虛與陝將軍陸建章委蛇以伺其機及袁殂黎黃陂繼任國會復開乃重返議席遇事力持正義迨黃陂被迫出走子靜回陝欲組討逆軍未果而張勳復辟段祺瑞討平之復起秉政約法亦遂失效乃赴滻謁總理籌商方略被委西北護法招討使六年九月返陝至白水陝督陳樹藩猶欲羈縻之招以書不應十月十九日與高峻樹護法軍旗於白水樹藩以兵來攻高峻率所部與戰月餘既而耿直發難西安又未幾而張義安發難三原秦中革命各部隊皆改稱靖國軍推胡景翼于右任先後爲總司令作戰年餘子靜因赴粵目覩革命軍事局促嶺南一隅西北遙遠困阻重重轉而赴滇滇黔川聯軍總司令唐繼堯禮爲上賓並以駐京滻聯絡代表委託之西南機要事件每咨商以爲決定南北停戰後復至北京出席國會及拒曹锟賄選總統遂南下就聯軍第八軍長職十六年馮煥章聘爲第二集團軍高等顧問託以聯合山東同志組織游擊隊贊助北伐十八年西北大旱子靜方居滻卽爲籌集賑款救濟任陝西賑災會主席九一八後知日寇侵略必無止境乃返陝寓居西安欲圖有裨於國事而壯年勞累過度漸嬰痼疾雙一二事變時嘗匿中央要員於臥室中五日設計送之出城抗戰軍興西安迭遭狂炸乃輿疾返富平故里民國三十四年七

月卒年六十七子靜一生謀慮深遠口不道人過失人有小善必爲稱揚尤同情於失意者故人多樂就之舉事之初莫不就與之商及既成功反形疎闊人或以此惜之子靜嘗曰老子不云乎爲而不恃天之道也爲其事而不計其功者可免人非鬼責吾何憾焉可以見其襟度矣子四長援日本大阪高等化學科畢業次拯日本明治大學商科畢業早卒三天佑山西大學政法系肄業四天恩陝西省立商業專科學校畢業

張瑞璣

張瑞璣字衡玉山西趙城人光緒癸卯進士卽用知縣分發陝西歷署韓城興平長安臨潼咸寧等縣所至皆有政聲號爲清末良吏第一因見清政腐敗上下相蒙留意延攬僑流與景梅九郭希仁過從甚密皆默契於革命黨人有讀書縣廨者幾爲某滿人所劾辛亥西安光復被推代行民政繼管銓敘局調停哥老會黨人消弭內爭恆賴其言爲重既而辭歸太原晉省當局延長財政檢校釐剔輿情翕服時袁世凱以清廷內閣總理與民國臨時政府議和宣言秦晉羣盜不在和議條款之列臨時政府爭之久不決而北軍攻山西者已至娘子關前鋒西迫兵勢甚兇瑞璣卽致世凱書曰執事謂秦晉皆羣盜瑞璣不敢辯然奉執事令征羣盜者害且百倍於盜執事視其焚掠不禁是殘民也逆天

下之心是樹敵也避南軍之鋒專攻秦晉是示怯也朝議停戰夕謀進攻是背盟也殘民不仁樹敵不智示怯不勇背盟不信秦晉之人固將有以待執事矣世凱得書立召還其師秦晉得完當是時北軍勢盛臨時大總統孫公願以位讓世凱而蒙古王公又懽書全國請推世凱爲元首瑞璣再與世凱書曰大總統者國民之所同推非一方所得私舉孫公人望所歸故天下共舉之又安能以其位私授於人既而清主退位世凱卒當選臨時大總統人無敢議者獨瑞璣之義聲震天下世凱自得二書已深奇瑞璣任以山西省長辭不赴逾年當選國會參議院議員時被選者多以饋遺聲氣得之瑞璣獨介然爲衆樂推未嘗自營及袁氏敗後時局益亂國會亦屢被解散瑞璣居京於時事皆不過問民入南北停戰議和嘗一充北方劃界專使來陝至三原時陳樹藩方以兵攻乾縣且指靖國軍某某等部皆爲匪不肯停戰瑞璣未能制止之致黨人有不滿之辭然某某等部實皆無軍譽故瑞璣當時通電有云八省之兵數省之匪悉聚於陝西一隅民何以堪其言亦非無因也此後即絕意世事家居杜門不復出民國十六年冬以疾卒年五十六一子爾

公保定軍官學生

尙 鎮 圭

尚鎮圭字天德大荔人幼岐嶷有大志及長讀書得間重知行合一清末留學日本
憤清室親貴專權外患日亟蓄志改革孫總理創立同盟會首先加入歸國後任同州中
學堂校長提倡民族民權主義牖啓青年卽學堂爲祕密機關聯合同志密運軍火謀光
復辛亥起義與有力焉民國二年被選衆議院議員居恆落落寡言笑及遇重要問題輒
侃侃發論聲若洪鐘狡黠者多畏之及國會被魯解散乃南至廣州出席非常會議八年
復出席憲法會議嘗奔走川滇聯合同志與北洋軍閥相抗衡十一年陳炯明叛亂兩院
議員倉皇出走護法事業於以中斷而吳景濂等盜竊國會爲北方軍閥之張鎮圭嘗面
詰景濂種種違法事實義正辭嚴景濂囁嚅不能答當時是非混淆助之者寡竟莫能與
之爭十一年復至廣州欲聯合同志另開合法國會而應者寥寥事久未集逾年冬聞曹
锟賄選成益大憤由是鬱鬱驟發肝疾是年十月十九日卒於廣州年四十九孫總理爲
文以祭之曰「惟中華民國十有二年十一月十九日卒於廣州年四十九孫總理爲
之喪致名花清酒於尚君之靈而告之曰夫惟哲人邦國之寶慮其不壽以頌以禱然而
國人所欲殺者每如荆棘之滋蔓欲生者每見芝蘭之夭折倘非人力易窮不應訴諸天
道幾年以來又以國步之艱責任之重死傷者之日多離叛者之日痛將欲簡練同人奮

策義勇作庶民之朝氣登治理於極峯而君逝矣嗚呼文所痛哭者不始於君文所期望者不止於君而君則昔爲文所期望今爲文所痛哭之一人嗚呼哀哉子四者交者多者炎者畱

王兆離

王兆離字伯明扶風人少從三原賀復齋先生游繼學於咸陽劉古愚先生三原萬守程朱咸陽重經世之用兆離會通旨要身體力行道德經濟爲鄉里矜式旋領鄉薦應充鳳翔西安各中學堂敎習憤甲午庚子兩戰役清庭辱國割地知非革命無以振救中國時以滿漢種族問題詔諸生於宣統二年加入同盟會辛亥光復之際在西路各縣宣傳革命大義安定人心民元既建當選省議會議員二年被選國會衆議院議員袁世凱謀帝制授意各省當道推舉代表議更國體當局物色及兆離敦促就道峻詞拒之洎袁死國會重開乃入京出席建議尊崇孔道以奠政治基礎國會二次被迫解散孫總理建護法政府於廣州兆離隨衆至粵出席非常會議嗣以目疾復至北京就醫逾年曹锟欲賄致總統日輦金羅諸議員兆離憤甚謂同仁曰議員代表民意今若此時事可知矣卽欲登車他適以目痛甚復止將選前夕諸遊說刦持者屢至兆離益怒咄之曰某平生自

有出處頭可斷賄選投票不可得也諸人知不可強則逡去既而目疾益劇竟至失明返里寓居長安與人對辨聲而已民國政府旣建追懷舊勳以兆離峻概清操給年金以贍之蓋異數也二十三年國府主席林森蒞陝造廬以故人禮諮問語人曰王先生北方氣節之士竟失明可念也蓋林亦當時衆議院議員與兆離過從甚密相結以爲久要者也兆離貌清癯長身修髯持躬廉介急人之急不少躊躇晚歲里居值抗倭戰起時時間兵事得失日望中興民國三十一年二月卒年七十二憲周憲昭

陳同熙

陳同熙字會亭潼關人清光緒癸丑補行王子併科舉人鑒於清政失馭外侮迭乘因赴日本留學加入總理同盟會與臨潼郭希仁蒲城王子端常銘卿富平焦子靜師子敬諸人深相結民國紀元前四年（清光緒三十四年）任蒲城高小學堂教員運動學生密謀革命九月二十四日蒲案發生時以先期因事他出得免聞訊後星夜馳赴省垣呼籲各方激起全省學生罷課風潮出常銘卿於獄嗣因考職入京聯合軍界黨人上書諮詢院黜陝新軍督練公所總辦王毓江陝籍軍人始得以次擢升要職卒成光復之功民國建元被選衆議院議員國會解散後留京有所運動因憤致疾卒於北京年三十六

子輝漢大學畢業

楊銘源

楊銘源字西堂宜君人少有文彩爲沈淇泉學使所賞拔肄業三原宏道學堂旋送日本留學見清政不綱強隣環逼知非革命不足以救國集合同志組織夏聲報鼓吹新知倡導羣倫歸國後與張伯英鄒子良張翔初井勿幕井崧生諸人祕密往來籌計大事辛亥起義任東路都督張伯英總參謀與清軍相持於潼關月餘民國建元被推爲臨時省議會議長國會初開被選衆議院議員後見忌於袁世凱幾遭不測衆院解散後東渡扶桑南走嶺嶠出席非常會議感染濕疾後任陝西省教育廳長數月旋赴北京就醫歿於德國醫院年四十五子汝民

吳聘儒

吳聘儒字希真乾縣人三原宏道學堂畢業留學日本得識孫總理入同盟會歸國後擔任西北革命工作創設平民共濟會聯絡黨員二次革命起時在乾醴興武各縣號召羣衆謀大舉以餉彈缺乏失敗後復參加護法靖國各戰役旋解兵柄隻身東遊勞心過度十三年疾卒北平協和醫院年三十九一子撫東

王 銘 丹

王銘丹字敬如臨潼人當清末季嘗慨西北人情蔽塞守舊以開通風氣矯正時俗爲己任從事講演口若懸河聽者爲之動容渭南令張世英見而奇之延致幕中日與謀議推行新政旋與郭希仁曹印侯賀紱之諸人於省垣組設麗澤館講學其中實爲革命祕密機關辛亥起義任東路防禦大使共和成署鄜縣知事卸事後病歿於家年五十二同時有華縣李坤生乾縣李守先並以善講演聞時有陝西三大演說家之稱

曹 印 侯

曹印侯名樹勳臨潼人少孤貧力農奉母年二十自悔失學從同邑包海涵受業晝夜鑽研不輟學爲文下筆奔放不羈無扞隔語入泮後每遇文會輒一日成數十藝見者嘖嘖歎爲異人光緒三十年富平張扶萬主講橫渠書院張本關中淹博士印侯得其指授學益大進遂博覽羣籍於政治理財諸端詳稽博考纂爲巨帙加以論斷雖宿儒歎爲弗及時王敬如講學里門其學主程朱能貫穿新理印侯踵門委贊執弟子禮往來講論經年心大悟歸築土室顏曰逍遙洞取古今中外賢哲遺著摘條手抄貼壁殆滿上下千古鑒然貫通印侯之學至是大定嗣與郭希仁劉藹如賀紱之分門治學於西安麗澤館

印侯鷄鳴起練體力張兩臂迴環擊柱聲震屋宇每深夜演說痛陳時事之艱人心之陷溺慷慨泣下聞者奮興宣統二年應選拔朝考北上自題小照寄友云天地盜完猶恨少虛空踏破尙求深江山海嶽開王霸怒馬神龍鑄鐵身潮翻宇宙風顛海日照中天月滿輪若問先生真實像玻璃肚子金剛心可以想見其概矣是年八月各省二次請開國會陝西舉印侯爲代表東南人士多薄視西北人當會議時甲此乙彼日中不決印侯慨然曰此事無容辨駁之地請卽向政府索我民權來若弗獲各取頭顱獻於醇王府王必徇所請矣衆相顧咋舌無一語然咸服其忱擊京師各報紙競爲標題轟傳九衢旣還聯合紳民倡辦地方自治加入同盟會川蜀抗路事起乃入西安約同志組織革命軍密赴渭北招募開西安反正卽率鄉閭入臨潼以應省垣錢定三督師東出留印侯守後路及錢至渭南遇害張伯英繼之收復潼關印侯爲籌糧三千石餉軍繼又入西安謀招河北壯士略甘寧謂我不搗彼必犯我毋寧先出以制之議未決會潼關失守伯英函招救援印侯飛書走使十數日得勝兵六千遊俠輕生仗義之徒悉歸之號敢死軍破產貸資籌萬金以具軍資自食粗糲與士兵同甘苦潼關二次克復而甘軍忽來犯分道薄乾州鳳翔鳳翔守兵單尤急印侯奉調二日夜馳抵鳳與甘軍血戰三十餘次率烏合之衆以

土槍刀矛衝馳於快槍怒馬之間無一人畏却者卒能保危城屏西陲使敵騎不得東竄厥功甚偉共和吉成印侯首議裁兵時諸將新立功當事者難之印侯曰請自我始一朝遣散十餘營僅留正兵屯田兵各二營裁兵後即條舉陝西實業擬次第擴充而尤致力於涇渠之開鑿當局者以財政匱乏僅撥屯田費五千印侯爭之語多亢直既而印侯所辦棉花公司在咸陽者藉事索銅商銀二兩五錢當道聞之立捕二人斬以徇並遣騎速印侯人皆爲之危勸其走避印侯不肯逕至督府痛哭陳辭不亢不屈當道意解遂置不復問已乃悉令散其餘兵印侯遂專志經營商業欲以財權左右世界民國二年養疴漢口先是二次革命軍未起時黃克強李協和諸公走書詣印侯約同舉義印侯旣籌歸陝響應矣而以病未及行至是謀泄被捕入獄在獄中上書詞旨壯烈旣而得釋會天熱舊疾增劇移住杭之西湖爲靜養計民國二年十一月歿於普光寺年三十二印侯貌豐下目熠熠射人行步矯健與人交握手出肺肝一語不合則推誠面責無曠徇雖悍將莽夫一見無不傾心其學問自成一家議論思想均能抉破藩籬尤善領導後進自爲學約若干條其言皆雄肆奇闢足以開拓心胸苟天假之年使持其說馳騁一世其成就豈可量哉

楊仁天

楊仁天原名壽昌號仁山藍田人受業牛藍川先生之門十九歲入郡庠旋以優行貢成均好學深思志期遠大辛亥春間廣州革命戰役失敗發憤欲有所為因赴西安得識張雲山馬玉貴胡笠僧甄壽珊諸人於酒肆加入同盟西安舉義後與曹印侯募兵渭南任敢死軍標統西援乾醴士兵皆持長矛奮挺縛刃作戰犧牲甚烈而敵軍亦為之挫氣焉共和告成隨衆編遣攻率一營為水利軍駐涇陽之王橋鎮修濬龍洞舊渠年餘竣工水利復暢卽今涇惠渠前身也民四陸建章督陝被殺鄉人仁天與同縣方象堃長安王紹文等密謀舉事及方王等遇害乃出走平涼以避之更得結識山右同志續西峯李岐山馬欽哉諸人共謀大舉潛回關中與劉允丞鄧寶珊等策動各方遂陸覆袁是為護國之役靖國軍興任第三路曹俊大部參謀兼簡練隊隊長募集有志青年練為軍事幹部九年被選第三屆陝西省議會議員組合同志組織正誼社與軍閥政治相抗爭十五年鎮嵩軍圍西安仁天在圍城中贊助守城大計尤力城圍解後負責掩埋兵民骸骨數千具卽在革命公園二天塚是也十九年國民政府出師北伐仁天復與甄壽珊密組西北民軍驅逐陝督劉郁芬弼成統一之功又被各界人士公推為和平會主席力疾任事

地方秩序賴以不至糜爛二十二年任國民政府監察院監察委員會提案彈劾何梅協定不爲當道所納抗戰後奉派駐節西安撫慰傷兵難民調查政治二十八年赴渝述職在渝市西郊遇敵機投彈受傷卒年六十子五大乾永乾遠乾篤乾振乾

彭世安

彭世安字仲翔原籍福建侯官父官陝西白水因占籍爲白水人幼時卽有志光復考入保定陸軍學堂留學日本加入同盟會歸爲陝新軍隊官辛亥秋被派爲京師會閱新軍代表聞西安義軍起間道馳歸任秦隴復漢軍大統領府參謀長靖國軍時任總部軍政廳長後隨馮子明旅出師潼關爲國民軍應援與鎮嵩軍戰於華陰陷敵遇害年四十三女子三人

張光奎

張光奎字聚庭長安人父子終嘗爲雲南江川縣知縣以廉直觸忤上掌掛冠歸光奎性豪爽喜交遊入本省武備學堂畢業充新軍混成協隊官與張伯英彭仲翔党自新錢定三諸人入同盟會組織軍事研究社爲密祕機關辛亥光復任秦隴復漢軍大統領府參政兼東路籌餉大使共和告成任陝西實業司司長加授陸軍步兵上校創辦機器

麵粉公司工藝製革等廠陸建章督陝時任全省清鄉會辦處事寬厚力避株連陝人賴以保全者甚衆陝局再變後遂屏事家居平生任俠尚義氣揮金如土家無餘財晚境愈艱屢任省當道皆聘爲顧問民國二十五年卒年五十九得各友好贈始克殮葬夫人盧氏名慧卿初與相識其居在西關僻巷中諸黨人恆假其室爲密謀地聚庭嘗被陷入獄盧奔走各方營救得脫民國既奠謂聚庭曰夙願旣償宇內一家抱澤皆貴仕我輩其追踪馮陽夏平無令人作膝薛齒冷也見同人卽告曰此役良苦今復得見亦云幸矣功成身退古有明訓聞者贊之先聚庭十餘年卒亦巾幘之卓識也

井 岳 秀

井岳秀字崧生蒲城人清武庠生性豪俠膽略過人鑒於清政腐敗國勢阽危結納草澤游俠密謀革命聞孫總理組同盟會於日本資遣其弟勿幕東渡留學首先加入受任陝西支部長事在勿幕傳中宣統二年被選省諮詢局議紳益得與省內外革命同志聯絡家本素封因運動革命先後斥貲甚鉅無所顧惜辛亥之役率兵援晉收復河東移師防隴轉戰乾醴間共和成首先解甲以爲衆倡民二戡定葭縣秦馬澗之亂後任陝北鎮守使駐防榆林前後歷經郭金榜盧占魁武得功樊老二馬瑞旺張青山李青蘭韓大

旗怪和尚高墾子鄭丁酉段懋功楊猴小馬元良劉志剛各股匪屢次擾亂或堵擊潰走或立予殲除安靖地方逾二十年陝北毗連內蒙伊克昭盟與烏審準噶爾郡王扎薩克旗接壤岳秀派人時與往還宣布中央德意協助弭平小五楊五喇嘛什喇嘛等內亂不分畛域盟旗王公莫不傾心感戴凡有糾紛疑難皆取決焉提倡教育實業興辦榆綏延米各縣男女中學凡六所佽助學生留學平津滬晉各地者三四百人自靖國軍時君隱爲北面重鎮民十一年楊虎城敗於武功退入北山得其資助聲勢復振二次南下遂成西安守城之功靖國軍時東道不通黨人往來平津各地者咸迂迴出其途行旅資餉得以無缺民國二十六年卒於軍年六十五

張寶麟

張寶麟字仲仁紫陽人保定陸軍學堂畢業歸陝任新軍混成協隊官與錢定三張聚庭等運動新軍及會黨同志加入革命厥力最多辛亥起義與錢定三自西門入繳收陸軍學堂槍械進佔軍裝局協攻滿城省城既定出任南路宣撫使陳樹藩督陝時復任軍職卒

吳世昌

吳世昌字華堂湖北鄖西人清末以貿易來陝與哥老會黨有連投入新軍與張雲山張伯英錢定三等三十六人祕密結盟共謀革命西安光復任秦隴復漢軍兵馬副都督東拒清軍於潼關相持月餘和議成復率部西援咸陽奮勇督戰右腿中敵彈負傷猶指揮不肯少却其和既奠以功授陸軍少將解炳閒居閑門茹素二十餘年終老於家年六十八見者不知其曾爲叱咤風雲之人也子三紹遠鎮遠明遠

王榮鎮

王榮鎮長安人爲人慷慨有胆略明事理初入新軍爲騎兵營正目因李仲三馬開臣胡笠僧加入革命團體聯合會黨共成辛亥光復之功初任騎兵標統隨張伯英攻克潼關驅逐豫軍是爲潼關第一次收復旋因西路戰事亟調援鳳翔共和成改隸張雲山第一鎮陸建章時解兵家居十五年以事爲國民革命所殺弟鎮海饒悍善戰初隨張雲山在乾州以事忤張回省適鳳翔戰亟乃率徒手數百人持雜色土槍百餘桿馳往赴援奮勇陷陣卒

陳得貴

陳得貴字海山河南人夙爲哥老會黨徒中優秀份子初充本省新軍第一標二營

正日因李仲三馬開臣胡笠僧入同盟會加入小雁塔祕密會議爲三十六弟兄之一會黨與同盟會黨人往來接洽恆派得貴與王榮鎮兩人爲代表常到諮議局與郭希仁諸人商議機密辛亥起義之先又由兩黨同志派赴河東聯絡晉省會黨同志得其響應省垣反正後轉任秦隴復漢軍監軍團長東西兩路作戰均有功勞事定任陝西軍官學校校副官後復奔走討袁之役旋以母老謝事歸年尙不及三十後不知所終

向 紫 山

向紫山原籍湖北均州清末來陝寄居富平以哥老會黨牽涉繫獄辛亥西安義軍起在富平人聚衆響應出紫山於獄推爲統領簡合徒衆得四千餘人赴省隸兵馬大都督張雲山部旋隨雲山西征禦清軍於邠州長武間以戈矛當火砲冉店橋一設猛勇克敵卒保西路當時所謂向字營獨能轉敗爲勝者也共和告成後自請解兵改任都督府副官旋回湖北終老於家子二長名某次名華州白狼竄陝時從軍往禦戰歿於黑龍口

石 玉 山

石玉山字鳳岐河南洛陽人初充河南陸軍一標二營正日因與同輩許、隊官侵餉事被革遂來陝投入新軍騎兵營第三連加入張雲山哥老會又與錢定三萬炳南諸

人結爲三十六弟兄辛亥起義時率隊由東門進攻滿城東北面以功任秦隴復漢軍騎兵第一團團長隨同萬炳南出守鳳翔與甘軍崔正午部激戰數月共和告成駐鳳練兵嗣以母老請假歸里病卒於家年三十九子平成

張玉成

張玉成字益民石泉人初入陝新軍混成協第二標三營右隊充正兵加入小雁塔同盟爲三十六弟兄之一辛亥歲受錢定三張雲山命往漢南一帶聯絡會黨約期舉事西安光復任西路招撫使事定解職洪憲之役復在南鄭召集黨徒謀起兵爲北洋陸軍所捕殺年三十五

薛豫華

薛豫華字建侯咸寧人少讀書見新聞報紙中革命言論悅之考入本省陸軍小學畢業升入湖北陸軍中學畢業回省充新軍步兵排長與錢定三張雲山諸人深相結小雁塔會議時君年最少身最短而所結合之潛勢力爲最大辛亥九月光復推湘人會黨首領余晉海爲第六標統帶而已副之克復滿城六標之力居多旋率一營從張雲山與升允軍戰於冉店橋中彈墮崖匿死屍中得免共和成第六標縮編爲營隸砲兵團當局

以余晉海年老令退休而以君任營長君謂六標功最大傷亡亦最多亟稱余勞不應置閒散乃以余爲營長而使君爲他營教練官君辭曰余統帶在危難時不肯捨我去我可於太平時貪祿位以他就乎上峯義之遂使充余營營附駐守乾州二年白狼竄陝攻乾州晉海與君分守西南兩門匪衆蠭擁登南城晉海死之君聞南門既陷晉海不知下落士兵有勸出西門逃者君曰營長生死不明且相約由北大街巷戰退何可背之乃率衆下城東進與匪遇戰至天明力竭被執大罵不屈而死年二十七遺腹女一其妻董氏撫之成年適鄴縣孫元

王克明

王克明字俊德咸寧人少孤貧習割烹庚子八國聯軍入京議和後憤清政不綱棄業從戎選送陸軍將弁學堂充砲兵排長與張雲山井勿幕鄒子良等參加小雁塔會議辛亥西安起義首先奪軍裝局攻入滿城不忍多殺旋從張雲山西征充先鋒隊隊長與升允甘軍戰於冉店橋兵敗被圍自毀砲身突圍而出前阻懸崖躍而免雲山嘉其勇敢委任砲兵總指揮同守乾州十一月二十日敵軍撲城置大砲於城北唐武則天陵居高臨下彈轟如雨集城危甚克明鼓勇登陴描準一發中敵砲口炸燬之敵軍大驚謂我軍

大有人在急移餘砲去至今乾人稱之傳爲神砲共和成以功任砲兵團長改授步兵上校加少將銜論者謂西北大局定於一砲較之古人三箭定天山殆又過之卒年三十六

邱彥彪

邱彥彪原籍湖北江夏清季來陝僑居西安以武庠生充防營軍職入洪門會爲大龍頭宣統元年入同盟會與張伯英錢定三諸同志密謀革命辛亥起義任秦隴復漢軍第四標統領兼管省會城防事宜奉檄救援西路與升允所率甘軍戰於鳳翔岐山間數月共和告成解兵閒居與同志創設秦鏡報社闡揚革命正義後爲陳樹藩所忌避地漢中爲駐軍張仲仁所害子子麟

彭泗海

彭泗海甘肅海甯人幼力農以驟車運輸商貨往來秦隴間行俠義好結交辛亥初受張雲山命在平涼一帶聯合黨徒從事革命工作聞西安革命軍興即在海甯樹義旗爲響應號興漢軍旋奉檄調至乾州與升允所部甘回各軍戰勇敢先登人皆以猛司令呼之共和告成以功任陝西第一師第四團團長駐防邠州紀律嚴整慈祥愛民百姓稱之爲菩薩軍人嗣解兵家居五年護法軍復興受高峯五密命在海甯一帶聯絡同志及

舊部謀起兵討袁事洩爲袁黨甘肅都督張廣建所殺年三十五

張 建 有

張建有河南南陽人初入本省巡防隊充什長後入新軍第一標一營充正兵擢正目與錢定三張伯英等三十六人結盟密謀革命辛亥光復以攻滿城功任秦隴復漢軍騎兵第二團團長與清軍作戰潼關月餘共和告成駐防東路後率部堵剿白狼於柞水疾卒於軍年三十五子某

陳 樹 發

陳樹發字雨亭紫陽縣人幼穎悟少習商於鄂有志軍旅投入本省新軍獲與同盟會同志交辛亥起義以胆略初任秦隴復漢軍大統領府軍政部次長尋改任秦省都督府軍政司次長東路招討使兼秦軍第一標標統治軍嚴明有聲輕財好義樂與士人交晚年流寓南鄭與人談國事譏切無所諱未幾竟爲仇家所害妾李氏及次子同罹難夫人文馬氏寄居西安亦憂憤卒長子國安旋亦病卒

郭 錦 鏞

郭錦鏞河南新野人幼讀書應童子試不售棄文就武初入陝西巡防隊因見綠營

腐敗改投新軍砲兵營與張雲山張伯英諸人相聯絡結爲三十六弟兄同謀革命辛亥陝軍起義率砲兵數十名攻佔軍裝局以功任秦隴復漢軍軍令副都督兼步兵第三標統帶官率部東徵與清軍戰於靈寶陝州間常爲先鋒隊共和成任陝西第二師第一旅旅長後因年老解兵家居洪憲改元復與同志密謀起兵討袁被陝督陸建章所殺年四十三

劉剛才

劉剛才原籍湖北因經商來秦寄籍咸甯性慷慨好交遊屢喪其貲遂投入陝新軍混成協充一標二營三連正目與張雲山萬炳南諸人加入三十六弟兄共謀革命辛亥九月陝軍舉義時擔任攻取巡撫衙門協攻滿城以功任秦隴復漢軍步兵第一標統帶官隨同張雲山禦清軍於乾州共和既建解職歸農後充靖國軍第四路參議兼後方運糧官民十一年疾卒於洛陽軍次年四十二子永民

劉世傑

劉世傑字俊生河南南陽人幼讀書常慕李光弼之爲人來陝充巡防隊中旗正兵見綠營腐敗轉入新軍第一標一營充正兵與錢定、張雲山張聚庭諸人結爲三十六

弟兄辛亥西安光復時率隊攻巡撫衙門收繳中營槍械協攻滿城以功任秦隴復漢軍
軍令大都督出征潼關與清軍苦戰數月革命成功改任旅長旋解兵柄後充岳維峻南
路軍第二旅旅長駐老河口以士兵闊餉死於法年五十六

陳殿卿

陳殿卿湖北均州人性爽直識大體與張雲山萬炳南同爲哥老會黨人因錢定三
諸人加入革命團體辛亥九月西安光復諸黨人會議軍裝局推舉正副大統領萬炳南
等意見分歧惟殿卿與李長蘭始終領服張鳳翹及見諸人相爭角心殊非之因宣言於
衆曰義軍甫起成敗尙未可知而諸君猶以權位自起紛爭甚非國家之福如再有以
名位相爭者吾卽先焚軍裝局而去會衆聞言始稍歛戢翌日吳世昌亦以大局未定當
以事業爲重其他不足爭論爲言並由郭希仁張衡玉從中調停於是大衆意見稍釋乃
舉萬炳南爲副統領張雲山等爲各路大都督大局始定論者謂此次會議殿卿數言實
爲有力初任秦隴復漢軍監軍出援東路二次收復潼關民國二年閏陸建章將來陝卽
謝事家居及諸軍先後裁撤人尤服其有先見云

馬玉貴

馬玉貴字青山湖北省人初充陝西陸軍混成協一標三營正目與張雲山萬炳南諸人同爲會黨巨子因張聚庭錢定三張仲仁加入革命組織發動新軍起義任總理糧餉大都督率部出援西路與升允甘軍戰於冉店諸軍敗潰獨禁所部不許退卻敵軍亦不敢追共和既建改任協統陸建章督陝後謝事遠遊見者不知其曾爲都督也

惠象賢

惠象賢字春漢長安人清廩庠生選送關中大學堂畢業并勿幕郭希仁介入同盟會與康寄遙惠甘亭等創設兩等小學於帝君廟鼓吹革命辛亥西安光復任軍府軍需及親衛隊管帶旋升標統和議成調署省會警察廳長兼警務處長陸建章督陝後解職任督署參議後辦菊林小學及救濟慈善事業卒於家年六十三子秉瑗

薛駿

薛駿字麟伯華縣人清季留學日本入同盟會回陝後充西安健本學堂校長並於省城設立正誼書局爲黨人祕密集合機關辛亥陝軍起義時齎軍府密函間關赴鄂籌辦械彈並爲秦鄂互助計商請鄂督於老河口設兩省交通處藉通南北消息共和成立任陝西製革廠廠長督造軍用物品七年冬應靖國軍第一路招赴鳳翔至興平爲人所

狙擊死年四十二子尙忠

韋 虞

韋虞字協度蒲城人清末肄業同州師範因寇勝浮馬彥翀薛卜五入同盟會辛亥反正任北路招討使井勿幕參謀勿幕援晉虞爲留守督同部衆馳援三水醴泉相機策應保固邊防共和告成潔身引退繼而護國靖國國民軍至西安圍城各役皆任黨軍要職解圍後任國民聯軍駐陝總司令部監察委員君學有根柢蹈履不苟而性恬退所至人咸目爲老成君子於關學文獻尤篤好焉民十八年病卒年五十四子一靖生

紀 雨 晟

紀雨暘字時若富平人弱冠經商三原因讀民報鉄券諸革命宣傳書加入同盟會與同縣紀子文三原張立卿諸同志組織勤公社爲祕密機關辛亥起義任井勿幕部營長與清軍戰於三水勿幕東渡河時嘗兼代渭北安撫使職共和成解兵歸商駐滻數年與陳英士徐朗西諸人奔走討袁護法靖國各役二十年被選南京國民會議代表後遂奉佛家居卒年五十八子三天太義太佛太

王 梸

王檉字偉齋乾縣人清末爲健本學堂教員加入同盟會運動革命辛亥西安光復任秦隴復漢軍總部軍需處長討袁護國無役不與後雖歷任西安督署要職而操守廉潔不妄求十八年陝西飢疫竟以絕食卒於西安年五十二

党廷佐

党廷佐字又青富平人天姿英挺讀書超人十九歲入邑庠肄業三原宏道學堂遇試屢列前茅派充同州中學敎習念清政不綱外侮辱國恆研習古兵學書因以號啓諸生密結同志主張革命旋考得宣統己酉科拔貢生庚戌朝考後循資得直隸州通判分發甘肅不赴任職本省督學公所辛亥西安起義參加黨軍光復省城及潼關失陷張伯英督師東征引廷佐爲行營副官凡屯營宿站規畫便利相度險要傳遞文書等事悉以委之軍行倉卒又無襄助者廷佐一身肩之布置周詳悉合法度伯英依之如左右手民元既建以功擢秦軍第二師第五團團長駐防商雒恂主本鄉團練剿匪被戕廷佐辭職奔喪旋奉令督辦渭北行團追擊股匪於蒲城白堤鎮中匪伏弟廷銓死之廷佐與弟廷璧突圍出集衆復戰匪就殲焉五年夏匪衆數千突來圍其村火其居攻之數晝夜不能克時論壯之後率其人徒至漢中年餘及聞靖國軍興卽樹南路軍旗爲遙應胡景翼

遣使招之歸涇原隸田玉潔部任支隊長十一年升砲兵團團長國民軍時擢第三師步兵第二旅旅長從玉潔駐洛陽十四年轉戰山東負傷而還後遂屏事鄉居其鄉舊有城市曰老廟鎮唐時爲長樂驛中朝貴人歲時謁陵之孔道也清代毀廢已久廷佐倡衆復之築城垣闢街道招徠商賈懋遷百物不逾時而蔚然以興民衆咸利賴之又於其內建中心學校提倡文化奠自治基礎矣任廷爲人忼爽果斷言行必踐其鄉里同輩在軍界者不下數十人皆無聞於里黨間獨廷佐晚年爲鄉人謀公益垂久遠焉民國三十四年疾卒於家年五十九

袁 植

袁植字佐卿華縣人代有學人植承家學弱冠入泮能文善書名噪遐邇宣統己酉應選拔試得雋庚戌朝攷報罷歸逾年辛亥西安光復而清兵陷潼關張伯英督師東討過華縣植時家居聞義師至杖策謁行轅伯英與談大悅使草出師檄援筆立就伯英益驚其敏捷卽署爲書記官書私贖悉以委之時軍行倉卒人材缺乏軍中文書惟恃植治軍旅則恃富平党廷佐故伯英嘗謂人曰袁党二公吾左右手也和議既成植以伯英荐署華陰縣知事繼調潼關知事民國二年任某軍祕書長五年署咸陽知事調雒南又調

甯陝所至皆能得民心二華地勢低窪耕地多爲水沒植在華陰教民以除草墾田之法復得良田數百頃有以金謀充房書者植却之因署所居室曰天知齋蓋師先賢楊震四知之說而仍示敬畏謙抑之懷也其在他縣並有治行民國二十七年終於家年六十子夢蛟字幼龍保定軍官學校畢業從胡景翼岳維峻屢立戰功國民軍時任團長

王鴻遇

王鴻遇字紹文長安本首高等學堂畢業沉默獨行躬儉厚人扶危急難有古俠士風爲學務識大體貌清耀而內多斷同學比之張子房民元嘗任國民黨部幹事主張以黨治國意氣發揚屢遭當道疑忌二年秋贛甯事敗埋首家園從事國民教育並主平民會會務密聯黨人廣交豪俠而政府愈注意焉四年袁世凱謀帝制海外諸同志歸陝密謀四路大舉討袁鴻遇住省垣中路當道重兵嚴防急不得發乃破產創設三育學校於西安以培後進是年冬滇黔護國軍起秦中各路事機已熟剋期發難至五年春謀洩鴻遇首被逮酷刑裂膚辭不少屈二月十五日遂赴西市鴻遇呼曰吾今死矣吾死後有能力拯民於水火者吾雖死猶生也行刑者叱使跪鴻遇曰若無然吾爲國爲民復誰跪乎竟從容立而就義市人觀者皆爲墮淚義士袁紫霄收其骸骨葬於雙水磨村故里其繼室

張以留學海外給其姑慈母白髮猶時倚門望子歸也遺孤二長楨次植均孩幼翌年帝制消滅黨人胡笠僧等數十人始爲泐石以彰義烈馬青苑以患難交時卹其孤于右任親吊其墓並續書數語于墳珉焉

張 淵

張淵字深如興平人幼讀書入邑庠旋從三原賀復齋先生遊志趣超異衆流恆以天下爲己任因自號思任閣主人自遜清戊戌辛丑兩變法後邑中創辦新政多推淵主持對教育實業尤極端提倡不遺餘力嘗謂非改良教育無以造就人材非發達實業無以致國家富庶以故主持邑中學校多年附設工廠於學校之中又以陝西地處西北風氣閉塞與同志創辦興平報專以灌輸文化啓迪民智爲務辛亥起義興平報之鼓吹與有力焉宣統元年西安府知府尹昌齡創辦實業學堂於西安延淵爲校長未及三年成效卓著嗣見清政府假立憲之名以塗飾國人耳目而施專制愈烈遂舉數十年前之心事稍稍示人常訓勉諸生以人生當爲大英雄大豪傑豪傑云者轉移風俗之謂英雄云者創造時勢之謂辛亥春粵省革命失敗川路風潮繼起淵知事機已熟乃集合同志會議於本校農事試驗場及舊貢院之奎星樓九月朔陝西繼武昌起義淵編學校學生爲

巡緝隊維持秩序光復西安旋應糧餉都督馬青山之聘任參謀其和既奠出爲岐山縣知事調實業司長代表工商會議赴京建白尤多當道請獎中央授文虎勳章政事堂以道尹存記二次革命失敗後袁世凱擅改約法解散國會淵時爲督署科長每與人言輒擊案太息或酒後微醺恆作將來必爲徐錫麟第二之驚人語嗣奉調充延長石油廠經理洪憲改元全國鼎沸淵遂糾合同志密設機關擬於省垣發難外縣從而響應當時陝軍之外縣者均已多數贊同而城內警備隊亦經運動熟成躍躍欲動王炳耀者淵舊相識之壯士也有舊部健兒千餘願效死力相助舉事遂與約期新正某日夜舉火爲號火未熾而屋遽頽壞當道戒備益嚴未幾而同志南南軒被逮繼復定於元宵再舉而同志張子宜又被逮省垣風聲日緊淵乃往臨潼與同志黨人某某接洽另作省外發難之計未及期而灶友梅李馥齋被捕之耗又至淵遂由三原赴延長中途爲偵騎所得被係南行至甘泉南之甄家灣遇害年三十九

方象堃

方象堃字厚菴藍田人幼讀書鄉塾即佼佼不羣九歲失怙母撫孀居茹苦資之卒業十七歲卽爲小學教師藉館穀以供菽水顧猶不廢學文思因之大進弱冠赴縣童子

試得冠軍明年入邑庠獲交一時英俊知學問自有其真不僅在文字科名之末乃遊牛
藍川先生之門講求程朱之學敦品礪行深研經術藍川常曰吾道東矣象堃居藍之東
鄉平居教授學徒甚多所成就又對世俗婚喪諸禮多所矯正故藍川許之也辛亥之役
入曹印俟軍幕謀猷籌劃獨得大體遇事不稍瞻徇軍中憚之民元出爲甘泉縣臨真縣
丞地居山僻所在多游民無賴數謀蠹動象堃集衆丞署前諭以大義言詞慷慨聲淚俱
下衆感悟羅拜各歸奉安生業縣民至今稱之後助同學楊仁天督修涇陽龍洞渠手胼
足胝晝夜弗倦三年奉委查禁延綏畧粟旋調臨潼關山縣丞以母老辭四年承藍川先
生命主講本邑宋四獻祠五年任本縣小學教員督制變作象堃心雖非暴夫之所爲顧
於民瘼亦持消極態度乃未幾而禍作矣初象堃在軍時敢死軍有犯法當死者象堃鄉
人也乃外示薄慚而陰爲之解免其人不知銜恨轉深有吳鵬者曾問字於象堃旣權黨
獄微有所牽銜象堃者適爲帝黨偵探乃思藉此報復遂陽善而陰陷之象堃竟被逮二
月二十一日遇害於西安北關事先鄉人皆有風聞相識有以避地勸者象堃自以內省
不疚弗聽竟及於難年四十三子二吉福吉修

郭子餘

郭子餘號仲樞沔縣人前清附生民國二年曾任省垣財政廳科員爲人慷慨好義四年帝制問題發生袁黨諸人假造民意聯名勸進子餘奔走涇原咸醴之間廣招同志約於五年正月十九日晚在省起義爲陸軍模範連某排長所陷二十七日在西華門被捕二月十五日與同志十七人就義於市曹

吳鵬

吳鵬字鯤化淳化人任俠使氣好擊劍飲酒悲歌慷慨有荆軻高漸離之風辛亥時嘗充敢死軍隊長隨曹印侯馳驅東西兩戰場奮勇直前當者披靡軍中咸以勇士呼之民國成立放浪雲遊箬笠道服垂髯至胸人皆以方外目之陸建章督陝搜殺黨人鵬與秦中志士密謀驅逐以定三輔以緹騎四佈網繳甚密爲值者所物色四年二月十五日同王紹文等十餘人就義西安北關西火巷年三十六

陳德卿

陳德卿河南某縣人辛亥以還歷任軍職民四帝制事起德卿隨惠有光在北山密聯同志糾緝討袁軍事敗爲陸建章部所殺年三十五

齊以禮

齊以禮字子明長安人少讀書有大志辛亥光復投筆從軍屢著戰績後入保定軍官學校第一期畢業歸任軍職袁氏盜國誓不與共密聯同志組軍討袁旋以謀洩爲陸建章所殺年三十四

趙貞吉

趙貞吉臨潼人保定軍官學校第一期畢業有勇多謀歷充軍職洪憲改元貞吉聯合同志密謀響應渭北各討袁軍事洩爲陸建章所殺年三十五

姚南薰

姚南薰字夢堂商縣人保定軍官學校第一期畢業回陝後與西北諸同志祕密組織討袁軍謀洩爲陝督陸建章所逮酷刑拷訊抗言不屈遂被害年三十三

李桂森

李桂森字馥齋興平人民初肄業第三中學丙辰帝制發生後即在校結納同志密謀反搆舉事討袁爲當道所覺被捕嚴刑鞫訊辱罵不屈五年二月被害於省垣北闕外年二十七子通林

袁守禮

袁守禮字清軒長安人素性慷慨有胆略善辯論辛亥秦軍起義從敢死軍任參謀大軍所至常當衆演說革命大義宣傳民衆言詞剴切陸建章督陝退職家居四年帝制發生守禮與同志王紹文等密謀討袁事洩被執就義於省北關外

焦林

焦林臨潼人前清綠營將弁出身辛亥光復時隨民軍起義久歷戰陣所向有功陸建章督陝助袁世凱謀帝制密制輿論捕殺黨人林與同志東西奔走密結團體刻期大舉討袁謀洩被捕死於西安年六十一子二胡混慶敏

杜守信

杜守信字友梅興平人初肄業本縣高等小學卽有志改革師友咸器重之辛亥光復時投袂從軍躬預東西各路戰役民元後入保定軍官學校肄業帝制變作守信憤恨欲絕遂棄學歸陝與張深如南南軒王紹文等祕密會議力謀討袁親赴省西各縣聯絡豪俊約在興平東關外復幽園剋日集合舉事未及期而謀洩與諸同志相繼被逮當道嚴刑拷鞫毅然承認不諱與南南軒諸人同日在省北關遇害年二十三子宗華

南南軒

南南軒名風薰興平人本省高等學堂畢業清末與張深如組織興平報以提倡民權及言論自由爲宗旨辛亥光復嘗與有力民元既建歷任陝政府交通司科長延長縣公署科長漢南道尹公署會計各職嗣去官經營工商業往來臨渭二華各地廣交豪俊以備緩急民四帝制發生南軒密聯各地黨人進行討袁組織旣而滇黔護國軍興秦中諸黨人紛起響應南軒與張深如王紹文等密謀運動省垣軍隊尅日舉事爲渭北民軍聲援謀洩在家被捕二月十五日就義於北關西火巷年三十七子二明誥明誼

南風薰

南風薰乾縣人本縣高等小學畢業二次革命以來常隨吳希真奔走討袁工作四年在西安被捕遇害年二十五子北京

胡德明

胡德明字子新乾縣人少讀書毅然有憂天下之志家清貧以舌耕爲業父炳章早歿母氏相繼去世子然一身無所累東脩足以自給更得專心致志考求歷史治亂興衰之迹民國二年入平民會與當時志士交遊得聞現今大勢誓以身許國奔走縣境開導鄉人不少衰五年正月密圖起義討袁被逮解省二月十五日及於難年三十八

楊景震

楊景震字知之白水人畢業測量學校服務測量局嗣又任警廳技士四年冬帝制起共和危景震奔走於渭河南北運動同志謀起兵討袁五年二月赴渭南信義鎮設立機關爲北洋陸軍覺察被逮即時殉難

孟述孔

孟述孔字恭魯中部人沉默寡言面黃而饒動氣曾在本縣統帶巡警隊剿匪頗著功績嗣解職家居屏絕世務民四郭希仁先生講學華山之麓述孔往歸之好學深思過於儕輩同學甚尊敬之五年春棄學從曹俊夫郭方剛於戎間至安邊力戰陣亡

張鎮方

張鎮方乾縣六陌鎮人初入五峯畜牧場爲人牧羊目不識丁聞人談國事輒靜聽不忍去民四加入中華革命黨從事密祕運動結合千餘人五年春事洩備受極刑大罵不屈而死道旁觀者莫不爲之動容

王泮坪

王泮坪華陰人家世業農父海伯早故母李氏教子苦讀由本縣農業學校畢業升

入同州第二師範賦性豪宕好結交因投身民黨從事革命事業棄學奔走于四方帝制既起渭北樹獨立之旗五年春隨衆北上至綏德力戰陣亡

陳宗舜

陳宗舜湖北鄖西人來陝八年偽居醴泉五峯山麓以其地多湖北同鄉也夙業儒以教讀爲事八載未歸四年冬贊袁氏盜國投身民黨聯絡四方同志爲地方官所注意五年春在醴泉被逮解省死親屬未詳

王亞黎

王亞黎名兆霖別號東一興平人美容儀有鶴立雞羣之概學于長安三育高等小學校王烈士紹文所創立者也卒業後富於國家思想且長繪事洪憲變作亞黎與同學輩從事運動起兵討袁五年春同黨事敗興平縣知事陶松年索之急亞黎與車子良等出奔子良道死亞黎亦以路梗不得前乃歸舉兵於縣南之上村敗死時年二十先是烈士懷死志甚堅常作絕命詩藏襟底有死化杜鵑飛宇內聲聲啼轉共和魂之句其志亦可哀已

張肇基

張肇基字樂成南鄭人保定軍官學校第一期畢業辛亥光復嘗隨孫總理任參謀二次革命任黃克強先生團長從攻南京失敗後走滬旋奉總理命回陝運動西北同志組織討袁軍三年四月爲陸建章所部駐漢中某團所害年二十七

章雨蒼

章雨蒼號那夫安徽桐城人幼負豪氣性聰穎工書下筆輒千言留學日本法政大學六年又受業章太炎先生之門於是造詣益深學識冠絕儕輩爲同盟會重要會員與吳樾徐錫麟熊成基等交最深武昌起義雨蒼至安慶倡言獨立共和成會署寧國縣知事所至有聲二次革命失敗後避地來陝充陝南鎮守使署軍法官逾年第二旅取消解職寓居西安其年冬帝制問題起雨蒼糾合同志密謀討袁陽謀陝南鎮守使署參謀一職以自掩五年春事覺被逮與吳鵬等同日遇難年三十二其父竹坡在原籍聞信曰吾有此子死而何憾惟孤正首邱日夜固望其喪歸也

孫岳

孫岳字禹行河北高陽人故明孫文正公承宗七世孫也文正公當明末清兵入關時以兵部尙書退職家居躬率親族鄉里禦敵殉難事具明史岳生而颖異讀書見解超

人性豪俠力學不倦憤滿清政府昏庸誤國誓志興復且以國仇家仇集於一身革命思想激昂逾恒年二十餘乃入北洋武備學堂肄習軍事密結保定各校青年志士成立同學茶話會互聯感情藉以宣傳革命思想研討進行方法當時在會者同校有張柱文耀劉廷森將弁學堂有李廷玉李飛鵬官立中學有吳樾張榕王則雍京旗第一鎮有教練官吳祿貞柏叔達諸人合力倡導由是北方革命志士愈集愈衆光緒三十一年清廷迫於潮流所趨乃恩遷就環境派遣五大臣出國考察西洋各國憲政爲改革政體之借鏡五大臣者滿尙書載澤紹英端方漢尙書戴鴻慈徐世昌也臣念清廷若能實行立憲則彼君主政權益爲鞏固漢族將無復興之望急召集各同志開會密謀阻撓顧人微力寡其道莫由乃決議用暗殺手段會員吳樾挺身願行岳與張榕爲助遂相偕入都寓某旅館中僱悉五大臣於七月二十六日起程即仿製各大臣侍從之衣服使樾喬裝懷炸彈於是日雜入衆中登五人所乘之專車方欲進前投擲而鎗身忽生震動炸彈被撞爆發載澤紹英皆受微傷吳即身殉岳與張榕因距離較遠幸未罹難事雖不成而清廷因此一擊震懾異常各地革命氣氛亦日益昌熾矣岳旋於武備學堂畢業派入北洋陸軍第三鎮見習未幾擢升參謀逾年復入北洋軍官大學爲學員於保定組織同盟會以北關

寓舍爲會址與會同志有湖南劉建藩陝西錢鼎四川敖象武及留日學生歸國者河南楊增蔚江西李烈鈞雲南葉荃諸人於是保定一地成爲北方革命中心清宣統二年岳畢業北洋軍官學堂仍回第三鎮任二等參謀時廢昌爲滿清陸軍部尙書素知岳爲革命黨授意第三鎮統制曹琨監視其行動逾年辛亥武昌革命軍起時岳已升任第三鎮管帶率部駐防察綏密與同志蔣作賓劉汝賢等謀欲使陸軍部調已與劉廷森帶兵入關藉以策應武漢爲廢昌所覺撤職乃至第六鎮統制吳祿頤遠哲某策勦因吳係保定舊同志也時袁世凱已任滿清內閣總理偵知吳有異謀乃佯命吳爲山西巡撫陰遣人刺殺之於石家庄並嚴令緝岳乃由秦皇島轉赴上海至南京見孫中山及黃克強兩先生孫時已就任臨時大總統素知岳名極爲倚重江北徐寶山蔣雁行皆揭旗獨立徐據揚州與蔣不相能而張勳在徐州與革命軍抗時謀南下清江一帶岌岌可危岳爲居間疏通並在蔣處開一聯席會議泯除猜嫌各軍因舉岳爲總司令統率各軍北與張勳相持南京遂無北顧之憂孫大總統旋任以第十九師師長移駐宿遷民國二年癸丑宋教仁被刺案發生黃克強時爲南京留守發動二次革命袁世凱派馮國璋張勳等合兵來攻隔江而戰克強赴滬岳以警備司令兼代留守職務指揮各軍作戰旋因各軍內部複

雜實力懸殊敗退淞滬復與陳其美李烈鈞諸同志據上海製造局與敵搏戰又敗遂東渡日本與章炳麟諸人以文化報紙鼓勵革命同人伺國內局勢再圖大舉民國三年復由大連化裝歸國經天津至保定欲結舊同志舉兵討袁因袁防範極嚴於各地緝之甚急乃入秦潛跡華山朝元洞年餘與西北革命同志續西峯郭希仁劉藹如胡景翼鄧寶珊諸人深相結納謀於西北策動軍事袁之爪牙陝督陸建章承袁意旨嚴緝革命黨人因復亡走日本及世凱死乃歸旋任保定軍事教育團團長造就革命軍事青年後進甚衆中經靖國直皖直奉各戰役終以傾向南方黨人未獲重用曹锟賄選成以舊屬稍遷某師師長駐北京民十三年直奉二次戰起因與馮煥章胡景翼密約舉義首都因曹锟驅吳佩孚成立國民革命軍任國民軍第三軍軍長駐兵天津北京河南各地與馮胡合電請迎孫總理北上主持國是民十四年任陝西軍務督辦在陝肅清反革命勢力安定關中是年冬復率部東出於天津馬廠一帶戰敗奉軍李景林張宗昌各軍旋任直隸軍務督辦民十五年國民二軍敗於豫吳佩孚復與奉軍張作合力共攻霖國民軍岳乃與國民一軍退守南口綏遠一帶旋馮玉祥于右任相偕自蘇聯歸會於包頭共商援解西安之圍以與南方革命軍相呼應誓師五原剋日南下而岳以連年勞瘁致疾暫留五原

養疴民十七年聞國民政府奠都南京出師北伐霍然欣喜卽經由榆林山西轉至南京贊助中樞蔣譚諸公規劃大計任國民政府委員陸軍上將因宿疾復發赴上海就醫是年五月二十七日疾革歿於滬濱壽五十一國民政府明令褒卹國葬於北平西山溫泉子伯琦法國南錫大學政治經濟系畢業

曹世英

曹世英字俊夫白水人年十七入邑庠入三原宏道學堂畢業與同人組織學生自治會倡言革新被開除并勿幕宋相臣介入同盟會辛亥九月陝軍起義世英糾衆攻克縣城手刃清吏響應省垣各縣聞風同時繼起完成光復之功民國既建留學東瀛加入中華革命黨孫總理以陝事委任之約集同志歸里於民五首建討袁軍與郭堅高峻等攻略陝北復南下會合胡景翼部大破陸建章之師逐建章去陝編所部爲騎兵一營駐耀縣爲陳樹藩所忌世英亦以樹藩附北洋軍閥欲驅逐之乃與胡景翼合謀會胡部張義安發難三原世英卽率部星夜往援旣而景翼亦至乃共建靖國軍任左翼作戰屢攻省城不克退屯高陵于總司令統一軍政任爲第三路司令嘗與樹藩軍及北洋軍戰於關山交口各地數年具詳戰守紀要中後與第四路偕出關改編所部爲陝軍第二混成

旅駐防禹縣十三年冬直奉二次戰起世英鑾於軍閥混戰大傷國脈乃解兵遊歷南北各地二十年返陝杜門養疴不與世通二十八年被選省臨參會議時初以疾辭繼思抗戰大時代革命黨員革命軍人未敢自逸乃力疾從公參加會議所提議案皆能切中時弊故第二屆臨參會改組被選蟬聯三十三年一月疾甚卒於家年五十七世英關達平易能得人而短於軍事材以入黨最早故黨人多歸之治軍二十年雖失敗而陝人之言黨事者自井勿幕宋相臣死皆以世英爲領袖云

郭 堅

郭堅字方剛蒲城人少有大志豪俠自負膽識過人弱冠時嘗聞人談排滿革命遽起曰此正吾人之責也乃廣結納豪傑密謀舉事辛亥秋九月西安義軍起堅與澄城耿直招合健兒數百人光復同州響應省垣號馮翊軍嘗率部馳援三淳敗升允兵於通神溝乾醴後方得以無恐民四袁世凱謀帝制堅與曹世英高峻諸人首樹護國軍旗遙應西南攻克陝北十餘縣合軍南下遂陸建章奠定陝局陳樹藩督陝任爲陝西警備軍統領六年復辟事起樹藩命堅率餘部渡河假道山西北伐敗於晉南遂免其職以謝晉人指堅爲叛兵堅以樹藩之賣已也由是與樹藩交惡六年北洋段系諸將組督軍團脅散

國會樹藩預焉於是堅與耿直張義安曹世英高峻諸人均先後發難共建靖國軍以討樹藩與樹藩軍及鎮嵩軍戰數月不利會于右仁回陝任靖國軍總司令改編各軍以堅爲第一路司令並請於軍政府授陸軍少將駐軍鳳翔岐山間及奉軍西來岐山失守堅以血戰連年強將多殞力竭勢蹙力與奉軍局部議和十年夏直軍入關陳樹藩敗退漢中閻相文繼爲陝督時靖國軍各部皆受編制堅被邀入省爲馮玉祥所殺年三十二堅爲人跌宕不羈有雄才大略遇人悅爽不拘禮法其幕中尤多才傑士故其在靖國軍中人數稱最多聲勢亦最大顧部下多來自鄉里友朋及隣縣豪俠以意氣相合不受軍營約束人自爲戰或掘藏攫取民間錢物牲畜不自檢束堅名遂爲所累故張瑞璣之來陝劃界也指堅部爲匪軍語在本編概述中堅於軍事外尤善書法文辭皆放逸如其人其在西路樹藩軍攻之急嘗函第三路曹世英求援曰陳賊打我你賊不管我賊若死你賊難免至今人猶傳爲趣談亦可見其爲人矣極堅之才可以縱橫一世而不免爲人所算論者猶或惜之一子士奇

樊鍾秀

樊鍾秀字醒民河南寶豐人讀書力農少有大志民二年豫督張鎮芳啣袁世凱命

屠殺黨人鍾秀憤欲討之爲父所尼乃變賣田產與妻子至陝北之宜君佃田耕作陝北游匪時爲民害鍾秀集健壯爲團練匪不敢犯鄉民賴之其友李肖庭奉孫總理命來陝與鍾秀遇於黃龍山縱談革命大計於是始稍稍招人徒治器械作馳驅國事想矣陝督陸建章屢使人以軍職餌之均不受及陸去陳樹藩代爲督軍始受編爲一營靖國軍起三原鍾秀隨樹藩將曾繼賢往攻之不勝退駐涇陽常密約曹世英部欲反正爲繼賢所禁不果及回軍駐省南又爲張義安所敗因通款焉旋率部由藍田入商雒休養待時于總司令委爲靖國軍第二路司令嗣用黨人惠又光言出略潼關得而復失轉戰盩厔與樹藩軍及鎮嵩軍對壘者年餘直軍入關受編赴豫十二年陳炯明據廣州背叛總理鍾秀受命爲豫討賊軍隨援軍入粵戰敗炯明軍於石排簸箕村沿東江追擊收復博羅增城石龍各縣地十三年奉令北伐間關湘贛各邊境無日不與敵遇大小百餘戰當之者無不披靡十四年春至豫助胡景翼破慘玉琨於豫西豫局定復奉總理命改稱建國豫軍分駐臨汝寶豐間剿平當地匪患十五年以國民二軍之敗退駐京漢路西吳佩孚使馬文德徐壽椿寇英傑陳文釗等分道圍逼皆被挫退克復南陽各縣是年七月蔣總司令率師北伐飭令以所部會武漢繞出武勝關斷吳歸路吳幾成擒月餘而武漢下直軍

消滅鍾秀與有勞焉十九年駐許昌以疾卒於軍中年四十五子某

高峻

高峻字峯五白水人生而偉岸有力精技擊有胆識辛亥九月聞西安起義卽與同志多人揭義幟於白水擁同縣曹俊夫爲首領於重九夜攻克縣城殺縣令響應省垣有張海清者會黨也驕縱跋扈多行不義以其衆刦俊夫峻聞之急率親隨數人突重圍脫俊夫於厄俊夫旋投井岳秀部膺副貳職峻則從富平焦子靜爲護衛長隨軍參戰東西往往出奇制勝獻捷輶轔子靜深器重之常曰峯五智略出羣倫異日必爲三軍將帥民國旣建子靜釋兵任國會議員峻歸任本縣潔衛團團總地方賴以寧謐民三陸建章督陝誅鋤黨人革命鉅子如李岐山樊靈山諸人皆爲陸所嫉視常避居白水住於峻家恒數月不去峻亦坦然居之無所顧忌岐山歎曰峯五肝胆照人今之朱家郭解也民四袁世凱叛跡愈彰民黨往來白水約峻舉事者日多以槍少未及發適陸建章_派兵一連駐防白水峻曰時至矣卽分佈其衆於街巷各要隘伺其鞍馬甫卸突出擊之悉收其械遂聯合郭堅耿直及俊夫諸人張護國軍幟入陝北連拔十餘縣五年夏回師出同官耀縣與胡景翼等共逐陸建章去陝陳樹藩繼爲陝督更編諸軍疑峻矯武難制健隸李天佐

團爲團副人多爲之不平峻委蛇不與爭李旋請於陳另編騎兵團使峻率之駐白水六年冬樹藩附安福系毀法禍國峻以所部三百人卽白水樹護法軍職聲討之樹藩悉出精銳數千來攻峻從容應戰敵不得逞繼思衆寡懸絕外無援應乃佯退出城爲游擊之兵會耿直劉錫麐等發難西安樹藩軍退援省城峻將步騎南下與樹藩別部周旋於三原富平間未幾耿劉軍敗偕郭堅自鳳翔東來峻與合軍復攻蒲白而曹世英胡景翼亦於是時共建靖國軍於三原峻遂與曹胡及郭堅各部分道渡渭直逼長安樹藩急乞鎮嵩軍來援諸軍久攻不下暫退河北翌年于右任先生奉命回陝爲陝西靖國軍總司令改任峻爲第五路司令與諸友軍懸抗直奉豫晉各省兵閥時五年時陝西靖國軍共分六路三四六各路皆駐涇原富平高陵各縣兵力較厚防地銜接獨峻第五路遠在白澄孤子寡助東防晉軍南禦陳部獨力支撑卒保危局迨直軍入陝靖國軍解散三四路改編出關峻亦改編爲陝軍第二混成旅暫駐原防後以與劉鎮華積不相能所部被逼乃棄其軍隻身赴滻謁孫總理受任爲西北討逆總指揮十五年奉命歸集舊部襲取澄邵解西安涇原之圍于右任膺國民二三軍聯軍駐陝總司令任峻爲獨立第二師師長尋改防河軍司令以部勒甚疎奉令裁遣乃辭職歸里當靖國軍時峻以彈丸兩邑之地

外抗強敵軍食軍需俱感拮据而於優禮英賢網羅人才則不惜厚幣以致之四方名流遠道賁臨折節從諫喜聞善言治兵講武之外兼及慈善救濟社會建設修築白蒲大道創建城南石橋人皆稱爲五善人因其於兄弟行居五也晚歲躬耕隴畝未嘗出以干人時論尤服其淡泊于右任先生贊之日起義時真志士歸田時真農夫動心忍性以保晚節真英雄也二十五年一月疾卒於家年五十二子三女一均幼

盧 占 魁

盧占魁字耀辰察哈爾人清末應募入新軍辛亥革命軍起民黨同志弓富魁據大同因往投焉弓遇之厚使常在左右日與諸黨人接革命思想漸陶遂深二次革命失敗山右同志出亡各省占魁亦歸里及洪憲改元各省護國軍興占魁號召塞外健兒萬餘人縱橫察綏間時與袁世凱軍戰所部皆騎兵善馬上射擊飄忽無定袁軍苦之派員宣撫許以高爵均不受及世凱死始歸綏遠都統蔣雁行改編爲騎兵統領駐防五原縣屬之烏蘭腦包民六蔣氏去職北洋第一師師長蔡成勳繼任都統稍稍裁抑之占魁與抗數戰不勝乃率部南行至托克托之黃河渡口踏冰而過時方九月河冰尙未堅也旋入陝境陝北同志惠又光鄭思誠等均使人與之聯絡轉而西進經甘肅環縣與防軍激戰

兩晝夜折而東抵中部值靖國軍起三原遂南下駐耀縣于右任總戎政編爲靖國軍第六路部將張威武耀威諸人均善戰河南張晉三山西李明軒山東郭叔蕃張少宸等俱在戎幕弓富魁亦由平津來陝推爲總指揮率所部與第三四兩路共同作戰步騎聯合屢著勳績九年後隨滇軍葉荃西行至廣元部衆潰散十二年六月偕同志武勉之由滻赴粵謁孫總理於廣州奉諭赴奉天晤張作霖得張之允許率幹部三百人往蒙邊招集察綏舊部道經洮南府鎮守使慤朝璽以盧係民黨忌之陽爲設宴歡迎卽席殺之年三十八子二繼隆繼盛

王 玊

王玘字寶珊富平人少孤貧嘗爲人傭樸誠忠於事主者爭致之事母孝年二十餘尙無妻室然性沈毅常有飛騰之想民四帝制發生耿直郭堅曹世英等起兵白水號護國軍招之入伍以勇敢善戰常爲前鋒事定往陝西警備軍第五營營長駐防鳳翔民六同耿直發難西安討陳樹藩實爲靖國軍首事之役轉戰盪郿岐山醴泉富平大荔各縣民七駐防乾縣樹藩使其將白弋人張飛生先後率精銳十餘營圍攻之相持六月餘以外援絕乃率所部數百人由乾城退出歸三原于總司令嘉其功編其軍爲靖國軍第七

路任珏爲司令十四年任國民二軍第三師補充團長作戰山東及國民二軍敗於豫遂歸田里數年以疾卒年五十子二守禮守信

惠思溫

惠思溫字又光清潤人性沈毅有大志卒業省立師範學堂憤清季政治腐敗國士目蹙密聯同人從事革命辛亥民軍起西安卽在陝北聚衆響應共和既建釋兵就學東渡扶桑研究政治及社會科學因晤孫總理加入中華革命黨四年回國與陝中諸同志合謀討袁世凱往來各地舌敝唇焦靖國軍時常自領一軍爲游擊司令十三年任陝北國民軍前敵總指揮部楊虎城參謀長兼第一游擊支隊司令十六年國民軍二三聯軍駐陝總司令部成立任政治部部長中國國民黨陝西第一次全省代表大會推選爲監察委員旋奉國民政府任命爲陝西省政府委員隨于總司令東出關考察東南各省政治至上海因勞染疾卒於上海醫院年四十二思溫體貌羸弱喜談兵篤信三民主義僚屬將士皆稱之曰惠先生治軍十餘年雖無赫赫之戰功而終始革命屢經顛險不變其所守陝北之言革命者實以思溫爲最堅卓云子某北京美術學校畢業

王陸一名天士以字行三原人父仁山服官四川青神縣母氏羅爲江西望族生陸一於青神任內秉蜀中山川之氣五歲入塾聰穎異常兒八九歲卽能詩吐辭不凡十四歲回陝寄居西安四川會館日或一食苦學不輟民國元年考入西北大學法科年餘學校解散貧不能續業因就三育中學教員憤袁世凱破壞共和與長安王紹文等共謀首義事洩紹文遇害陸一變服亡去及袁死復歸是時父母均年老奉養無資先後充任通俗教育講演團暨省立圖書館各職員博覽藏書舉凡經史義理以及各類文體靡不通貫時方十九歲也靖國軍興乃返三原初任總部交際處職員以奉題圖卷爲于總司令右任所獎識擢爲機要祕書軍中文電露佈一以委之草書飛檄往往不移晷刻而就當時官佐僅日給制錢四百爲生活費而不以爲苦以爲革命者當如是也及靖國軍解體適丁內外艱乃墨縗護侍于總司令轉戰武扶岐鳳間繞道隴南入蜀問關抵滻服勤國民黨上海執行部並佐于創辦上海大學致力文化運動藉以造就革命青年其後奉派回陝任西安成德中學教員與同志發揚黨務十三年春赴滬仍執教於上大是年秋銜轅治理文牘由黨選派赴蘇聯留學中山大學以文學溝通社會科學凡蘇聯建國設計

與執行方法靡不深切考查以爲建國借鏡十五年冬復從于先生經歷外蒙各地至綏西之包頭會同國民一軍總司令馮玉祥誓師五原南下解西安之圍任國民聯軍駐陝總司令部辦公廳主任響應北伐會師中原隨至武漢共組臨時國民政府旋回陝講學於省立第一職業學校十七年春奉召赴南京籌設審計院受任中央黨部祕書處書記長總理奉安時中央徵製哀詞應徵者凡數百人獨陸一與胡展堂先生膺選胡先生亦終棄所作推重陸一之文遂獲定譜焉尋辭職僦居上海乘暇箋注右任詩存凡靖國軍軼事文獻皆在箋中旋應安徽大學之聘任文學院院長二十年國民黨第四屆全國代表大會開會當選候補執行委員赴粵奔走和平返京後兼任中央民衆運動指導委員會副主任委員代理會務二十二年冬復與張溥泉馬星樵陳雄夫三先生奉派赴粵代致中央官慰意旨時號和平四使旋奉命設立計政學院兼任監察院祕書長二十四年當選第五屆中央執行委員暨中央政治會議委員兼任民訓部副部長其他各兼職如故抗戰事起常以軍委會軍風紀巡察團委員來往第一第五第六各戰區審視軍防整飭風紀調協兵民連年深駐軍區出入生死軍民無不翕然懷服三十年奉國民政府特派爲晉陝監察使離渝之日即以此去耐勞受苦之決心告勉諸同志並提出機關學校

化家庭化軍事化之口號就任二年兩省監察權巍然樹立案無留牘整飭莊嚴而退食
寄居婦家車馬絕跡門可羅雀有霜嚴冰清之譽更奉于院長付屬代理陝西革命先烈
褒卹委員會主任委員編輯西北革命史徵自辛亥光復之役及護國靖國首都革命與
西安圍城諸役各事實及各先烈傳略數十萬餘言皆具初稿忽染疾沉綿以民國三十
二年十月一日卒年四十七陸一天性和易嫋於辭令自幼信仰基督教精熟教義竭誠
體行處人接物畢生無忤或爲人所凌轢亦惟巽受而已終不與校也致力革命數十年
不植私財歿後蕭條無寸椽一壠之覆當局公葬於三原斗口村農場遺一女芷來方七
歲

劉守中

劉守中字允丞富平人父德智字仲貞受業於三原賀復齋先生母氏韓生子五人
守中次居三蚤歲讀書清麗爲復齋先生再傳弟子貌清癯而性剛毅儀表謹嚴器宇淵
深識者早以遠大計之秦中士風導源關學大抵崇尚氣節敦品重行然或拘泥舊聞多
爲修身潔己之行而闇於濟世匡時之略守中資稟既高又復好學不倦獨能得關學之
精髓擴而充之蓄志澄清辛亥光復時參預戎幕盡力殊多共和既奠與胡景翼張義安

偕往北京游歷燕趙豪傑之士多所結納民國五年袁世凱盜國改元洪憲陝督陸建章爲其爪牙日以殘殺黨人爲事守中與胡景翼鄧寶珊董振五諸人陽設大有公司於三原爲祕密機關共謀討袁渭北民黨風起雲從共助胡景翼破陸建章之師於富平逐建章離陝袁世凱亦尋死共和政體得以不覆六年陳樹藩附黎福系加入督軍團解散國會東南各省興師護法在陝黨人亦紛起討陳胡景翼以實力未充躊躇未卽決守中因勸張義安鄧寶珊董振五等發難於三原樹靖國軍幟於渭北推胡景翼爲總司令與樹藩軍戰數月是時陝軍諸部漫無統屬此進彼却作戰不能一致張義安又陣亡而于右任自滻奉孫總理命歸陝乃與諸黨人共推之爲靖國軍總司令胡景翼改任第四路司令旋赴前敵撫降被拘入西安各軍大震岳維峻繼任司令守中爲參謀激勵將士力支危局與敵相持五年之久議者咸謂劉參謀之力居多十年胡景翼率部出關守中由山西輾轉南行謁孫總理於滬有所請示旋奉命同丁惟汾王法勤北赴京津一帶祕密運動十三年首都革命之役守中與有力焉國民軍旣因曹锟走吳佩孚段祺瑞起而組織執政府守中隨河南督辦胡景翼至開封居中策劃欲別有所建樹不幸總理逝世胡景翼亦相繼歿岳維峻繼任河南軍務督辦而吳佩孚近在豫鄂邊境陰謀再起守中建

議欲回豫西新勝之師一鼓而下武漢維峻不聽出師攻魯卒爲降將田維勤等所賣兵潰靖函守中隨衆渡河爲晉軍羈繫留居運城者半年十七年赴南京出席國民黨第二屆中央全體會議被選中央執行委員乘暇徧遊蘇杭山水讀書吳縣網師園精研小學及中外史地尤喜談兵酷嗜孫子十三篇多能發其奧義既復北遊晉讀書太谷鳳山醉泉寺擬久居焉而九一八瀋陽之變作因復與馮玉祥同赴南京出席第四屆第一次中央全體會議共赴國難被選爲國民政府委員廿一年奉派調查邊區實業兩入蒙古徧歷各盟旗著有察綏蒙旗實業調查記此外對於國防視察所得者另詳載於日記中廿四年便道歸陝旋被命晉陝監察使辭不就與張繼倡議設立陝西革命先烈崇祀撫卹委員會及先烈華麓祠墓造林董事會廿五年第五屆中央全體大會開會被推爲中央政治會議委員二十六年復南遊讀書無錫之梅園因見國事日急乃赴上海研求國際大勢推想中日開戰當在明春而蘆溝橋事變果於是年七月七日爆發遂取道南京武漢回陝二十七年冒險視察黃河沿線慰問台兒莊抗戰將士及聞日寇佔我廣州奪我武漢國民政府播遷重慶即赴渝向中樞建議直陳國策得失倡言關中不可輕棄謂不守河東則關中不固無關中不惟無兵可征亦且無餉可籌四川雖號天府如精金外露

不可恃也是時荆襄南陽同遭敵鋒乃與馮玉祥同乘輪船調查江防往來荆宜三峽間聞豫鄂大捷復返重慶繼至城都遊青城登峨嵋旋回陝寓居三原每有拊髀之歎時招常所與遊者國志士暨豪俠少年數十輩引犬策騎較獵原野間遇山足水涯險要皆誌之備有萬一得爲國家盡死力時年已六十關懷國事之餘猶日孜孜讀書不息嘗約李亮工先生至華麓學社講說文要旨與英人喬惠亭研討歐洲史地索求兩次歐戰之所由來同時著有續漢書郡國志釋略補註足爲後學津逮三十年十月因張溥泉有重慶之行由三原赴西安爲之餞別又往華下一展諸仁友之墓順道赴潼關視察河防工事歸而臥病竟以不起年六十一平昔愛才重士赤誠勤人得英特磊落之士往往數語激發能令振奮拔俗蔚爲國器於政治主張一兵工農蓋合顏習齋兵農合一之說與中山先生農工政策之精神而一之者也配氏王子二奉學上校團長奉衡中央軍事政治學校畢業

耿 直

耿直字端人澄城人聰敏有果斷童時與隣兒游戲累石作營壘折草木爲兵旗編羣兒爲數隊佈置行列身居將帥發號施令儼然軍旅見之者皆知其器不凡父元耀以

善騎射中式光緒某科武舉常教以騎射法卽能領悟十四歲肄業本縣高小學堂聰慧倍常兒顧不甚注意科學獨喜習體操師友多規勸之直曰人生當效班定遠立功異域豈可斤斤從事筆墨間乎清末各縣設巡警敎練所直從隸焉時年甫十六畢業後受任辦地方警察晝夜督巡城市肅然盜賊歛跡時總理同盟會傳播全國直嘗潛購革命書報讀之至種族大義輒爲之墮淚旣聞廣州之役失敗益發奮恨不能與之俱辛亥武昌首義陝西繼起直從郭堅募健兒千餘人號馮翊軍響應省垣兵士皆持土槍戈矛與清軍戰共利告成改編所部爲營隸陳樹藩所統之陸軍第六混成旅直任連長旋入同州軍官敎導營肄業後隨樹藩堵剿白狼於醴泉常爲前驅作戰以功洩升步兵上校陸建章督陝陳部調防漢中直知帝制將發生欲另有作爲遂辭職漫遊秦晉之間聯絡民黨諸同志及渭北豪俠潛購軍械運動各陝籍軍隊謀抗陸陸聞之電請中央懸賞通緝並派隊捕之遭遇數十次直均跳免而捕者反多傷亡後以流彈傷臂始匿於河東及洪憲改元西南護國軍興陳旅調駐渭北陸欲藉事創其兵權直聞之復歸陝說郭堅欲共起兵響應西南郭言於陳陳亦首肯直遂召集王珏李奪張鐸簡大猷党玉琨劉福田李龍飛陳發榮等諸同志二百餘人屯澄白洛三縣交界之土基鎮並聯合白水曹世英高峻

諸人宣布獨立使人促陳一致討袁陳猶逗留蒲城意存觀望陸復加陳以渭北剿匪總司令名義使剿直等陳派其連長胡景翼駐白水直與曹高突入城收其軍械胡與曹計歸還其械俾作佯敗狀退回蒲城約諸人尾隨其後襲取蒲城作根據地詎爲陳所覺胡至城下不許徑入直與曹高等已率隊至北關外陳卽命胡回擊之乃復退回原地陸忌陳之心少解陳因得以保有其軍直遂與郭曹高等千餘人入陝北攻同官宜君洛川鄜縣綏德清澗米脂安邊定邊等廿餘縣每至一城直必親臨前線據險射擊戍守將卒偶一外窺卽應彈而仆以是守者皆匿不敢動兵士得以緣附登城大聲嘯呼敵卽棄城而走當攻安邊時敵據險固守中隔一河敵軍中亦有能槍者百發百中將士皆不克渡直登高以望遠鏡察之描準射擊立斃其人敵軍大亂直因乘勢急攻槍不停射左手被炸傷不能督戰全軍敗退安邊竟不能克其一身關係全軍勝敗有如是是時各地討袁軍並起陳度其勢可爲使人約郭曹等南下陸建章懼使其子承武率兵進駐渭北至富平爲胡景翼所禽陳乃樹護國軍旗率部至三原與陸議和攫得陝西政權於是郭堅曹世英高峻各部皆受編制郭堅爲第一游擊統領直副之從至西路安定咸陽醴泉興平武功岐山扶風汧陽隴州鳳翔十餘縣鳳翔土匪姚福壽等聚衆萬餘盤踞南山一帶百餘

里爲民害直奉郭令帶兵入山散其脅從誅其渠率數日而定及中央任命李根源爲陝西省長削陳政權陳思有以反對之乃更編郭部爲全省警備軍以郭仍爲統領直爲分統欲藉以掣李之肘直初謁李見其樸誠則大敬服密約郭堅傾心事之陳乃大恚怨郭自己適復辟事作段祺瑞誓師馬廠討逆陳亦欲發展其勢力使民黨要人宋相臣等與郭堅出師河東進窺晉省令張鈞以兵駐潼關爲應援而復辟之役未幾旋定陳因思藉此以除郭亟電晉督謂郭爲叛兵使鄰封剿除而令其部下王飛虎等陳兵河上斷郭歸路郭遂敗於河東宋相臣等以身殉郭繞道渡河西據咸陽省城戒嚴陳以詞探直直曰督軍若有所使直則唯命是從古人大義滅親况朋友乎卽率本部至興平單騎改裝入咸陽見郭告郭以戰爲和以進爲退之法復返興平布置包圍虛張聲勢電陳請示進止陳慮直終不肯攻郭電止之更潛使人語郭俾潛行出境以免晉省責言由是直知陳存心險詐陰護郭至鳳翔休養待時已則仍返省垣既而安福系組織督軍團脅散國會陳樹藩附和之以固其位逼李根源解省長職直乃暗使其參謀范潤生赴廣州晉謁孫大元帥詳陳西北情形請示機宜得委爲陝西招撫使與郭堅密使往來決計除陳聞陳欲裁汰警備軍卽乘機請先改編所部時王珏所帶之警備軍第五營素稱强悍陳最惡之

乃請調王營來省駐城南小雁塔候編實則厚集兵力爲己助是時高峻焦子靜等已在白水獨立稱護法軍樹藩派大兵往攻勝負未決直欲乘機就省垣先圖樹藩爲根本上之解決密商於劉錫麐錫麐白水人時充樹藩衛隊騎兵營連長駐防渭南而爲樹藩信任者也劉歸卽遣其親兵廉某託投函至省謀刺樹藩未果適新疆購運槍械一批過陝中央電令樹藩護送樹藩命錫麐接解來省錫麐奪之遂舉兵趨省城以函報直直見事已爆發卽一面使人飛報郭堅一面使副官張振義李方正李新生等佯縛一犯名瘋子安兒者直入督署刺樹藩誤中座客前關中道尹陳友璋直隨後率部進攻督署知樹藩已逸卽調王珏營進佔南門及軍裝電報各局使騎兵連連長傅定安佔據鐘樓電報局樹藩軍旋來攻直槍僅三百枝與樹藩軍數千之衆戰兩晝夜將士無飲食之暇疲倦已極而胡景翼團之第二營陳世鉅忽來援應樹藩直遂整隊退出南門西行至鄠縣是時郭堅由鳳翔來援與直遇於鄠縣與諸將會議成立靖國軍宣言護法討陳而樹藩軍忽來攻乃率所部退保岐山樹藩引兵圍之三面激戰八日夜而樹藩所率之胡景翼團受創尤鉅景翼旋悟樹藩慣用以毒攻毒之計遂密函約直讓出岐城使循北山東與高峻等合兵直以胡亦民黨不忍相殘殺允之有阻之者直曰我生平待人以誠未嘗負胡諒

此
页
缺
页

此
页
缺
页

此
页
缺
页

此
页
缺
页

此
页
缺
页

此
页
缺
页

此
页
缺
页

此
页
缺
页

此
页
缺
页

此
页
缺
页

胡亦不負我也遂退兵使李奪殿行數里猶聞城上百姓打更聲不絕直退出岐山後一
日夜行三百餘里東抵富平屬之美原鎮樹藩軍踪至直使李奪守東城自守西城恃其
善射獨當一面攻守五晝夜胡景翼以岐山之約見疑於陳陳嚴令亟攻美原胡又來函
約直再退直以前約責胡得胡允許始由美原退出潛赴耀縣晤曹世英謂曹與胡約速
定大計再退軍中乘夜攻克白水高峻郭堅劉錫慶等亦相繼至因開軍事會議密約胡
由三原舉事已與郭高等進攻蒲城民國六年十二月十三日夜直率隊由白水出發步
行六十餘里天色微明至城下直身先士卒猛力攻擊城西南兩面頃刻間均樹靖國軍
旗與城內守軍戰自晨至日夕杯水未沾脣後援失期漸至敗退流彈傷左臂始越城跳
下未幾又中數彈血溢如注因顧左右速割我首去毋爲敵所得也語畢而卒年廿五直
自省城退出後家屬被抄一弟名莊後爲靖國軍第一路支隊長直爲人美容貌翩翩若
佳公子然性豪富於膽略居常沉默寡言獨喜撫弄槍械極彈力所至能命中無虛發陝
軍中號爲槍夫子辛亥時年纔十九郭堅一見傾心焉結爲昆弟郭堅受給東渡樹藩卽
以直代郭警備軍統領職省垣岐山諸戰雖敗而志不少挫常對部衆曰諸君皆散去留
耿某一人尙要堅靖國軍旗高山上手持一槍往來馳驟也部下皆刀俠出身無紀律長

於野戰喜勝敗則不可收拾直甚憂之無可如何蒲城之役先勝後敗論者歸咎於其部下直中彈倒地尙囁左右轉陳郭堅軍士不受教育不可恃以作戰也三原靖國軍總部成立後呈請軍政府以陸軍中將卹

張義安

張義安名養誠富平人少貧家學稍長入北山爲炭家傭旋入新軍退伍讀書正誼書院師事興平張衡山先生正誼書院爲清季理學大儒三原賀復齋先生講學所衡山則復齋之嫡傳弟子時爲主講者也辛亥之役從李仲三與清軍戰於潼關嘗以三百人當敵六營之衆守山西鳳凰嘴夾河以大砲擊敵不敢犯共和成以軍績資日本留學逾年俄蒙事起與胡景翼充學生團代表返國復入北京法政大學預科卒業衣垢不灌食皆粗慥當日學生不能嚼菜根能任天下艱鉅者未之有也彼紈袴公子錦繡王孫真可高閣束之袁世凱稱帝時隨胡景翼返陝組織護國軍遂陝督軍陸建章陳樹藩繼爲督軍景翼任步兵第二團團長駐商雒招中學以下學生百餘人號模範連以義安任連長操練雜取德目嚴格法風紀肅然陝軍中莫之與京學生中以體弱不任勞苦者時有逃亡或勸其稍持平緩則曰學生入軍籍即爲軍人今日不能受教練他日尙能成事業

乎逃者自行淘汰吾因而增補之藉以廣其選不尤善乎模範連始有槍卅枝人或少之則又曰吾練其心耳何患無兵冬日寒風凜冽命學兵入水運石衆骨慄相顧莫能先義安後至卽解衣躍入以爲之倡治軍不尚華飾尤惡官長下比與士很驚不用命者以故先後應募幾六百人留者纔百廿人信賞必罰以背嵬軍自擬時關中各地多盜以景翼命率軍游擊之羣盜聞風辟易閭閻帖然嘗破盜窟於下邽部下以盜所略財獻令盡投急流中曰取盜財是亦盜也兵士或取民一鍼一線必立誅無貸年餘稍遷爲備補營營長駐三原樹藩軍曾旅初至卽令移防義安陽諾連日部署開拔事務示以不疑密與鄧寶珊董振五諸人議定方略某連據某街某人守某處斷敵交通某部進攻某部應援使鄧任東門董任北門而自任南門各驟收城門衛兵槍集兵士下令曰今日之戰有進無退有死無生如稍退卻卽以軍法從事各將受命分出俄頃得報曰南北東三門俱得矣於是始作戰兩日夜樹藩將曾繼賢嚴錫龍越城逃去黎明諸將士皆往復命見義安方與軍佐指畫史書兵士婦門外積雪若無事者良久出所畫圖示諸將士凡敵軍所處地及我軍進攻道路分布白黑若織網然衆乃知所以勝蓋先期與同志數人僞作登城以一日之力而成之者也當初戰之夕飛雪蕩漾砲聲隆密之際義安一手指揮官兵授方

略一手援毫成瑞雪卽景詩又成大雪助殺敵長歌意甚閒雅移時巡行佔領地過縣署知事李某與接談言笑自若不異平日謂陳樹藩奮私智禍陝西耿端人一擊不中遺恨至今嚴氏兄弟行同土匪而樹藩依重之今日之事實不得已無何軍士以某處戰情危急告乃徐起辭去李嘆曰張義安鉄膽人也當掘甬道進攻時每至一商家必出其年長者慰問再三說明維持秩序有己負責絕不使商民有絲毫損失故原人每稱張義安臨敵如虎居心似佛及景翼與曹俊夫同入三原稱靖國軍所部各爭爲雄長義安忿曰不爭於疆場爲丈夫羞難自我發我先行討賊以謝國人遂率所部三百餘人渡河趨長安大小數十戰皆詳見戰紀中不具述民國八年二月十三日與樹藩軍及鎮嵩軍戰於鄆縣歿於陣年卅二四月主帥列上其狀於軍政府贈陸軍中將義安身短而多力喜拳技宗少林嘗以關廟鉄刀置腹背左右旋色不少變攻省時每於衆開拔之前必遣人於預定駐在地召集父老慰之曰我張某也爲民而來非以擾民預令民衆將其細軟要物及婦女併入一半房內空其一半駐兵旣抵卽命兵士於民所居外守衛他兵不得稍近就之及去復協同各官長分別檢查有攜民間一物者當場處死故鄉民聞張君至莫不壘槧相迎逮其去也涕泣挽留若不忍離不敢離者然行軍所經過男婦孺稚皆雜聚道旁

相視毫無驚懼狀一日駐鄆屬秦渡鎮有某部兵百餘人自西來沿途剽掠風聲甚著居民欲逃義安止之命兵待諸橋上某軍甫抵張軍將所取民間牲畜衣物等盡數奪擲地上如山積傳令被掠之處來領某軍知爲張軍不敢與之爭執然後一一放行始去故省西一帶居民稱義安爲萬家生佛及其死也莫不下淚至有建廟祀之者一子改印

董威

董威字振五扶風農家子也少入本縣高小學堂肄業性嚴正有膽略辛亥西安義軍起曹印侯募敢死軍三千人赴援鳳翔至扶風遇威與談奇之留置幕中印侯嘗有疾部下又交閼清軍乘之彈及病室威慨慷登陴痛陳大義執反側者手戮之呼衆躍城而下殲敵甚衆追擊二十餘里軍威大振說者曰是役無威則民軍無鳳翔矣於是人感爭識之洪憲禍作威與鄧寶珊諸人舉事渭北敗亡草中及郭堅曹世英高峻等起兵討袁威與同志起應涇醴興乾間共逐袁黨陸建章事定屏居讀書胡景翼時以步兵第二團駐商雒召授排長六年夏遷備補連長往來擊匪常有功張義安成備補營編爲第一連三原之戰第一連出力獨多故稱張者必兼言董張死以胡命代將率所部援關山取田市敗敵交口上漲渡轉戰渭河南北所向無敢當者先後數十役獲槍步二千餘枝及奉

軍入陝與陳樹藩軍合攻西路靖國軍威奉于總司令命同馮毓東鄧寶珊李虎臣各部馳援武功中流彈殞命事詳戰守紀要中威短小精悍目光銳射如朗星馭軍嚴而有法臨敵必以身先之衆以是樂爲用在軍數年數過其門而不入人有怪而問之者威曰天下攘攘大亂方長男兒不能拯民水火惟一家是恤我有家孰無家耶聞者壯之初從曹印侯年才十八間卽讀書師事印侯印侯解兵威從之營商鄂豫間及印侯病死杭州威扶櫬歸葬華山之麓郭希仁劉藹如印侯之至友也以印侯故甚愛威威亦事之如事印侯學問遂益進張義安戰死後嘗自爲文祭之其詞曰痛將星之沉壘兮忽歲鑰之將更稽國賊之誅戮兮悵恨願之莫成魂魄毅爲鬼雄兮身雖死而神靈維招魄之有地兮率舊部而薦牲溯義旗之始樹兮收焦穠而整軍獨仗義而南征兮牛酒遍乎州閭徂桃園而會戰兮士爭先驅血戰三日兮械廢彈虛手短兵以相接兮殲彼梟渠蒲陽圍急而返旆兮防後路之或疏旋進於仁里兮冒雪奮邁急裝突進兮襲破甘寨三戰及於長安兮逆督窘憊薄塹隍而樵採俱斷兮軍中稱快尋豫軍之入關兮敵乞和而停戰兄返原而定謀兮弟屯軍於郿縣詎陳劉之反覆兮潛重兵而來犯兄星夜以馳援兮驚迅速之若電急分軍而應戰兮當敵軍之八面忽偏師其少却卽拊膺兮深恥奮身兮進擊敵壘兮

尺咫竟飲彈而捐軀兮知蠭蠹之有毒豈窮寇之勿追兮信兵書其可讀嗚呼痛哉天日沉陰兮笳鼓不競軍失主帥兮驚惶莫定衆情推戴兮委以兵柄三辭不獲兮涕泣受命旋東防之告警兮躬擐甲而先行趨關山而大戰兮振義旅之威聲破權家洛家兩寨兮敵自踐而尸橫渡渭橋而攻馬駒寨兮驅草木皆若兵恨笠生之失計兮陷故市而不返致全局之大震兮人心危如累卵旋井軍之來歸兮喜相逢之未晚復援軍至自滇南兮卜成功其弗遠夫何興平一役兮變出非常旋師茹痛兮息民池陽撫時感事兮念懷國殤烏乎痛哉旌旗兮蔽天骨駭兮遍地寇讎兮方張部曲兮罔翼惟英靈其式憑兮敢生死而有貳雖無宣子之才能兮願卒伯游之後事威死時年纔二十五九年春于總司令右任派員葬威於其故里法門寺東北之白龍講壇手書墓誌銘以哭之呈請軍政府以陸軍少將卹子考學

田玉潔

田玉潔字潤初富平人幼習拳技善手臂數十人不能當見豪強凌人者輒予懲創父屢戒其多事不顧也清末由井勿幕胡景翼劉允丞諸人介入同盟會辛亥光復從勿幕轉戰河東潼關二次失守李仲三諸軍敗退靈闕間玉潔偕十餘人爲殿蔽險狙擊從

容引還共和成入同州軍官敎導營畢業民國三年白狼擾陝會匪焦彥芳聚徒千餘踞富平之月竄山謀響應玉潔時爲陳樹藩旅連長奉命歸里募兵得百餘人至縣城官紳留請助剿圍警列陣山前爲聲勢玉潔率衆繞山後覓羊腸險道攀陟山上守匪推石下擊石飛過項上從者或以手格避玉潔笑止之俟隙猱進發槍斃匪十餘揮衆疾登直破其巢擒彥芳送縣正法狼匪失恨遂改道西竄涇原各縣賴以保全護國之役以功遷營長改隸陝軍第一旅第二團團長胡景翼剿匪同華商雒一帶所至有聲靖國軍之初起也玉潔適有疾因使其營副兼一連連長王俊生率全營隨張義安渡河作戰而陳樹藩使其將曾繼賢樊老二等率兩旅來攻三原迫至城下玉潔與岳維峻率兵一營擊卻之追擊於涇陽之漢堤洞曾樊潰走遂進克涇陽于右任歸陝總戎政任爲涇原警備司令當是時主客各軍逾十一省之多兵匪龐雜民不聊生獨涇陽一隅商旅通行閭閻安堵他縣流亡避亂者咸往依之號爲樂土涇陽駐軍之名由是大著及南北議和使節往來莫不先出其途資保護焉十一年胡景翼率軍出關使玉潔以陝軍第二旅旅長兼渭北剿匪總司令留守涇原與劉鎮華軍保持友誼推誠布信如古羊祜陸抗之事十四年胡慤豫西之役鎮華出兵助慤玉潔率部自後追擊與吳新田軍戰於渭南上漲渡劉慤旋

敗乃進駐洛陽受任國民二軍第三師師長未幾胡景翼以疾卒岳維峻繼任河南軍務督辦玉潔建議修政練兵鞏固中原待時觀釁徐圖發展而維峻方議出兵攻魯未予採納及前方小挫急檄玉潔東駐濟甯任爲援軍總指揮與敵戰於曲阜兗州間而降將靳雲鷄田維勤等忽倒戈遂與諸軍引還開封維峻旋棄開封而西至陝州爲劉鎮華殘部所阻諸將皆棄兵變服渡河西歸玉潔亦自晉南間道歸三原劉鎮華旋以新收之衆長驅西來進圍西安數月後兼犯三原圍合四面玉潔集合留陝各部堅守待援六閱月寧保危局事定任國民聯軍第十一路總司令十六年國民一軍師長宋哲元追擊甘肅黃得貴韓有祿部入陝韓黃舉所部歸涇陽張九才哲元遷怒同時以重兵襲攻涇原玉潔與戰月餘繼念瘡痍甫蘇不忍同室構難卽以所部授馮毓東通電辭職子身南遊十七年日寇陷濟南北伐軍被阻玉潔時方寓滬聞訊憤激時岳維峻統南路軍駐襄樊因致函請移師東指誓同禦寇報國維峻覆函召使赴襄共議出兵方略乃偕數人西行道出湖北棗陽爲共匪所遮被羈年餘不屈遇害年四十四玉潔性忠厚一與人交終身不改初起隴畝隨井勿慕在行間卽傾心事之與胡景翼岳維峻劉允丞皆結爲昆仲生死交雖未多讀書識字而記憶力過人其肄業軍官敎導營遇考試恒以口語代筆答敎官何

遂愛其直爽能用心每謂景翼等曰使田玉潔多讀數卷書卽非若輩所可及也自被陳樹藩拔爲營長使隸景翼後卽以練兵剿匪轉移陝軍風氣爲已任張義安發難三原景翼與曹俊夫議興師名義未決樹藩欲中止其謀乃以電話徧召胡曹諸人詰其意欲何爲胡答曰余無成見惟衆意是從耳曹則以惡言詈之樹藩復召玉潔問將何以自處玉潔曰督軍不常以絕對服從長官教我耶景翼現爲我直接長官彼欲如何我但知有服從而已樹藩知不可挽回乃用兵八年春樹藩將劉世瓏率一旅之衆自臨涇渡渡河逼涇陽召玉潔出見兼使召景翼於三原約於城外馬村相見世瓏固陝軍第一旅旅長景翼玉潔皆其部曲且素愛諸人材欲令取消靖國軍以收拾亂局更晤談逾數時無成議玉潔復偕景翼歸世瓏亦撤兵退駐河西自後樹藩悉衆來犯皆自渭南渡河涇陽遂成爲緩衝地人以此疑玉潔與樹藩通款不忠於靖國軍及景翼被陷入省玉潔壹意保境息民和戰皆不過問并勿幕被害興平玉潔使人負屍以歸其首在樹藩所樹藩函玉潔索屍而玉潔則堅向樹藩索并之元使人往返者再樹藩知不可强乃與玉潔書曰我所以欲勿幕遺體回省殮葬者以勿幕曾任關中道尹職可向政府請卹典也若輩乃賊耳又欲汚勿幕爲賊酋不明順逆是誠不可以理喻矣遂派其副官田春耕送勿幕首至涇

陽乃得殮春耕者字笠雲亦辛亥首義時勿幕之老部屬也玉潔在胡部最稱勇將與岳維峻齊名張義安以下皆以四哥呼之景翼常曰西峯潤初猶吾兩股缺一則不可行國民軍之起首都也驟玉潔往陝得報較遲人多議其滯滯然能持重不急急於功利能爲人所不爲及當大難受重任勇往直前不復計利害皆可與其行事中見之其在靖國軍與各部將帥皆熟識和諧無間獨惡匪類擾民尤與義安相契合其歿也部將許子鈞等親赴戰地訪覓遺骸不得乃招魂設祭營葬墓於冠塚於華釐與胡岳二墳並峙焉子二文通明廉

劉錫麿

劉錫麿字舜天白水人少孤貧習木工稍長有大志嘗語人曰大丈夫當爲國効力戎馬間安能久事繩墨耶遂棄去從人學武術精於射擊發彈必命中一時有神槍之稱民國三年充本縣警察隊什長巨匪李懷林糾衆攻縣城錫麿獨守北門斃匪甚多匪退劉什長之名自茲聞遠近後以事亡命投陳樹藩軍中屢立戰功樹藩頗親任之擢署爲督署衛隊騎兵第三連連長與耿直高峻諸人相友善六年高峻在白水獨立稱護法軍錫麿與耿直密謀響應語在戰守紀要中陝靖國軍旣建初隸曹世英爲第二支隊司令

後復改隸郭堅爲先遣司令及郭與奉軍許蘭州議和錫慶首率所部隨許出關駐兵靈寶陝州間剿滅董世卿夏老么賈有才郭奉舉諸積匪民衆爲立碑紀念十一年胡景翼率師出關收編爲第五團團長國民軍時奉命扼通州大敗曹鏌於廊房所部擴至八營景翼深倚畀之使隸李虎臣第十師錫慶性褊狹少蘊藉既以戰功自負驕倨不欲爲人下每以事與虎臣相抵觸十三年十月師次石家莊虎臣邀宴伏兵擊殺之而當以軍法年四十二其後慘玉琨攻豫西景翼謂人曰舜天威鎮豫西慘部多敗於其手使舜天不死吾無今日憂矣其見重如此始受五等文虎章卒以陸軍少將卹子樹森

簡 大 獻

簡大獻字吉順渭南人初業木工民元後各地土匪屢爲民害臨渭河北一帶尤爲匪淵藪大獻嘗購槍枝爲防禦匪來劫爲所傷因相讎焉糾衆火其居室大獻忿曰吾豈畏彼者耶乃盡破家財置槍械彈藥糾合人徒屢與匪戰仇鬥大獻善擊槍彈不虛發匪衆畏而避之然大獻亦自是多交結鄉里稱豪傑矣會袁世凱圖帝制陝中諸黨人謀起兵討之奔走各方結聯豪俊聞大獻名招之入軍遂從郭堅曹世英諸人入陝北討袁逐陸事定以功任警備軍營長驍勇善戰人稱之爲猛張飛靖國軍初起西安時郭堅至岐

山陳樹藩以大部來攻岐山城東有鳳凰村位居高阜據其上可以下瞰城內敵軍劉世瓏部圍之急大敵請往助守率十餘人抉圍而入當之者無不披靡大敵既入軍心爲之益壯屢出襲擊皆獲槍彈無數一日大敵方憑村堞指揮兵士示敵何處可擊狀忽被流彈中目殞命年三十一餘兵遂退入城耿直亦旋棄岐山與郭堅引兵而東大敵無子姪遺愛爲之嗣

王紹德

王紹德字夢周蒲城人曾祖及祖皆儒學生員父以回亂輟業紹德少有奇稟復傳其家學年二十一補諸生肄業關中書院科舉既停遊幕蜀中閱歷益宏後因親老辭歸居鄉教授兼習岐黃爲人治疾多奇效袁世凱謀帝制紹德惡之是時萑苻徧地民不聊生因與岳維峻蔣朗亭諸人倡辦渭北民團名爲保衛地方實則結連豪俊共謀討袁及洪憲消滅乃復故常民國六年夏復辟變作陝黨人宋元凱郭堅等興師討伐紹德奮起從之渡河而師潰竟以身殉年纔三十六無子以姪簡余爲嗣

朱思聰

朱思聰字子敏三原人初以明習吏事爲陝甘總督署兵曹書佐積勞保知縣銜見

清政日非辭歸養親與清誠井勿幕富平胡景翼諸人交最契辛亥之役西路乾醴一帶作戰尤烈思聽居甘久習知秦隴各營汎人數虛實及州郡道里遠近險易狀建議於井使胡景翼率同志千餘人出三水斷甘軍後路以牽東下之敵共和告成引退鄉居旋佐胡景翼軍起護國之役任陸建章覆督制既而靖國軍興仍佐胡軍主餉械及胡被陷入省又助于右任岳維峻合諸友軍守渭北數年直皖戰前隻身入省城說陳樹藩脫景翼歸三原十年胡部改編東出關治兵順德留思聽轉餉糈補卒伍景翼嘗言曰子敏兄本軍之蕭鄧侯也及景翼督豫頗欲有爲急亟招思聽將畀以財政重任未行而景翼遽薨乃與諸同志營葬景翼於華山之麓土石工程一身親之其年孫禹行督陝特電中樞任爲陝西財政廳長蓋有繼胡志也逾年國民軍失利中原鎮嵩軍劉鎮華大舉入潼關進圍西安思聽猶在財政廳任星夜馳歸三原與楊虎城協議促揚率兵入省助李雲龍堅守西安已則留三原與田司令玉潔鄧師長寶珊及李司令子高同守涇原由是西安被圍八月涇原亦相持六月餘揆至乃解當敵軍圍城時援守各軍廢集餉糈匱竭思聽以身負責貸銀幣六萬圓分餉各軍賴以得濟楊虎城主陝政時聘爲省府顧問思聽貌癩而視銳聲若洪鐘遇事持正識大體自胡景翼以下如岳維峻田玉潔鄧寶珊等皆以兄

事之軍中皆稱之曰朱先生性友愛兄思明弟思敬皆早卒事寡嫂以禮撫孤女若己出使姪秉鉞讀書秉鎔秉峴習商業而獨令己子力農各量其才也居鄉恂恂與人無忤任軍政事十餘年不治私財邵公力子爲陝省主席聞其以身貸財餉軍事卽爲如數籌償之不欲以公負累賢者也民國二十五年六月以疾卒於家年六十四子一秉彝

張仲良

張仲良名師渠武功人清摩庠生讀書究心性理之學慕宋儒張橫渠之爲人故取名師渠性豪俠喜交遊有志拯時知清庭不足與謀加入同盟會與井勿幕諸同志往來奔走運動三輔各地豪傑聯合響應共成辛亥光復之功西路戰事危急嘗建選將禦敵之策爲當事者所採納討袁護法各役皆奔走各方爲之策動靖國軍興吳希真任左翼第一支隊司命仲良副之二人皆書生不善馭衆故一戰而敗仲良衣履均被剝奪狼狽歸對人言敗狀一個一個之聲不絕於口一個者武扶歧鳳等縣人之語句尾詞也聽者爲之胡盧而仲良則笑聲大作似忘其甫經脫險者亦其個性獨特處也嗣充駐川代表兼四川講武堂陝籍學生監督後任靖國軍紅十字會會長民國二十一年卒於西安年六十五仲良一生熱心國事淡於榮利不事家人生產西北民黨咸尊敬之號爲長者夙

精岐黃術處方多奇效遇貧苦無力者施醫而外並贈以湯藥或聞人有疾卽往爲之治療惟製劑過重又喜用涼性藥品石膏一味輒用半斤病者咸存戒心然如方服之亦良已故人皆稱爲石膏先生長子世安充靖國軍第四路先鋒營排長陣亡岐山次子崇林

王玉汝

王玉汝字誠齋一字覺一扶風人曾祖以下世敦儒業玉汝幼孤而聰穎能自致於學於書無所不讀尤邃於說詩從咸陽劉古愚先生游劉先生以經世致用之學設教西北識略之士多出其門顧獨愛重玉汝謂他日可以立事功宣統二年以拔萃試京師報罷因見清庭衰弊各地革命風潮日亟乃結聯志士密謀改革辛亥起義佐曹印侯敢死軍爲參謀長禦敵鳳翔印侯臥病軍事一以委之鏖戰數月敵軍卒不得逞民國成立主持西路各縣黨務五年與諸黨人密謀討袁爲陝督陸建章逮捕入獄在獄中治愈同繫黨人胡德夫重病蓋玉汝亦精岐黃術也及陸敗袁死乃出獄旋任扶風縣知事還治本籍因其於民元任宜川縣時有政聲故當局特任欲令作模範也扶風田地差徭夙號混亂有地已售而糧不過戶民無地而納租至數世其害不絕且糧名冗複田級繁多猝不

可辨省胥吏因緣爲奸利而鄉民受其病玉汝爬梳蕩滌積弊一空縣人如釋重負至今稱之後調長邠縣尤多善政民六督軍團魯散國會約法再毀玉汝與黨人劉允丞張義安鄧寶珊董振五諸人樹靖國軍幟於渭北擁護護法政府推胡笠僧于右任先後任總司令歸附者日衆而餉糈大匱諸人共推玉汝主籌餉局事乃獲濟民國十年直軍入關陝局突變玉汝與楊虎城迎于總司令於武功重整軍旅抵抗不屈次年于總司令去陝玉汝亦北遊故都是時李印泉長農商部欲以實業專使任之使開發西北農田水利而事卒不偕論者惜之玉汝貌清奇目光炯然聲如洪鐘議論風發若決江河性慷慨勇於赴義好急人之急然正直若神明不可干以私其所交皆一時傑俊尤好獎拔後進陶冶成就不可勝數如董振五楊萬青史天士皆其及門民國十三年卒年五十一長子瑞鸞早卒次瑞鶴瑞鸞女子四

呂撫宸

呂撫宸富平人清末由歲貢生就府經歷職分發甘肅民元回陝歷任本縣第一小學校長勸學所所長靖國軍時知涇陽縣事五年勤於民事尤善聽斷一時有神明之稱涇陽高門廣利兩渠同一渠身高門渠地居上游人衆勢強霸水私售以致廣利無水灌

溉懋來爭水械鬪傷人上控傾家者不知凡幾撫宸傳詢上下游水老各執一詞乃調歷年新舊水簿鈞稽旬日詳計高門受水時刻知其有餘並悉其朦混之法因傳詢高門各水老詳爲核對指詰詞窮乃吐實情謂舊例廣利每月實應受水五日零九時百餘年久懸未結之案至是乃定人咸服其精心熱腸因共建龍王祠於渠口並鑄撫宸生主配祀焉同時白水盧文模爲高陵縣知事亦能於軍務倥偬之際脩明政事人稱循良自軍興以來渭北各縣惟涇高兩縣秩序井然大軍雲屯供億繁重而民不擾者實惟賢令長是賴撫宸後任國民二軍留守三原總部軍法處長民十三年隨二軍第三師出關任參謀文模以疾歸里後皆終老於家

仇 萍 田

仇第田名濟善富平人清邑庠生以庚子捐賑保知州分發四川委署前藏白玉縣知縣辛亥棄官歸里居鄉教授生徒靖國軍第三路第二支隊司令石象儀延致幕中十一年攝耀縣知事十四年又攝富平縣知事所在廉明有強幹聲十五年劉麻禍陝第田於其所居倡辦民團地方得以無擾卽所謂文字七團也十九年任本縣清鄉局局長尋改保衛總團團長二十一年共匪竄縣西因調團隊往剿城內空虛爲匪黨所乘遂及於

難年六十三子二榮紀榮紱

柏 垩

柏壩字厚甫涇陽人清副貢生受業於賀復齋劉古愚兩先生研究經世致用之學以改造新中國爲己任辛亥革命時曾充學生隊隊長維持省城治安後爲實業司司長民國建元被選第一屆省議會議員懋參討袁護國各役靖國軍興任總部財政處長及第四路祕書長出任富平縣知事卸事後家居數年以疾卒年六十子惠普

范 克 立

范克立字卓甫三原人光緒辛卯科舉人嘗爲三水縣學敎諭後辭歸主講本邑學古書院清末改訂學制書院改爲高等小學仍任校長嗣充省立高等工業學堂敎習淳充監督民國建元改爲甲種工業學校仍任校長民國十三年卒於校長任年六十克立天性和易一生無疾言遽色任教育事業前後幾二十年名德碩望遐邇同稱及門之士其後多爲黨國要人靖國軍時胡景翼先後延爲第四路祕書長及總指揮部祕書長民國九年三輔大旱饑華洋義賑會募款救濟諸洋人議聘地方人士參加皆曰非范先生莫屬也其爲人見信如此子景蘭

曹靈秀

曹靈秀字毓生渭南人清末以知縣分發山西厯署驛城吉州浮山等縣所至皆有政聲因憤清政窳敗外侮迭乘棄官歸里密聯革命黨人蓄志改革辛亥之役與王雲章嚴飛龍等首先響應於渭北渡河攻取潞州共和成全師歸陝及袁世凱謀帝制靈秀親赴滬欲謁孫總理謀方略會總理已東渡日本不及居滬久之及蔡鍔舉義職於滇靈秀問道赴之襄其軍事靖國軍時任總部參謀東北宣撫使出任渭南縣知事陝局既變卸事家居不復出抗戰軍興常以地方耆紳協助政府催丁征糧多方勸導首遺其子兆智從軍榆林以爲衆倡晚歲得瘧疾臥牀數年民國三十四年夏六月卒年六十六

王林生

王林生三原人幼受業於宿儒毛班香先生之門精通經史尤擅長歧黃術辛亥前嘗從于右任至滬襄辦民立報館鼓吹革命思潮發揮民治精神民國後返里從事教育歷充省立女子師範及私立女子中學教員民七靖國軍興任總司令部參議民十四年任國民二軍第三師書記官旋調署略陽縣知事民十九年以勞疾卒於家年五十子憲

章文化

雷寶琨

雷寶琨耀縣人清季翰林院孔目與同縣任尹宋元凱樊毓秀諸人夙相契故對革命意義瞭解最深遇有可爲力者人事財政莫不極端贊助靖國軍興第六路盧占魁部及雲南第八軍葉荃部先後同駐耀縣兵馬以數萬計給養缺乏聞寶琨老成碩望禮致之任兩軍糧台總辦早作夜思慘淡營度事舉而民不擾耀縣彈丸小邑勢久不支復親往鄰封游說萬端兼請軍事當局統籌大計於是南至富平三原西及栒邑淳化飛芻挽粟源源而來兩軍之衆遂得騰飽葉盧兩司令嘉其勤能製爲國宣勞匾額以贈之固辭不獲益爲奮勉三年之中食不以時寢不解衣及葉盧西去而寶琨亦土木形骸心力交瘁矣不數月竟以疾卒年六十八子二佑驥佑駿

田種玉

田種玉字蘊如三原人家世耕讀嘗受業於同縣朱佛光先生劬學能文中式光緒某科舉人丙午東渡日本畢業於高等工業學校辛亥返國參加西安光復民二創立三秦公學樹西北研究科學風氣其中學子被選派東西洋留學者達百餘人之多民五創辦法政專門學校民六出任甯羌知縣民八創辦渭北中學爲靖國軍時中級學校之開

端民十任三原縣知事年餘民國政府成立任審計院祕書繼任監察院祕書七七事變後因病返里生計蕭然意泊如也三十四年四月卒於家年六十四子崎

李 豐 功

李豐功字瑞峯三原人世爲大族父懷聖歲貢生豐功幼受業於賀復齋先生之門以劬學能文稱旋入邑庠益肆力於經世之學慨清政不綱革命風潮日熾因加入西北黨人祕密組織辛亥護國護法諸役均有力焉靖國軍興任總部書記長其後護送于總司令右任至鳳翔隨行至滻粵各地歸任上海大學事務主任民十四年復隨于北上與王陸一往來平津間策動首都革命工作十六年返陝任國民聯軍駐陝總部祕書北伐完成國民政府奠都南京隨于至京任審計院庶務科長審計院旋改組爲審計部仍任原職七七事變後國府西遷豐功以疾歸里三十年陝西革命先烈褒卹委員會改組以豐功熟悉陝中革命史乘延任委員三十二年審計部隴海寶天鐵路審計辦公室成立部聘專員駐寶任事三十三年九月卒於家年六十二子作人

白 白 成

白自成字誠齋清澗人畢業北京國立農業大學曾參加三一八民族革命運動十

五年任國民聯軍駐陝總司令部政治保衛部組織科長十七年任國民革命軍第二集團軍第四方面軍政治處組織科長十八年任中國國民黨陝西黨務指導委員會組織科主任兼陝西省立師範學校黨義教員十九年任陸軍第十七師宣傳隊隊長隨孫宣慰使蔚如至蘭州兼西北新聞日報社社長後又隨軍至漢中任博報社社長二十二年任寧羌縣長逾年值地方不靖各屬土匪應時蜂起迫近縣城自成設防固守匪來屢攻均不得逞二十四年二月四日復合股來犯其黨羽潛入爲內應導匪入城自成率團隊與匪巷戰卒以衆寡懸殊頭部中彈與城俱亡年三十一

王會文

王會文鄆陽人省立高等學堂畢業辛亥西安起義奉軍府命回籍倡辦民團維持地方治安民國既建選派赴日本留學畢業七年歸國參加靖國軍之役任第三路參謀十年被選省議員遇事敢言無所避忌十一年權武功縣知事十二年隨軍出關十七年任國民第三集團軍楊虎城部第三旅參謀十八年任陝西賑務會委員十九年以疾歿於西安年四十三子三玉成學成汝成

趙邦楹

趙邦樞字任卿澠城人早歲留學日本早稻田大學政治經濟科畢業辛亥以前從事革命祕密工作膽略過人靖國軍時嘗任東路招討使馳檄聲討陳樹藩其文曰天禍我陝喪亂頻仍辛亥鼎革而後旋經白狼之跋謫繼以陸督之肆虐父老昆弟已不堪其苦痛詎陳逆樹藩罪浮於陸虐過於狼乘袁氏叛國攘竊陝督遂卽媚段尊袁遺陝人羞以匹夫患失之心附和督軍團擡殘國會威迫元首効唐室之藩鎮爲國家之蟲賊至其督陝寵奸佞爲心腹縱肆魁爲爪牙以致奪掠殺人之案不敢呈報拘人勒贖之風愈演愈猖善良任匪魚肉殷實逃之四方尤可恨者國家爲有機體各部乃其機關陳氏督陝職員概不發薪以致學校倒閉實業停辦司法等於虛設內務有同停滯而陳則兄弟同握兵柄姻姪盤據要津姬妾十餘人良田數百頃有利商業悉歸掌握煙膏公司普遍秦域寄金外商富甲天下尤復慾望難滿橫征暴斂發起從來未有之二百萬公債天怒人怨禍起省垣尙不知自悔且大肆荼毒戕殺志士株連及於僕使誅鋤異己疑忌盡去河北放種鴉片不顧國家條約商借外債竟擬地丁作抵議員本人民代表乃不法以派充知事爲國家命官竟縱兵以刺斃凡逆軍所至之處姦淫殘殺慘無人理樞重受國恩忝居士類敢忘匹夫有責之訓弗盡國民份子之責爰糾合同志奉命興戎兵戈所至婦孺

無驚旁證人事之宜仰見天心之順馮翊自古名區豈乏慷慨之士暴民專治已久曷興同仇之師苟或響應義師倒戈相從者盈惟禮以上賓授以上賞倘或執迷不悟甘心附逆者則天戈所至追悔何及嗚呼是非止此兩途禍福惟其自取人之愛國孰不如我竊願執鞭舞劍以從諸君之後云云後釋兵任總部參謀懋權武功朝邑澄城各縣知事不徇情以撓法又任臨時省議會議員著有澄縣續誌暨澄城附志一部民十八年再署武功縣篆卒於任年四十七

程步瀛

程步瀛字島三渭南人清末以貿易至四川加入同盟會辛亥歲鐵路風潮起嘗在川組織同志軍密謀舉事被當道遞解回籍各省請清廷開國會時充全陝工商會代表同赴北平民國紀元任陝西實業司科員六年靖國起三原任第四路參謀十五年任乾縣知事籌備糧秣供給國民一軍援陝各部隊解西安之圍十九年任陝西省政府參議二十一年卒於家年五十四子二士真天真弟步昇亦早入同盟會奔走革命辛亥光復隨曹印侯敢死軍充營管帶又充北路防禦軍營管帶靖國軍時任胡景翼部第十支隊副隊長後隨出關豫西之役以積勞歿於軍年四十八

郭 淩

郭浵字海樓，鄆陽人。初以縣學生肄業陝西大學堂，派充商州中學教員。景梅九介入同盟會，宣傳革命，常為清吏所注目。民元被選衆議院候補議員，護國之役，充東路討逆軍副司令。民六遞補衆議院議員，靖國軍興任第一路參謀，後歸鎮嵩軍，為麻振武參謀長，守同州。國民一軍，宋哲元攻之城破，被執遇害。年四十三。子二：長枏，次樟。

屈 正 南

屈正南，字古愚，一字穀如，興平人。西安府中學堂畢業，民元考入西北大學政治班，倜儻有大志，不為硜硜小節。於所習學科外，尤好研究歷史、興革及地理形要，熱心革命事業。師友多器許之。畢業後嘗服務政法兩界，然非其素願也。及靖軍興，諸將領多其平日舊識，乃從戎。張義安發難三原時，嘗參密議。旋任第三路副司令兼參謀長，扼守關山交口各地，與陳樹藩軍對抗數年。民十，第三路改編，東出關，遂棄兵遨遊京滬各地。黨人志士咸與交遊，客中編述陝西靖國軍戰紀，悉本當時親所見聞，持論公平，記載翔實。扶風溫天緯代為籌款印行。西北革命史徵即據為唯一之藍本。十二年歸陝，任白水縣知事。駐軍高峻，與劉鎮華部齟齬。劉命鎮嵩軍師長慾玉琨以全部壓迫高峻，棄軍離白，其

旅長梅發魁先驅至城下以正南爲靖國軍舊人甘言啗之至軍遂遇害年僅三十日論者惜之子羣民

余 欽 烈

余欽烈字繼文山西渾源人幼聰穎好讀書端謹寡言與人無忤憤清季政治腐敗國勢阽危蓄志改革棄文肄武初由山西武備學堂畢業東渡日本考入陸軍士官學校畢業復入帝國大學研習政治歸國後充陝西新軍教練與黨人南雪亭等過從甚密加入革命組織辛亥西安起義時嘗率部隊攻佔火藥局民國建元棄兵任南鄭縣知事年餘因憤袁世凱盜國復從戎旅參預護國之役民六因與同志謀討陳樹藩幾遭不測靖國軍起渭北乃潛赴三原任總司令部參謀聯絡各軍一致討陳多所盡力及靖國軍解散隨于總司令閻關赴滻執教上海大學嗣因黨軍經營北伐先期奉派密赴平津及西北盟旗各地聯合同志以爲響應十六年任第六方面軍軍務處長升參謀處長國民政府奠都南京當政諸公函電相邀欽烈以革命之功未成一入宦途易墮初志且感於國家建設之實際需要欲致力於公路電氣農田水利諸工程以在野之身爲革命作進一步之努力所謀均未實現感疾遽卒年四十二欽烈性仁厚而貌整肅既嫋武略尤精文

事在軍中日治事之暇手不釋卷雖懋經困蹟而沉靜堅毅志不少屈所爲詩文多激昂悲壯之音當病亟時猶自爲病中書歎一律云奔走連年歲又闌成塵往跡益悲酸高歌自惜馮驩老力作寧辭范叔寒慮到民間千點淚算來國計十分難人生最苦床頭死捲地橫潮湧起看亦足以見其志趣矣妻常柏青留學日本畢業服務教育多年西安女子師範學校半其手創長子立

郭 壇

郭壇字伯龍臨潼人初由邑庠生考入關中大學堂肄業懋充本縣及邠陽各學校教習善治事有口辯指陳事理娓娓動人辛亥時倡立鄉團保衛地方當道聞其才召主省垣電話局勇於任事尤精風鑑能於風塵中識人才當在鄉團時團丁不下百餘人特於衆中識郭秉誠林必祿李雲龍等嘗謂秉誠老成持重必祿智而多詐若雲龍者短小精悍忠勇耐苦異日必成偉器故獎借特至後秉誠以旅長終必祿至營長死於非命雲龍積功至陝西督軍悉如其言洪憲之役嘗使雲龍隨衆逐陝督陸建章事定雲龍以功任警備軍營長駐軍邠縣六年東南護法軍興陝軍多應之陳樹藩疑雲龍與有連使壇赴邠撫慰而陰約匪部郭金榜夜襲之踰垣而入攻營門雲龍夢中驚起賴壇在營中調

度搏戰至天明盡殲其衆獲數人訊之知爲樹藩所使急與雲龍引兵退至北山聞胡景翼已在三原樹靖國軍旗即使雲龍以所部歸之由是胡軍添一勁旅焉之功也張義安渡河進駐蒲陽村派雲龍攻魚化寨使還以少數兵居守後方護輜重鎮靜嚴密前方得以力戰無後顧之憂義安多其功贈以良馬胡景翼岳維峻皆先後倚重之任總部參謀又權知富平縣事十年雲龍隨景翼出關駐軍彰德迎還至軍優禮備至體素弱畏冷居半生感疾甚劇遂返里未幾卒年四十八雲龍撫其二子焉

同升

同升字文成渭南人清末廩庫生初任本縣財務局長廉潔自守嘗以節餘之財捐建財務公所一院知縣楊調元爲之題名署曰同室辛亥九月參加革命任東路節度使營務處長民五任陝西警備軍參謀長六年靖國軍興任糧台總辦兼第四路參謀生平好行俠義不以名利萦懷十六年以後臥疾家居抗戰事起每與人談及國事猶殷殷以革命成功爲念二十八年冬十月疾甚卒年五十五子二中保中定

王尙賢

王尙賢字振業高陵人幼讀書好王陽明之學清末加入同盟會辛亥陝西光復任

北路招討使井勿幕部參謀又任東路招討使李仲三部參謀共和成留學上海中國公學卒業五年歸陝參加護國討袁之役靖國軍興充陝軍代表間道赴川滇徧謁西南軍政當局嚴德基唐繼堯熊克武等請兵援陝得派葉荃第八軍北來各軍聲勢爲之一振及直軍入關各路圖保實力佯附曹吳尙賢獨以爲不可言不見聽遂拂衣歸里鬱憤成疾逾年逝世年三十三無子僅餘弱妻幼女狀甚蕭條云

張鴻道

張鴻道字夢賓高陵人遜清禮部主事辛亥反正棄職回陝加入革命民元充陝西省議會祕書長兼修史局編纂七年充陝靖國軍第三路祕書長十三年充河南省政府祕書十七年充國民軍第十軍祕書長鴻道自幼岐嶷有神童之譽十四歲能默誦十三經十六歲入邑庠弱冠中光緒甲午科舉人長於史學考究厯代法制文物沿革於杜佑通典馬端臨文獻通考司馬溫公資治通鑑均能精研其體系兼綜博覽熟於掌故爲時推重尤善爲駢散文下筆千言立就先後在各軍中重要文電皆出其手曹司令世英胡督辦景翼揚司令虎城皆倚重隆禮之十九年春以疾卒於家年五十六子二均業商女一歸民黨聞人華縣李秋軒

張士俊

張士俊字用章岐山人留學日本早稻田大學政治經濟科畢業民國六年回陝值靖國軍起三原卽往參加爲胡景翼所器重創辦三原師範學校卽今省立第三師範學校之前身也當時戎馬倥偬經費奇絀而苦心經營終底於成尤善演說能以精神感發人心諸生每一聆其訓話常有十年讀書不如一夕語之感先後數年積勞成疾十四年胡景翼任河南軍務督辦連電召士俊欲委以教育重任未行而胡遽殞是年冬士俊亦以疾歿於校長任年三十七男女學生千餘人無不失聲哭者及歸葬也各派代表送柩至其故里子三長來次福生次應生

毛元茂

毛元茂字樹穀三原人幼讀書不汲汲於仕進服務本縣教育機關以培養人材爲已任民七靖國軍興于總司令幕其賢能延任總部秘書出任高陵縣知事民十四年任國民二軍總司令部參謀十七年任中央法官懲戒委員會書記官常以衰老之軀治煩劇之事積勞致疾假歸就醫不兩月而卒年五十子二煥明煥武

蒙發源

蒙發源字浚生蒲城人幼穎悟入塾讀書塾師甚器重之年二十入邑庠有聲譽考入本省高等學堂肄業加入同盟會辛亥革命軍興掌理都督府文書民國二年出爲麟遊縣知事五年從曹世英討袁軍任參謀七年任陝靖國軍第三路參謀嘗從楊虎城支隊作戰武功扶風間後從楊部至榆林逾年復從楊南下十五年西安圍城之役任楊部參謀長居圍城中八閱月國民軍之北伐也虎城奉令東出使爲留守既而悉發後方部隊從至膠東十九年虎城率所部回陝主省政發源以養疴留滻移居漢口九一八事變作歸陝二十七年三月卒於三原年五十九發源性坦易生平無疾言遽色治理煩劇能任勞怨雖代人受過亦所不辭及退而閒居默如也時或有所感發間以寓之於詩詩亦不多傳予一念祖

武志文

武志文字遜齋華縣人本省師範學堂畢業辛亥起義時嘗在西安參加事定以勞任省垣南區及西區區長三年同李秋軒組織討袁軍任南路軍副司令兼參謀長五年六月隨李岐山出師河東與晉軍血戰猗氏榮河間奮不顧身遂亡於陣同死者有岳維峻另附靖國軍先烈岳維峻傳

李含芳

李含芳字可亭臨潼人生而秀整才辭辯富弱冠入省立高等學堂肄業適蒲城令李體仁以事毆辱縣學校師生關中士林駭憤含芳與同志數人運動省垣各學校相率罷課爲之呼援每當衆陳辭淚隨聲下羣情感動聲勢洶洶大府懼衆怒之不可遏也急撤李令職使人溫諭諸生事賴以平含芳之名由是大著民國既建被選爲第一屆國會衆議院議員隸國民黨籍值袁世凱謀帝制國會被解散憤而旋里糾合三輔豪俠同志起兵討袁屢瀕於危五年聞孫總理成立護法政府於廣州間關萬里以從之六年冬陝西靖國軍興數月戰無功含芳在滻密商同志推于右任歸陝總戎事含芳亦繼歸奔馳羣帥間調和共濟軍氣大振支柱戰事五年胡景翼率軍東出關含芳實參預密勿直奉戰起胡景翼密結馮煥章孫禹行定首都革命之謀常使含芳居間聯合遂共建立國民革命軍因曹锟驅吳佩孚事定隨胡入豫荐權鄭州商埠督辦十五年國民軍失利中原二軍李雲龍率殘部退陝劉鎮華率鎮嵩軍圍西安閱八月含芳隻身至甘肅綏遠一帶謁馮煥章求援東下解圍李雲龍部移戍商雒延爲參贊國民一軍既據陝甘以次剴除二軍各舊部李雲龍誓師討之與戰於潼關不利退守涇陽被圍數十日城垂破含芳促

李突圍出集援兵自居危城以待敵攻之急舍芳憑城自守力盡城破率部潰圍走又戰敗遂於途被執解省宋哲元問曰若反何也舍芳曰吾昔迎若以爲人也今汝殺同志殘同袍乃賊也不討賊無以對國家謝陝人吾事敗吾心盡矣辭甚決絕不屈遂遇害年四十五舍芳性恢闊廣交遊從軍政多年座上客常滿飲食徵逐無虛日及繫獄客盡散鮮能顧之者故吏大荔張瑞生收其骸骨爲之棺歎焉子二長名健次名敏女子二長適王次適某

左國寶

左國寶字善楚耀縣人弱冠肄業三原宏道學堂以言論立異爲當事所黜乃復攝影術往來達人碩士之間隱爲聯絡從事革命因井勿幕介入同盟會助鄒子良屯墾北山辛亥九月同胡景翼樊靈山諸人起兵耀縣樂王山響應省垣任陝北招討使行營參謀從攻河東潞村共和成留學日本入孫總理所設之浩然廬習軍事學民四歸國同曹俊夫諸人建護國軍於白水討袁遂陸逾年復辟事作復隨郭堅康指定等渡河北伐蜜建議於堅曰昔秦晉三戰秦只一勝形勢然也且陳氏對君其心叵測歸路阻絕深爲可慮堅不聽師遂潰六年靖國軍興任總司令部參謀往來各軍中調和衆志支持危局後

任國民軍第八師參謀駐洛陽國民二軍失利中原嘗說主帥以應變達權之計不見納。致全軍覆沒歸陝後厭心世事從事畎畝不復出國寶爲人沈默寡言勁氣內歛偶有所觸或以率直出之故所至不諧於衆性聰敏能爲詩文自河東敗歸後嘗悼宋相臣樊靈山兩同志有句云憶昔舟師渡河東獨我還時氣憂未靖舊事話何艱勁旅潰霍嶺英魂歸故山誰能收戰骨自問亦慚顏尤得溫厚之旨一十三年六月因駐軍王團譁變率鄉人與之抗竟與兩弟同遇害年四十九子二長民意次世民

武 鈞

武鈞字關石富平人少躊躇不事家人生產溷跡博場賭勝取贏但供二親甘旨所需則怡然自得偶越境賭大負博徒窺其囊空窘辱之博徒中有張蔭祺者奇鈞狀貌爲償所負語之曰若良家子不可再蹈此行也促令歸鈞感其義相約爲兄弟序年而兄事之既並立家室且同居焉壯歲喪親益無所顧忌常以賭鵠與鄰里少年相狎習尤喜報不平事以故遠近豪俠共聞鈞名爭欲識之并勿墓曹俊夫諸人先後自日本歸聞其名而招致之語以革命之事則大喜因介入同盟會由是折節改行積有餘貲盡散以結客鄉里健兒常溢於門辛亥西安革命起富平獄因向某哥老會黨也其徒刦出之推爲帥

一時亡命雲合勢張甚官紳惕息不可終日鈞挺身往見向某曉以大義其徒有姚青山者尤縱恣鈞指實其不法狀促向令斬之衆稍安帖鈞之名由是大噪而其行益端謹與文人賢士交親究心文事醫術宗康有爲尊魏卑唐之說而工於書博問強識鑑別書畫碑碣古玩遇可珍不惜重金以購之民國四年胡景翼擒陸建章子承武於富平事先設謀均以鈞爲主且徧招素相結聯者千餘人爲之助陳樹藩督陝授以督署副官辭而謝焉逾年靖國軍起三原陳胡兩軍夾渭水而陣各地土匪乘間擾民景翼使鈞督辦富平保衛團收撫其衆編爲騎兵團以鈞任團長既而胡被賺入省生死不可測鈞欲身往救之人皆以爲危勸其徐圖善計鈞曰笠僧吾刎頸交存亡與共焉有平時相親如手足一旦臨患難反坐視而不一加援手尙得謂之友乎吾計決矣死所不辭君等勿復言偕從者數人將發紀子文送之曰勉哉此行君爲笠僧倘不還吾亦爲君之行如君爲笠僧矣子文者鈞之同鄉密友亦早入同盟會而以革命爲職志者也鈞旣入省投刺請見樹藩樹藩異之間何來鈞曰陪景翼就戮耳樹藩矍然立召景翼出相見且餽多金約以不時至鈞退盡以金與諸從者使留省刺事已則乘駿足間道馳還徧告諸友人謀所以脫景翼者先是鈞之騎兵團與第四路第六支隊馮子明部同駐富平團軍需周某與馮部某

有怨某槍殺周疑鈞欲報之不能無戒備忌鈞者又居中爲離間詞遂成釁隙八年冬靖國軍于總司令巡視各縣軍政至富平紀子文任縣知事就署設謙邀鈞作陪席散歸甫出城門槍聲砰然遂遭狙擊殞命鈞性坦率出入未嘗以兵自衛故竟遇難年四十子夢名鈞死時尙幼其所同居之盟兄張蔭祺撫之成立

薛其昌

薛其昌字卜五耀縣人幼性穎悟肄業三原宏道學堂數年又入本省巡警學堂畢業治學重分類尙專精尤究心法律經濟期爲世用清宣統元年隨衆應貢試爲選拔生人以遠大期之其昌殊不屑意也辛亥九月朔西安反正郭希仁主持軍府大綱命各學校學生回鄉倡辦民團保衛桑梓每人發給小旗一面爲符信涇原富耀各縣學生結隊返里推其昌任沿途交際事老幼郊迎仔觀甚衆至三原集民商於南關永遠局宣佈省中真相及革命意義勸民衆剪除髮辮抵縣後簡選丁壯召集同志分任組織爲民軍聲援會黨張南輝聚衆數百人刦持官府橫行閻閻服知州朝服祭城隍人心惶懼莫知所措其昌助駐耀黨軍胡笠僧討平之旋參北路安撫使并勿幕軍勿幕率師援晉使其昌護使節略定同官共和告成返省垣與同人擴大組織同盟會支部被選臨時省議會

議員及第一屆省議會議員發言建議多樹風骨同列皆敬服之自民元以後陝中黨人行動分兩派一派出國求學一派留省城倡辦社會事業皆以服官從政爲可羞其昌屬後一派念戲劇與社會教育關係尤切乃與李仲特郭希仁楊西堂諸先進合同志數百人組織易俗學社意在改良社會觀念提高演員學生人格藉以移風易俗而不以營利爲目的規劃經營皆其昌一身親之社務甚有起色民國二年其昌赴_{濟南}爲社中添製新箱以社務交于鶴九經理鶴九家淳化坊里鎮與其昌居相隣幼相善也顧性疎放不善治事喜用財數月間社中多虧折及其昌歸有媒孽鶴九短長者鶴九歸社中賬項未能清交其昌滋不悅然以交厚亦未與之較及二次革命失敗孫總理組織中華革命黨於日本以宋相臣主陝事又先後派曹俊夫吳希真樊靈山諸人歸陝運動鶴九加入而其昌未與因有疑其昌爲帝黨作偵探者同志多不信之其昌聞之灰心世事家居不出護國軍時嘗佐胡笠僧軍於富平見平昔諸友甚淡視之復返省垣仍盡力經營易俗社事及靖國軍起三原陳樹藩頗疑其昌與胡通派人監視甚嚴其昌亦深憤護國一役諸友之疎已也思欲得當以明志遂微服出省至三原晤笠僧時倉卒起事大軍雲集而餉事無着以其昌長於理財因任爲靖國軍經理財政處處長其昌悉心擘劃創立條規分配

各軍餉項皆得其平人咸無異言時當創制之始處內人員無多其昌亦欲明悉各縣財政情形作整理改進之依據藉提款親赴各縣觀察民國八年五月自富平解款回三原至瓦窯頭停車進食突來兵士數人持槍擊之登時殞命而所解之款未失分文年三十三事後人言噴噴或謂與鶴九有連亦臆測之辭也弟克昌字後三勤學好問贊助其昌運動革命不惜家財護國護法兩役黨人祕密往來淳耀間者無論識與不識均以禮延接款待無虛日其昌死後克昌暗購手槍欲爲復讐亦爲怨家所殺年二十五

于鳴皋

于鳴皋字鶴九淳化人幼讀書頭角嶄露鄉人號爲珍珠子清末入省會巡警學堂畢業宋相臣井勿幕啣孫中山先生命先後歸陝組西北同盟會支部鳴皋首先加入性疎放富膽略遇英豪賢俊傾肝膽相結辛亥西安義軍起鳴皋所居與三水境毗連乃練鄉團修碉堡督勵鄉民人居固守已則至三原見井勿幕入省見郭希仁指陳形勢務使軍民併力以禦敵共和告成漫遊京滬民四與宋相臣樊靈山曹俊夫諸人於富耀各縣陰結志士密組討袁軍旋隨郭堅曹俊夫各部入陝北與胡景翼軍共逐陸建章陳樹藩繼任陝督委權郿縣知事漫應之居久不赴任日惟酒食徵逐流連無定所旋以樹藩附

北洋軍閥西南各省起師護法陰與同志磋商謀所以應之者自高峻起白水耿直劉錫
麌起省垣均先後失利鳴皋陰察陝西軍事重心在胡景翼因說曹俊夫與胡合作就胡
第與約共樹義幟討樹藩未幾張義安發難三原俊夫駐耀縣得胡函急開兵赴援倉卒
間旗幟印信皆未素備鳴皋手揮口論咄嗟之頃軍容一新遂建靖國軍旗與曹偕至三
原城內戰正烈富平馳援之騎兵始至而曹部全軍已加入作戰矣其應變敏捷率類此
三原戰事結束鳴皋促胡曹速以全部渡河一鼓下省城均不聽必俟總司令名義定後
方開兵桂再四五日而樹藩軍已來攻鳴皋奔走諸將間請先退敵再議其他時諸將意
氣皆甚盛張義安尤憤激率所部先自西路渡河直攻省城曹部亦由高陵渡河趨東道
鳴皋佐曹軍與樹藩軍戰於新築鎮光台廟十里鋪前鋒已入東關時胡曹各稱總司令
郭堅高峻等亦如之造謠者謂胡志在剪除異己藉諸軍爲驅除前線軍心因之搖動皆
思各保實力不復壹志作戰潰退渭北會在滻諸黨人聞其事憂之議擁戴于右任歸陝
總領師于鳴皋與劉允丞楊子廉諸人因共竭力促成之由是陝靖國軍始成統一之局
轉戰五年氣不少衰實以此舉爲樞紐而鳴皋奔走遊說之力居多焉于右任既總戎政
任鳴皋爲總司令部參議嘗爲于道諸軍離合之狀午夜促膝苦思所以團結者顧終不

能見諒於各方戰局陷于停滯自是常居三原不復奔走各軍中而惟盡力於社會事業創辦靖國軍戰事月刊以靈通國內外各消息介紹最新思想學說欲令獻身革命諸人知有國家知有世界以祛其蔽私之惑兼對軍事得失批評指正不少隱諱對主張與敵謀妥協者尤抨擊之不遺餘力陝靖國軍之有報紙自鳴皋始也皋既屢履艱險目觀當時權利之爭及閭閻凋殘之苦內心極為感傷七年以後因寄情阿芙蓉以自遣娛嘗昏睡經月不起起則圖作書畫篆刻胸有牢騷意有寄託故藝事無師自精朋輩中有勸其戒烟者鳴皋當報以呵呵人莫測其意之所在惟對知己偶一流露其不得已之衷而已。鳴皋所部二淳子弟由其弟鳴崗率之編入第三路曹俊夫部多鄉里豪俠桀驁難馴戰事久失律者尤多民間有怨聲又以胡曹意見簸弄者時相牽率遂漸為有力者所嫉視九年秋胡景翼自省歸任靖國軍全軍總指揮而直軍部將閻相文等入陝于總司令整飭各部屢重攻省垣時鳴皋旋已半載于馳函招令來原商大計有譖鳴皋於胡者胡亦連函促之鳴皋憂讒畏譏欲作關外之行得于胡函催遂坦然入三原擬籌視諸友而後行十月四日率弁從數人赴總指揮部謁胡出而第四路司令岳維峻已派兵在指揮部周圍布置鳴皋知將不利於已也亟避入友人李可亭家入李母室岳部兵尾隨而至

發槍擊之幾中李母所帶弁兵已被繳械或擊斃鳴皋至是子然一身執手槍堵室門口無敢近者自上午八時至下午二時無人營救而所持槍僅餘一彈旋見兵士有穴牆以槍來擊者知不能免因以餘彈自戕死年三十三

李福蔭

李福蔭字春堂涇陽人年十七入西安實業中學堂肄業得識宋相臣授以民報諸刊物因有革命思想辛亥光復省垣各學校組織學生隊福蔭預焉共和告成游學滬寧初入南京大學繼轉上海震旦學院功課輒冠其曹二次革命後由宋相臣介入中華革命黨民四返陝與薛西軒熊子輝等密組討袁軍於涇陽醴泉間及逐陸事定從郭希仁劉允承等講學西安助宋相臣組織樂羣學社以道義學問相砥礪陳樹藩諭附安福系解散國會福蔭往來曹世英胡景翼諸軍中爲聯結尤與張義安董振五友善助義安發難三原靖國軍既建福蔭初充左翼軍參謀凡所策畫悉中竅要主帥倚之如左右手于總司令成立靖國軍總司令部任爲參謀軍政大計悉以諮之嘗於戰事日報撰文批評時事得失又自組正義日報闡發理論介紹中外學說對社會主義尤多理解戰事持久各軍競保實力福蔭曲譬善喻擴其心胸促其進取每當危疑震撼之交尤能片言隻語

把握事件核心使時局歸於安定凡敵人之離間奸黨之挑撥雖能搖動一時而終不至興大風作大浪者福蔭析解明辨之力居多然以語言鋒利辭氣激昂亦不免稍稍府怨民十直軍入關協同靖國軍驅除陳樹藩閻相文馮玉祥先後督陝胡景翼曹世英各部均受偏于總司令在三原北之東里堡集同志諸人謀所以保持革命殘局者一時有覆曹倒胡之醞釀曹部第二支隊長石象儀起高陵逐世英其第三支隊長王祥生亦爲其部下馬青苑甄士仁等驅逐出交口曹王均避居通遠坊天主堂福蔭與曹同鑿張氏爲僚婿與王亦至交時謠言甚熾謂于氏東里之謀福蔭實爲主動故曹王均甚恨之顧福蔭終不能忍於曹王親至通遠坊慰藉之晤談之頃見曹王意甚冷落迥異平昔越宿辭歸至中途忽有騎自後來追下輿視之則王之連長宋某也方欲問訊宋遽發槍擊之死年二十八

李文華

李文華字光如渭南人本縣高小學校畢業胡景翼介入同盟會辛亥起義從井勿幕出師河東充游擊隊長共和既奠從事教育民六靖國軍興復出而從戎任帮辦關山防務及駐涇陽財政委員時靖國軍各部子彈缺乏軍事當局決計收買事爲敵方偵悉

陰使人以炸藥裝製子彈中暗售之襲毀靖國軍全部槍械文華嘗主其事固疑其詐因卽親自檢查試驗彈果爆發炸傷兩手暈絕復蘇者再于總司令親臨慰視歎曰君傷誠慘然全軍得以免禍君之功亦大矣時民國八年二月二十一日也後遂以殘廢終其身子三清權清樂民權

王 崇 瑞

王崇瑞字祥生咸陽人父爲縣學生員崇瑞幼從父讀書強記善悟及長入本省陸軍學堂肄業加入同盟會辛亥之役嘗率民團助義軍與清軍戰所在有功共和成入清河陸軍預備學校一年適二次革命起輶學赴滬時陝西資送日本留學生百餘人亦在滬監督宋相臣與曹俊夫等謀組學生軍助戰崇瑞頃焉二次革命旋敗乃隨宋曹等亡命日本加入中華革命黨入陸軍預備學校陸軍預備學校者孫總理鑒於本黨政治軍事人材之缺乏而倡設者也民國三年復自日本歸與王紹文等謀組討袁軍事洩紹文等十餘人被捕遇害崇瑞逃聞景梅九被逮檻送北京召合同志多人欲刦於途至渭南不及乃走白水時曹俊夫運動討袁聯絡頗廣欲以白水民團高峻所部爲主力崇瑞適至高部與駐軍衝突駐軍退入文廟高圍之迫令繳械崇瑞攀垣而登奪其槍二高以其

輕身勇銳使人止之旋同高曹及郭堅耿直等部南下攻蒲城不克遂同入陝北初孫總理在日本先以陝西軍事屬曹胡曹聯絡各地黨人胡投身陳樹藩第四混成旅圖握實權然後大舉意相左不相謀也曹既入陝北攻城略地崇瑞輒爲前鋒其時軍中以善戰聞者如耿直王狂等崇瑞皆與之齊名及陸建章敗走陳樹藩爲陝督編曹部爲騎兵團崇瑞任團副張義安發難三原曹使崇瑞率騎兵兩連爲先驅自耀縣來援夜行甚速遂却外敵曹俊夫旣爲靖國軍左翼總司令以舊騎兵團改爲支隊使崇瑞率之與樹藩軍戰於長安東其新編之趙樹勳劉錫麌各部皆務爲保全實力不肯用命獨崇瑞與楊懿部奮勇力戰敵我衆寡懸殊故渡河二次皆無功會劉鎮華以鎮嵩軍來助樹藩敵勢復張左翼軍旣退渭北同時張義安亦陣亡於鄂樹藩以爲靖國軍易與耳乃傾其所部及鎮嵩軍自渭南渡河以搗靖國軍之背其告民衆書有自信軍威指日可以掃蕩巢穴之語旋岳維峻率部出相橋田市曹俊夫亦率楊懿及崇瑞兩部出關山以禦之樹藩知岳部素精練而曹多新附也攻之尤急關山東有界坊清寺皆爲關山保障崇瑞與楊懿分守之爲犄角之勢樹藩以十倍之衆攻之四五日不能下乃退去此役也實靖國軍初期存亡之關鍵其後崇瑞駐守交口敗北洋軍第四旅張錫元事載戰守紀要中靖國軍與

敵相持數年其後直軍入關樹藩敗走而靖國軍亦瓦解馮玉祥既編胡部爲陝西陸軍第一師又欲編曹部曹意猶豫部下驟起逐之並及崇瑞崇瑞遂隨曹率其餘部從出關任陝西陸軍第二混成旅第二團團長胡景翼督豫命赴禹州收編舊部胡慤豫西戰起禹州土匪持地域之見皆附慤而抗胡以崇瑞爲胡委也突攻之崇瑞幾爲所窘急召所部討平之禹州賴以安黨慤者銜之譖於胡謂崇瑞剝殺民團胡不察竟以軍法殺崇瑞謝豫人陝軍同人皆冤之時爲民國十四年春

程 煥 奎

程煥奎字星五咸陽人甘肅陸軍小學畢業加入同盟會辛亥西安義軍起與同學多人參加初任炸彈隊隊長轉戰乾醴屢立戰功民國建元保送天津武備學堂升入保定軍官學校第二期騎兵科畢業二次革命時潛至上海奉黨中密令担负西北軍事工作陸建章督陝搜殺黨人煥奎幾遭不測旋任新編騎兵營連長與景翼諸人共逐建章六年冬任陝靖國軍曹世英部騎兵連長七年駐守交口兩金嘗以一連兵敗敵一旅之衆於施家坡由是聲名大噪以功遷營長助世英創設經武學校於高陵自任教育長訓練人材多所成就十三年隨曹出關剿匪河南禹州寶豐間身陷重圍卒獲大勝豫西一

帶遂以安靖及胡景翼殺王崇瑞煥奎以厯經百戰之身屢受刺激神經失常十四年解兵就醫北平協和醫院旋返里靜養二十四年卒於家年五十一子麟徵

熊 占 標

熊占標字鈞山原籍湖北竹山清季以水災隨父來陝西占籍長安遂爲長安人時當中東諸戰役後憤國事不振投身軍界選送廣東將弁學堂畢業任武匡軍右旗第一大隊第三隊長剿匪雲貴各省以勇敢聞當在軍時即連結革命同志謀於粵中舉事未果辛亥前一年返陝參加新軍密謀起義後任秦隴復漢軍砲軍第一標二營管帶往來東西兩路作戰共成任陸軍第一師一團二營營長陸建章入陝後第一師全部被裁撤家居養親旋從胡景翼治兵商州龍駒寨靖國軍興任砲兵二連連長守相橋北洋第十四混成旅張錫元以全旅之衆來攻占標與蔣世傑登城巡視笑指曰東南墳園係敵砲兵陣地請視吾砲因卽描準一發蹲伏之敵兵數十無一生還者一時轟傳爲神砲十一年直奉之戰景翼隨直軍出關東援占標私謂胡曰吾儕夙志革命何反效忠軍閥胡曰兄但聽吾命勿多慮乃領之遂攻克八郎砦金台子上岡姚莊諸堅壘事定任砲兵一營營長代理團長駐順德十三年直奉再戰師次通州抵遵化胡與馮孫遂同建國民軍

占標乃笑謂幕友曰四年疑竇今始釋然矣旋任國民二軍砲兵第一團團長隨胡至豫作戰鞏洛間獲敵輜重無算十五年陝州之役二軍多潰散惟占標所領砲兵團獨完整返三原改任第三師砲兵三團團長十五年劉鎮華圍西安急楊虎城致函朱子敏召占標占標曰三原爲靖國軍發源地且田師長係胡公老部與岳並肩吾亦胡岳舊屬靖國軍部曲不忍棄此而他去也浼朱婉謝之敵圍三原逼近城郊占標移炮城堞間日環城調匣射城賴以全岳維峻歸陝復任國民軍第二集團軍南路軍砲兵團團長移駐南陽年餘因公返陝步隊東遷遂梗不復出抗戰軍興每以年老不能殺敵報國爲憾聞前方戰事勝利則喜敗則憂形於色三十年冬十月以疾卒於家年六十二生平事母至孝軍中稱爲熊孝子馭軍嚴而有恩故士兵皆樂爲之用一子名道

雷雲西

雷雲西字龍溪白水人初力農爲俠於鄉里民五護國軍興與兄東祿從高峻曹世莫轉戰陝北俱以勇敢知名甘泉之役東祿戰死雲西旋與劉錫麌歸陳樹藩六年冬與錫麌耿直發難西安討樹藩敗走岐山與敵血戰入日夜復隨耿劉東趨白水聞三原靖國軍旣建即南至高陵任靖國軍左翼總司令曹世英第二支隊第一營營長大破樹藩

軍於灞橋七年錫礪隨郭堅西略鳳翔雲西以所部歸高峻編爲靖國軍第五路騎兵團駐防白水蒲城駐軍緣保傑以樹藩命來攻雲西率隊禦於雷村流彈貫臂營長雷鎮犧陣亡全軍幾瀕於危卒以鎮靜全師而退旋奉峻命駐防郃陽十三年鎮嵩軍與峻齟齬以大軍來攻澄城白水相繼淪陷惟郃陽固守數月敵不得逞嗣以孤城無援乃舉所部降麻振武振武字允文渭南人舊爲郭堅驍將郭死靖國軍解散始歸鎮嵩軍爲第六路分統雲西既與有舊且同爲陝人勢屈降敵仍冀有後圖也時高峻已離陝遠去其遺部多詣雲西驟增四營之衆振武因以雲西子第二旅旅長而雲西則因陰結李虎臣謀乘機反正逾年六月郃陽趙桂棠據靈村邀雲西有所議雲西欲悉峻行蹤徑往詣之部下請爲戒備雲西瞋目曰汝以桂棠爲豺虎耶吾以指探其口料渠不敢咬也竟隨數弁行至則密語竟日臨行出營門伏槍四面起遂遇害年三十七振武聞雲西死哀痛不自勝爲之全軍縞素者累日也

田 西 軒

田西軒白水人清末入西安陸軍中學堂肄業辛亥起義隨衆攻克滿城護國討袁之役從彭世安驅逐陝督陸建章任參謀後調督署中校副官民國六年耿直劉錫礪起

兵討陳樹藩兵敗出走岐鳳樹藩疑西軒與耿劉勾結陰謀圖已使人刺殺之於蓮湖年三十一子師友

馮仲裕

馮仲裕長安人篤信樸誠忠於任事辛亥西安起義嘗隨民軍東西兩路作戰以勇敢聞民元加入國民黨陝支部擔任重要工作與郭希仁吳希真王紹文姚樹陔諸人皆相友善任西安同志小學教員數年循循善誘諸生悅服袁世凱謀帝制仲裕聯合同志欲驅逐陝督陸建章以剪袁氏羽翼謀洩出亡陳樹藩督陝後乃入講武堂肄習軍事期滿又入教育團實地練習作戰技能及靖軍起三原仲裕隨軍在潼關與同志多人謀響應事洩被團長馬錫藩所殺年三十一遽腹子某

楊瑞亭

楊瑞亭靖邊人少倜儻有大志外樸訥而內剛毅初肄業西安師範學堂與同邑劉文卿加入同盟會並介紹鄭思誠爲會員在陝北一帶從事革命工作民國元年被選爲陝臨時省議會議員旋任鄭思誠部教練官鄭解職瑞亭赴天津因運動討袁被捕入獄袁死始得釋靖國軍時任第六路盧占魁支隊長後隨滇軍葉荃入四川輾轉至粵謁

孫總理奉派返陝與西北革命黨人聯絡國民軍興任第三軍團長又任鄭思誠部交際處長鄭敗從赴河南至滑縣爲當地紅槍會所害年四十二長耀次歲

梁國璋

梁國璋字烈伯蒲城人本縣高小學堂畢業因井勿幕胡景翼諸人介入同盟會聯絡青年密謀革命辛亥之役任東路節度使陳樹藩哨官從軍攻克運城討袁護國之役頗立戰功民六自陳部棄職加入靖國軍任胡景翼部騎兵二營營長樹藩攻興市國璋與戰月餘彈盡援絕竟亡於陣年二十七子二指南任傑

張九才

張九才字餘三甘肅環縣人性果毅遇事敢爲民國初年地方多故邑人士公推主團練剿匪除奸環民稱頌四年縣官李某貪暴淫虛人民苦之又欲強奪民女爲妾輿情譁然九才往勸阻反受斥責且聲言將不利於九才九才憤極格殺之閭邑稱快然事出非常大府檄重兵往剿九才奔塞外環民從者千餘陝西靖國軍興九才隨盧占魁部南下任第六騎兵團長作戰渭北屢著伐勞及盧隨滇軍西去九才率所部歸涇陽田玉潔仍任騎兵團團長國民軍時任第十一路第二旅旅長留守涇陽奉令與方振武攻克同

州口不言功十六年秋甘軍黃得貴韓有祿爲宋哲元所逼轉戰東來以與九才鄉里舊識因舉所部附之宋軍旋襲涇陽已入城九才與有祿力戰郤之相持月餘有祿陣亡九才亦傷病垂危部下昇之至馬鴻賓營已不能言數日卒年五十四衆遂以城降時論比之南唐劉仁瞻云

李德陞

李德陞字子高蒲城人爲人沈毅敦氣節重然諾嘗聞人談革命忻然曰此丈夫事當爲之卽起糾合豪俊以善騎射擊必命中間其曹爲井勿幕所知署隊長從役河東辛亥事訖入同州軍官教練營畢業隨陳樹藩興白狼於醴泉護國之役與湯虎城結勇士千人人自爲戰聞名二華同朝間靖國軍興從虎城爲營長靡役不與而光台廟之捷則率隊孤征興市之克則獨先登關山界坊之戰則獨身屢戰八晝夜不少休馬嵬武功之役則僅率兩營當直皖豫三師兩旅之衆狃伺奔刦裏創血戰者四十餘日聲援並絕幾以身殉乃謀於虎城曰戰事劇烈未有如今日者靖國軍各部皆撤退于總司令遣大民軍起德陞擁虎城南行收復失地遂北岐山鳳翔間鎮嵩軍再入潼關關西大震德陞

贊虎城入西安併力決守已則居守三原同時被圍自夏徂冬外援阻絕六閱月出奇犯難卒破強敵城圍解而疾作醫未及利而虎城請纓北伐出次山東德陞聞師期輒諱疾欲任前驅臥輿中以師來會虎城止之不可強以後勁託之及虎城駐守南陽奉令躡伊洛定關中德陞獨留宛簡練卒伍翊衛統一積功至陸軍中將國民革命軍第十軍副軍長日夜規計軍實寢嘵皆殺賊報國事戰每捷報未至恆先時語人其精誠如此初起寒微愛才如飢渴解衣推食急人之急與人再面輒得其心人之有技若已有之自始義及居陝北時結納才士惟日不足凡所推引後皆自致功名民國十七年十月三十日以勞疾卒年五十家無餘財子安民女高彌並幼仰卹助以存活

蕭 榮 綏

蕭榮綏字西成邠陽人清季以廩庠生畢業三原宏道學堂歷充榆林同州各中學教員辛亥入秦隴復漢軍東路大督都張鈎幕爲參贊兼潼關縣知事調任大荔縣知事護國之役充東路討逆軍副司令靖國軍興任第一路營務處處長奉于總司令命監降將賈福堂軍於興平福堂旋叛囚榮綏送陳樹藩殺之年三十七榮綏爲人放誕不羈多奇謀饒膽略尤善爲文言辭甚辯爲靖國軍中堅份子樹藩既恨且畏使人說福堂許以

十萬金索之福堂貪婪忘義遂以檻車解榮綬及營務處副官張在璇送長安在璇中途被害榮綬見樹藩面斥其禍國狀遂及於難當福堂初萌異志時或勸榮綬去榮綬不聽曰興平爲西路門戶我在福堂猶有所憚我去則興平非復靖國軍有矣且吾人讀書所學何事見危授命儒者本色怯懦如是甯有濟耶故福堂先死榮綬而後叛靖國軍榮綬死時其母年已八十五猶在堂子鴻基

李秀實

李秀實字秋軒華縣人畢業本縣高等小學性慷慨好交遊會辛亥起義棄學從軍充某部書記官共和告成各軍裁編秀實入本省軍官學校肄業憤袁世凱盜國加入中華革命黨與王紹文等密組五路討袁軍自任東路司令景梅九被執檻送京師秀實聯絡同志謀於要路期奪之因護衛甚嚴未果乃與曹俊夫樹義旗於白水是爲護國之役靖國軍興任第三路參謀與敵作戰於關山興市各地嗣任楊虎城部參議隨于總司令轉戰武功嘗主靖國軍作戰到底寧失敗毋自屈謂六載革命爭此一結也于甚隉之後由南京致函猶道及此二語十五年劉鎮華圍西安秀實同在圍城中助守解圍後楊虎城部改編陝軍第一師任副師長雙十二事變後退隱於家民國三十四年卒年五十一

弟季石字明軒民十六年清黨時任陝西省黨部調查股主任奉派歸本縣工作爲反動者所戕年二十六

張維直

張維直字愚生臨潼人天性穎悟年未冠入邑庠肄業本縣橫渠書院與同學曹印侯梁夢西劉藹如俱以能文名於時富平張扶萬先生時爲院長以經世致用之學倡導諸生而書院又爲宋儒張橫渠講學地維直由是激發希志高遠邑令李雲生課其文擢送西安師範學堂畢業後選充本縣學堂教習旋與郭英夫李疇風結伴西行出玉門抵迪化上書新省當道主張維新自強保固邊圉新城土晉卿樹枏時爲新疆布政司奇其文延爲西席未幾辭去更西行二千里至伊犁投身教育文化事業日與各界革命黨人相結納創刊伊犁白話日報領導輿論所撰文字有如長江大河一瀉千里讀者莫不擊節伊犁光復賴此鼓吹之力爲多民國二年新省局勢改變維直返里膺本縣學校國文教習護國軍興天水鄧寶珊素稔其才荐充胡公笠僧記室一時書檄文告咸出其手靖國軍時出任同官縣知事後隨胡軍東出關皆常在胡公左右筦寧樞要隨至開封委司權務嗣是北游平津十六年後返陝隱居三原杜門謝客嘗撰靖國軍戰史稿未及半因

事中輟民國三十四年疾卒年六十一無子撫姪孫木鐸爲嗣

靳 經 國

靳經國字伯綸河南嵩縣人初入保定陸軍學堂肄業辛亥首義從井勿幕起兵渭北擢敵陷陣所向有功人以蜀漢魏延比之癸丑丙辰之間無役不預靖國軍時任第四路騎兵營營長從張義安戰陳樹藩於省南大小雁塔後率軍駐同官在中官間與田維勤戰恃勇先驅竟歿於陣年三十九

胡 亮 天

胡亮天字德夫山西五台人少穎悟能自奮於學年十七入太原陸軍小學肄業言論豐采迥絕流俗爲同儕所愛敬崞縣續桐溪爲山右黨人領袖亮天以同期生續範亭之介得與交識縱談時事感中肯綮桐溪深器之由是密謀奔走賴其力以接連者益多辛亥山西義師起桐溪經營大同往來并代間亮天常左右之民元與黨人郭宗道同遊淮上因入陸軍第十九師師長孫禹行幕禹行奉命討伐張勳亮天與宗道皆參其軍及孫不得志亮天歸晉爲桐溪道其爲人直諒識大體續孫聲氣以通袁世凱當國誅鋤國民黨人隱有叛國之志時亮天遊京津與孫禹行圖二次革命禹行命歸晉與桐溪及史

可軒等密謀響應事洩桐溪等走河西亮天偕範亭潛赴天津聞陝西黨人郭希仁講學華山之楊家園約禹行往依之而桐溪等已先至同志中如胡笠僧劉允丞鄧寶珊董振五劉藹如等均不時往還密商革命方略華下人才稱極盛西北革命事業多發軔於此時民四陸建章督陝防閑黨人殺戮尤多亮天與李岐山景梅九鄧寶珊董振五等起義渭北已入富平以兵單勢孤爲陸所敗李鄧等均跳免亮天與梅九同被執梅九解東亮天亦下長安獄同志被幽囚者尤衆長安黨人王紹文等糾合同志謀劫獄潛運炸彈入城爲城門守兵所覺紹文被難同志死者二十餘人民五洪憲改元曹俊夫王幹臣高峯五郭方剛等起兵蒲白間略地陝北胡笠僧亦在富平舉事破建章軍擒陸子承武陳樹藩乘機樹護國軍旗與陸議和陸走義軍入省亮天始得釋亮天在獄中時病幾死適同志扶風王誠齋亦以王紹文等牽連在獄中誠齋精岐黃之術與亮天同隸囹圄爲之盡力調治良久乃愈是時袁世凱猶未死亮天出獄後旋與李岐山續桐溪馮欽哉李養初等率衆百餘人渡河入山西以聲討之下榮河猗氏等縣復爲晉軍所敗既而袁死遂與桐溪同入北京居代郡館日以學問相切磋陝北大俠高志清稱雄三邊時與黨人通聲氣亮天與馮欽哉間道走訪抵掌談歡恨相見之晚未幾安福黨解散國會兩廣西南羣

起護法陝中黨人謀響應亮天由陝北南下依曹俊夫於耀縣及靖國軍起三原遂爲曹部參謀長常偕曹部支隊長楊虎城和協內外出入戰場虎城依之如左右手及曹受直軍編虎城不苟同亮天獻贊之力尤多十三年馮玉祥胡景翼孫禹行建立國民革命軍於首都因賄選總統曹锟亮天任國民軍第三軍第二補充旅旅長轉戰冀豫各地年餘國奉之戰國民軍敗退南口亮天隨同第三軍攻應縣渾源不克轉向後套五原欲趨寧夏至石嘴子國民一軍部將石友三等布防要隘攔截三軍進路繳收其槍亮天以同室操戈羞與爭乃率所部渡河走陝北飢凍逃亡纔餘數百人旋南下至渭北時國民二軍殘部田玉潔駐涇原一軍師長宋哲元襲攻之亮天目擊同黨相殘殆無人性憤甚因助玉潔與戰兵敗被執爲宋所殺年三十五歲時民國十六年七月也

弓富魁

弓富魁字海亭山西崞縣人性倜儻喜任俠初入毅軍馬玉琨營爲騎兵憤入國聯軍蹣跚京師因亡走塞外結連同志往來居庸昌平間以圖規復和議成潛居歸化因續西峯介紹入同盟會辛亥太原光復與西峯響應革命於忻代甯武間稱公團率衆敗毅軍米振標於懷化遂據大同袁世凱使陳希義率毅軍三師之衆來攻不得逞當是時清

兵攻陷娘子關晉民軍司令閻錫山北走偏關塞外豪傑響應者旬日間得衆萬餘勢復振遂藉以爲戡定之資皆富魁素所結識者也共和既奠公團被解散富魁歸里組萬春劇社陰蓄同志以備緩急癸丑討袁軍興晉當道疑富魁與南方黨人有連捕之復亡走保定主於孫禹行家會包頭晉軍譁變有傳富魁爲主動者盧古魁因假其名於河套糾合數千人時與晉綏軍衝突且使人跡富魁迎之至包頭奉爲謀主六年冬聞陝靖國軍起遂與盧衆南下至耀縣受胡景翼指揮于總司令視事後編其軍爲靖國軍第六路以富魁爲總指揮當率之以作戰六路多騎兵工於馬上刺擊每戰與敵守壘塹以相抗者輒縱馬以蹴之飄蕩越逸彈如雨下敵兵彈不及再發而已爲所蹙由是辮子軍之名遂顯蓋盧兵猶沿蒙古舊俗蓄辮也七年春與姜宏模之兵戰於下邽幾擒宏模又東解羌白之圍與郭堅耀馬於同州繞城數匝城內守軍伏不敢動旋復應胡景翼約自渭橋渡河攻西安旣畢渡矣胡偵知敵有備而返不及召先渡者因令前驅崔式卿與合力東走以游擊爲歸計遇敵於零口擊却之復東進據鴻門堡擊敗新豐之敵乘夜東行轉入臨潼山南比曉抵藍田越日至靈屋晤樊鍾秀又越日浮馬渡渭復返三原時人稱爲飛將軍是年秋七月樹藩軍復攻羌白富魁與三五兩路兵往援相持於龍陽五十餘日郭堅

旋棄羌白突圍出約富魁會師西行略地爲根據方是時樹藩盡集勁兵於渭北不虞二
六兩路之遽轉而西也郭盧既西攻乾縣下之郭居乾使富魁居扶風岐
郿各縣守兵聞風相繼遁因合攻鳳翔守軍張東生晉人也以鄉誼納城降而漢軍葉荃
適由川來援至鳳翔靖國軍總指揮井勿幕副司令張伯英均來迎勞並議以大軍攻武
功時西路各縣盡爲靖國軍所有樹藩將張飛生扼守武功富魁與葉郭兩部會於扶風
之杏林鎮拂曉攻之戰於武功西原互有勝負而奉軍許蘭州忽自東來攻與相持於扶
武間者數十日八年春續西峯隨呂漢羣軍自川來援至沔縣使人問道召富魁因以所
部交盧占魁與友人史可軒胡德甫馮欽哉武勉之等抵岐山之高店郭堅親往留之嗣
聞呂軍還川不果往未幾南北政府派員來劃界戰事停頓因復返三原胡景翼東出關
以富魁任騎兵團長東援直軍破趙調之兵於開封鄭州間所至皆爲前鋒直奉二次戰
起奉胡命出嘉峪口與奉軍戰及胡回戈首部囚曹錫驅走吳佩孚改建國民軍富魁任
國民二軍第二旅旅長駐防彰德十五年岳維峻使李乾三攻山東使鄧寶珊攻河北寶
珊抵彰德與富魁計曰若截斷津浦路線使直魯不得相爲應援則勝矣德州爲津浦間
重鎮兵工廠在焉且居濟南天津之間能奪而有之者非君莫屬富魁諾卽率師北發抵

石莊轉而東驅至德州一鼓下之以援兵不繼退駐泊頭然津浦路因之中斷寶珊得以攻天津者無南顧憂也十五年國民二軍攻山東久不下吳佩孚乘勢起鄂北與奉軍合攻國民軍岳維峻軍潰於豫中奉軍亟攻京津富魁隨一二軍退守南口晉閻素附吳張國民軍受其威脅南口各軍因轉而大舉攻晉富魁率部由涿鹿出發圍攻蔚縣不克復西進攻克廣靈靈邱抵平型關以功晉國民軍第四師師長後因奉軍進據多倫乃隨諸軍退守五原五原爲富魁舊遊地老友舊部聞風興起聲勢復大振張宗昌密遣人以綏遠都統並二十萬犒軍費招富魁降人使數至皆峻拒之由是升任國民軍第六軍軍長使率所部援陝至石咀子被國民一軍別部阻截繳械改任國民軍左參贊十六年至西安聞武漢政府成立往投之至老河口爲吳部張聯陞所遮而返移居鄭州時楊虎城駐軍歸德召之不往南遊滻寧十七年隨北伐軍至北平遂家焉十九年國民政府任爲山西招撫使二十二年招集舊部參加抗日爲北平當局所忌拘係之旋得釋七七事變作移家西安三十三年三月以疾卒年五十四富魁早失怙事母至孝少時與人鬭無能遏之者獨聞母一言卽解人比於古之專諸壯遊時凌蹠飛揚抉籬敗防不能拘以禮法然每遇大節則辭就皆不苟國民軍潰敗後獨擁二軍幟轉戰數千里軍無宿糧士有飢色

窮蹙不可名狀猶敝屣都統之尊以土苴視二十萬金其志節可見矣所屬騎兵皆亡命輕生之徒天矯鶻突極馳騁之能事故用以迂迴抄襲當者無不披靡焉盧占魁部在陝西靖國軍中得列一席者富魁一人之力也

趙 西 山

趙西山鳳縣人清邑庠生辛亥初加入同盟會嘗奔走兩粵隴蜀京滬各地聯結志士宣傳革命靖國軍時奉于總司令命爲宣慰各軍代表派赴廣州覲謁孫大元帥報告革命戰事情形並獻西北軍事善後之策被派爲大本營出動委員聯絡豫直各省同志徧歷關內外諸軍宣達總理對於國事之主張轉赴榆林見井岳秀楊虎城籌商大舉十三年冬北方事機已熟復持孫岳胡景翼密函赴廣州覲見總理請示機宜蒙頒發井岳秀等討逆軍司令委狀五件兼程北返會國民軍一二三軍已因曹鋡驅走吳佩孚聯名通電恭迎總理北上主持國事旋偕國民二軍代表寇遐迎謁總理於天津及總理逝世乃赴豫任河南督署參議後返陝十六年隨于總司令右任會師鄭州參加北伐國政府奠都南京後被任中央黨史史料編纂委員會採訪委員二十五年秋九月在西安寓所病故年四十五子連城

郭俊傑

郭俊傑字英夫咸陽人少讀書有大志清末因鄒子良并勿幕介入同盟會西行出玉門經瀚海至迪化宣傳革命旋返甘肅辛亥之役助甘肅都督黃鉞舉義職於秦州民元歸陝任國民黨陝支部組織事務五年任陝西討袁軍參議六年任陝西警備軍參軍七年任陝西靖國軍第一路第一支隊司令兼本路總指揮與王珏堅守乾縣聲震秦隴十年任靖國軍右翼總指揮十二年國民軍建任國民二軍參議胡景翼督豫任河南省署高等顧問二十二年任中國國民黨黨史編纂委員會編纂派充西京日報社社長兼中央社西安分社主任二十三年任陝西省黨部指導委員二十五年改任陝西省黨部特派員兼常委又任陝西省捐稅委員會主席抗戰軍興被選爲陝省國民代表踰年當選爲國民參政會參政員是年五月赴漢口開首次會議被推駐會委員積勞成疾七月回陝十月參政會二次開會力疾赴渝代表陝西民衆請願中央豁免欠賦減輕軍麥贌戰事捐款均有成效三十年一月疾甚卒於西安遺囑諱諱猶以國家抗敵爲念語不及私年五十二子烈

黃 銘

黃銘字警庵三原人初業儒工書善畫尤精醫術清末入同盟會嘗組織農民自強會宣傳革命辛亥光復從井岳秀轉戰晉南及東西路四年參加討袁逐陸之役事定以勞任陝西第四混成團連長升本團少校副官民六隨曹世英起兵耀縣任靖國軍第三路獨立營營長駐防高陵與陳樹藩軍相持數年曹部軍實不充子彈缺乏銘有巧思收集廢銅鐵以製炸彈守禦河防深賴其用焉以積勞卒於軍年五十子雲章

張贊元

張贊元字翊初甘肅靈臺人父南浦清時歷官陝西山西湖南等省巡撫所至頗有政績歿後入清吏循吏傳贊元性耿介不合流俗留學日本法政學校畢業加入同盟會受任陝甘同盟會支部事務躬與辛亥光復之役民國成立退居讀書與郭希仁往來尤密洪憲改元與井勿幕組織討袁軍學靖國軍事至三原任總司令部祕書二十年任陝西省政府委員積勞致疾二十九年五月卒於西安年五十九子貽謀

王烈

王烈字子中白水人西安師範學堂畢業辛亥反正時充陝西都督府會計主任考送日本法政大學肄業與革命黨人時相往還加入中華革命黨民四回陝助曹世英組

織討袁軍民七任陝靖國軍第三路參謀長民八派赴廣東謁孫總理蒙委大元帥府參議十一年任陝軍第二混成旅參謀長十四年任國民三軍楊虎城部參謀兼運輸司令十五年任陝西省印花稅局局長十六年充本省財政委員會高等顧問兼渭北籌款專員十七年任國民軍第十軍駐陝辦公處處長兼省黨部清黨委員十八年充陝西省政府祕書十九年充陝西黨部特派員二十年任民政廳祕書代理廳長事二十一年任陝西財政專員兼南褒善後局局長二十二年後籌辦化學工藝三酸及新生煤礦各公司二十七年十一月卒於三原寓所年五十六子三長德民次時曾次時寬

張廷芝

張廷芝字瑞卿蒲城人西安高等學堂畢業辛亥起義時奉軍府檄倡辦本縣團練安靖地方民國成立留學日本加入中華革命黨歸國後被選陝西省議會議員靖國軍興任總司令部諮詢及第三路參謀攝高陵縣事九年充陝靖國軍總代表赴滬參加南北和會及直軍入關各路將領以衆寡過殊多佯附受編廷芝獨以爲不可隨楊虎城引軍西行迎于總司令至武功終始其事十四年楊虎城就國民軍陝北總指揮率師南下擊走吳新田迎國民三軍軍長孫岳爲陝西軍務督辦十五年西路作戰及西安被圍兩

役廷芝均爲主任參謀積勞咯血甚劇十六年隨軍出關參加北伐終以疾甚歸里十八年二月卒年四十四廷芝有口辯饒智略每於稠人廣座談論聞者莫不傾服尤善規人過類東方曼倩之滑稽諧詞詭說使人知愧而不怒其感人往往如此子志學

李凌霄

李凌霄字雲溪扶風人保定軍官學校畢業辛亥光復嘗從東路大都督張鍊經略潼華一帶攻守事宜任模範營營附共和告成解職歸里主辦地方警備隊白狼竄陝關中各縣多被蹂躪而扶風獨完皆凌霄之力也護國討袁之役任陝西混成旅二團二營六連連長靖國軍興任第九支隊一營營長後隨胡景翼出關鄭州之役馮玉祥前軍失利凌霄適在前衛率部馳援大破趙倜之兵連下開封歸德以功升團長十三年直奉再搆兵凌霄奉景翼命率先頭部隊出喜峯口與奉軍一團遭遇擊走之國民軍旋起首都令回師至北京吳佩孚聞變自山海關回師以全力來攻岳維峻駐廊房兵力單凌霄奉命往助與敵戰於楊村大破之吳軍遂以瓦解其餘部扼守漳河阻水爲營景翼命凌霄爲前驅與敵血戰七日敵潰國民二軍遂入豫凌霄以功升任第九師第十七旅旅長十四年奉軍南薄江淮孫傳芳合五省之兵拒之國民二軍在豫舉足有重輕之勢凌霄

建議出兵徐州可以靖中原之亂當局不能用竟至於敗凌霄旋歸中央軍十九年任特務師師長駐鳳翔在軍次遇害年四十三子三珍琦琛

党 �毓 岷

党毓岷字寶山富平人初力農居鄉好爲俠義嘗藏匿民黨於家供其食宿陝督陸建章指目爲匪派兵圍捕之毓岷率子弟與抗飛彈傷右股因亡命輾轉入郭堅軍民四從堅討袁入陝北事定以功任陝西省警備軍騎兵營營長六年隨堅及耿直揭靖國軍職於岐山鳳翔間與陳樹藩軍血戰八日夜嗣任靖國軍第一路支隊長經交口羌白鳳翔各戰役十四年後任國民二軍第十二混旅第一團團長十五年解涇原之圍十六年任國民聯軍南路第三軍第一師師長十七年宋哲元攻鳳翔毓岷與戰月餘城破出走爲亂兵所殺年五十七自初傷股後稍不良於行然勇悍善戰故陝靖國軍中之稱猛將者無人不知有党跋子云

李 向 榮

李向榮字蔚亭武功人清末以廩庫生入西安師範學堂肄業加入革命團體從事祕密運動辛亥西安起義之初奉軍府命倡辦本縣民團清軍圍攻乾縣別部抵咸陽向

榮從吳督都世昌與戰於城下以勇敢聞民四帝制事起又與同志在藍屋武功一帶舉兵討袁均歸失敗而志不少挫靖國軍興任第四路先鋒第七營營長改任西路招討使七年春隨軍攻取扶武後往岐山收撫某部議不諧遂與戰竟亡於陣年三十七同死者有同邑焦步轍事後同人爲樹紀念碑於岐山城內一子成林

楊逢時

楊逢時字雨軒渭南人畢業西安陸軍小學早年加入革命團體辛亥之役嘗隨曹印侯敢死軍充隊官作戰鳳翔乾醴各縣勇敢過人共和告成解甲歸里民四陝中諸黨人反對帝制起兵討世凱黨人景梅九爲陝督陸建章所捕解京逢時約同志十餘人於赤水道上劫奪之以戒備森嚴未果及護國軍興遂與諸軍共逐陸建章民六靖國軍初起復於渭南樹幟首先響應七年春左翼攻省各軍失利退守渭北逢時以孤軍堅守渭南陳樹藩以大軍來攻戰敗被擒遇害年二十五子二超羣喚羣

李玉祥

李玉祥三原人舊籍山東性豪爽貌魁梧少讀書偶閱民族英雄史卽肅然崇拜之及壯留學滬上與革命黨人相往還因加入焉初預辛亥光復之役民四陸建章爲陝西

將軍助袁世凱謀帝制諸黨人謀討之往來皆主玉祥家其家有地洞嘗於其中密製炸
彈爲武器被陸偵知派兵圍捕玉祥與鄧寶珊董振五楊瑞軒程立名馬青苑諸人皆越
牆去胡德福等被捕殉難玉祥家財被抄沒居室爲所焚玉祥無所顧惜志益堅挾所製
炸彈與同志諸人喬裝作小商販狀於黎明混入櫟陽奪守門衛兵槍鄧寶珊等百餘人
蜂擁入與陸之駐防步兵巷戰半日李虎臣受傷且以衆寡不敵退出此役雖不勝而渭
北各地護國討袁軍相繼起靖國軍時任第四路支隊長隨總指揮井勿幕圍攻興平逼
近城下掘地道以火藥轟倒城牆丈餘玉祥率衆衝入敵急以排槍防禦竟亡於陣年三
十五子某

康任

康任字毅如長安人性倜儻慷慨好交遊仗義疏財弱冠入邑庠肄業關中高等大
學堂時主講爲湖北屠梅君理學名儒也任既受業選修性理格致二門故其學得於屠
之陶冶者爲多旋以高材生派充西安八旗中學敎習未幾辭去自辦帝君廟學校兼充
提學便署巡環敎師因讀民報等書服膺革命主義聯絡黨會及各豪傑均身預焉辛亥
九月一日西安起義任說撫標某統領曉以大義勸其投誠故新軍入城綠營不抵抗而

歸降者任之力也軍府既建延長外交司以其會辦紅十字會與外邦人士浹洽故也民
二白狼竄陝張都督鳳翽親赴藍田督師剿防任被委辦省會民團城防賴以安堵無虞
陸建章督陝後弗慊於辛亥首義諸人長安王紹文華縣李秋軒等密謀舉事議推任爲
臨時總司令未果而紹文等事洩被害任乃東走汴依河南督軍趙倜以避禍靖國軍興
返陝陳樹藩疑任與各方有通將爲不利於己因就督署邀飲於宴後槍殺之年四十六
子二承益承亮

王之翰

王之翰字幹臣蒲城人少讀書有大志憤清政不綱欲謀改革遂入陝西講武堂畢
業辛亥之役與曹俊夫舉義白水響應省垣民國成立留學日本入孫總理所辦之浩然
廬軍事學校加入中華革命黨袁世凱稱帝時承總理命同曹俊夫樊靈山諸人返陝奔
走渭北糾合同志於白水堅討袁軍旗響應滇黔謀據蒲城未遂引衆入北山爲游擊偏
歷延綏各縣復折而南下會胡笠僧殲陸建章之師於富平因合兵驅陸離陝陳樹藩繼
任陝督改編各軍任之翰爲曹部騎兵營營附之翰性剛氣盛遇事能負責而嫉惡尤甚
其鄰有匪韓女娃者拉票殺人爲害鄉里之翰使人戒斥之令改行否則將不宥女娃銜

之俟其歸伏於村外狙擊之遂遇害年方二十二

張如翼

張如翼字飛卿富平人初從胡景翼破陸建章軍於富平俘陸子承武以作戰勇敢聞名事定充第二團排長旋升張義安備補營連長義安發難三原渡河屢敗陳樹藩軍偏近省垣如翼均爲前鋒義安歿後董振五接統其衆編爲第四路第四支隊如翼任第一營營長轉戰臨渭河北各地每戰必爲先驅日不離賊無以對義安也民十一年以母喪回家隨從兵變遇害年二十八如翼起行伍數年以戰功至營長與義安誼切骨肉義安所命赴湯火不辭聞義安陣亡直入敵陣負其屍以還事親孝尤急公好義倡建本縣通川學校籌設本鄉倉儲鄉里頌之然性燥烈馭下嚴急竟及於難子二振兒禿子

閻鎮元

閻鎮元字奎生藍田人清甲午武科舉人庚子之變清帝西巡時曾充隨鑾侍衛後寓西安教授武術遠方習藝者多歸之辛亥起義任復漢軍衛隊營管帶從張雲山作戰西路後任藍田保衛團團總靖國軍興任第三路第三支隊楊虎城部營長十五年劉鎮華圍西安不時派人在藍田催糧拉夫種種擾民鎮元糾合健壯數百人屢與抗於新街

洩湖間鎮嵩軍師長慾玉珍派兵兩圍攻之鎮元率衆與戰於灞川鹿原一帶終以寡不敵衆挺身肉搏力盡被執大罵不屈遂遇害年已六十五矣

龔性田

龔性田字明夫號浪迹客藍田人幼聰穎嗜讀工詩能文尤善書法居鄉有才子之譽癸亥歲南海康有爲來西安性田往謁以其所畫爲贊頗蒙獎進因從之遊徧歷各地名勝後任國民二軍總部祕書從至開封十五年二軍敗潰豫西隨衆歸鎮嵩軍旋入潼關進圍省城藍田北境時有敵騎出沒派糧餉差人民苦之性田與同志楊俊等數人就縣西南之真武廟暨自治軍旗不數日而鄉民來集者千餘人嘗捕敵軍之跳踉擾民者數人斬之敵騎不敢至南山垂半載敵軍以其聲勢浩大影響攻城乃派大隊來攻性田率衆迎戰於八里原事先自火其居室揚言爲鄉民怨已者所焚冀藉此以免株連也及西安圍解後陝軍政權復操於國民一軍秦人被擯乃與同志申耕等密謀反抗未成出走欲赴南京至永濟被敵派人暗殺年三十五著有浪迹遊記湖山主人詩存及西安圍城劇本數種存於家子四名均未詳

高銘新

高銘新字季維涇陽人幼受業於同縣柏厚甫先生善屬文有豪俠氣十八歲入呂庠執贊宿儒楊風軒先生門下精研經史兼及時務力求實踐不尙高談時當清末外侮日深內政腐敗憂國之士多徘徊莫知所適銘新乃隱於商入四川值鐵路風潮起益有所感乃由川經鄂至江蘇應友人李季直約至滬上創辦克復雜誌鼓吹維新經王麟編但宅暘介紹入同盟會譚人鳳一見領異之語人曰高季維終非池中物也辛亥武昌首義陝西旋起響應上海各界捐購大量西藥器材委銘新運省於省城設紅十字會東西各縣設分會醫療傷兵多所全活因勞致疾臥床榻者幾一年民元後從事教育與同志柏惠民王玉書諸人合資開設新民圖書館專以輸入文化開通民智爲事民三同盟會改組爲中華革命黨宋相臣由日本返陝於西安組織樂羣學社總攬西北黨務密謀討袁以銘新黨中健者薦任涇陽警察局局長陰儲實力以待舉事既而王紹文等在省垣謀洩同志被難者十三人銘新亦在羅織之中陸建章派緹騎至涇就其家逮捕之銘新坦然謂來人曰余自審無重大事或爲他人牽累耳請與諸君飯後同行可也供治飲饌甚豐皆醉飽因乘間越牆逃逸匿周伯敏家捕者窮蹤不獲乃閉城門挨戶搜索之銘新伏孔廟屋上瓦溝中三日夜滴水粒米未入口縣知事蒙養正淳化人亦革命同志乘

夜密偕銘新至城上繩而出乃脫險居白水數月復北走靖邊說盧占魁等約以他日相應援及靖國軍起銘新歸王原胡景翼曹世英均任爲參謀兼工程營營長于總司令總飛軍政改編各軍以盧占魁爲第六路司令盧部久居邊外不諳內地風俗習慣時與鄉民衝突銘新常奉命居間調停得以相安無擾民士任乾縣知事助王玉抗戰陳樹藩之兵苦支五月餘後隨王軍歸三原復任總部參謀民入啣于總司令命赴富平屬之美原見王玉商軍事行至中盜爲人狙擊臨終謂其從者曰余生平無私仇擊余者乃公敵也轉舌同志爲國努力余死無憾矣雖胸長嘯而歿年三十三子鴻

楊 眇

楊眇字鼎臣號鵠鳴蒲城人清邑庠生與井勿幕張拜雲井崧生李天佐等加入同盟會嘗以私財購革命臂章逢人宣傳倡言排滿人皆謂其有狂疾初與李仲特常鎔卿人組織蒲城教育分會爲秘密機關辛亥光復隨東路都督張伯英禦清兵於潼關民四帝制發生以鼓吹討袁爲陝督陸建章所嫉授意第四混成旅旅長陳樹藩拘係大荔獄中幾遭不測郭堅時任巡緝營長力救得釋靖國軍興任第一路參謀及聞郭堅遇害西安憂傷嘔血病故於鳳翔軍中年三十九人咸以革命老前輩呼之

吳志德

吳志德字清純白水人清末西安陸軍小學畢業考入保定陸軍中學辛亥任秦隴復漢軍井崧生部教練參加晉南及乾州各戰役民國建元留學日本民三帝制發生陝督陸建章捕殺黨人志德潛歸白水招合同志密謀討袁爲邑令偵知請兵兩營捕之桎梏解省拷鞫定罪囚繫年餘陸去袁死始得釋靖國軍興佐曹世英起義耀縣任第三路參謀民十三年國民軍起幽燕志德與甄士仁響應關中任甄部參謀尋改營長志德體魄初甚偉岸自經囚繫後遭受嚴刑遂致鱗傷偏體創痛時倅至二十年竟因之殞命年四十二子振武

梁夢西

梁夢西字子貞臨潼人清歲貢生與郭希仁曹印侯相友善籌謀改革時參密議善詩賦能文章其勤筆常能左右輿論辛亥光復充曹印侯敢死軍祕書長共和成印侯釋兵夢西亦歸鄉里民七靖國軍興充第四路祕書胡景翼被拘入省陳樹藩遺書令胡部各將領使降時軍失主帥人心惶惶勢將瓦解夢西奔游說力勸合作並代各將領擬覆樹藩書說明胡之去就與靖國軍大局無關其精語有笠僧之入固市也吾不贊成其

被拘也吾亦不補救吾願視彼爲關岳文史早就千秋亦願彼祝吾爲起剪頗牧縱橫一
世此時此地請無多言見於疆場可耳樹藩得書遂懸賞十萬金購捕之論者以當時景
翼得免於死靖國軍得以復振夢西之書與有力焉其他詩文聯語有關靖國軍文獻者
尤夥雖屢經兵燹稿件不存而當時人士多有能道之者靖國軍解散後夢西隱身埋名
不求人知十八年歿於家年五十八子某

段 露

段露字澤生後改澤青臨潼人祖籍三入左宗棠戎幕佐定西域以軍功屢擢至開
封道枚臣剛正任俠見重鄉里露生而大資開朗鬚鬱卽能詩有神童之目入學讀書
文行冠儕輩郭希仁一見傾異之後遂時與往還交誼在師友之間得其陶冶故於關學
精神革命思想均有深契辛亥光復時常在郭希仁及曹印侯左右隨事獻納民元後入
北京法政專門學校畢業值討袁護國軍興因與劉允丞胡笠僧張義安史積永諸人研
討革命大計民六靖國軍起遂入第四路胡笠僧幕府一時重要文字多出其手十一年
隨胡軍出關與劉允丞往來邯鄲北平聯絡各方同志嘗潛赴喜峯口遵化天津通州接
洽國民二三兩軍發動首都革命之役因糾集當地青年志士收撫曹吳散兵得槍械甚

衆旋隨國民二軍至豫任第二師補充團補充營營長駐防鄭州訓練新兵以爲革命武
力基本胡笠僧歿後降將田維勤等暗通吳佩孚謀傾覆國民軍時劉允丞方治笠僧之
喪於華下中原局勢危急籌乃密赴開封向岳西峯痛陳局勢並促允丞出關共圖挽救
及敵兩路陷開封國民二軍集結鄭州籌建議退師豫北與國民一三兩軍爲犄角以待
局勢變化諸將不聽終致崤函之敗籌乃潛赴北京密有所圖幾遭捕獲自此旅居北京
數年及北伐告成張溥泉主持華北政治分會延籌任祕書越二年任黃河水利委員會
委員九一八事變作與東北同志策劃組織義勇軍共同抗日殷逆汝耕之被刺李逆福
和之伏誅籌均與有力焉抗戰軍興自京歸陝時孫蔚如將軍主陝政擬舉全省物力人
力備與倭寇戰任籌爲蒲城縣長蒲城接近河防邑稱繁劇籌慷慨受命以明恥教戰足
食足兵爲施政綱要切實推行在蒲半載輿情翕然贊國先進李子逸先生贈以詩有政
治風流今在茲之旬後遷邠縣縣長爲政清直簡易時論稱爲賢令尹後去職寓居長安
擔石屢空饔餐不繼而未嘗一踰顯者之門三十年劉允丞卒於三原籌往吊痛哭失聲
由是遂患咯血猶扶病整理允丞遺文並撰成事略蓋籌與劉平生志事相期患難相從
者二十餘年故爲後死之報也三十一年被聘陝西省政府參議三十三年二月竟以疾

歿年五十二墓早擅翰墨才高當世雖人皆仰其文彩風流而殊不以此自憲常誦龔定庵陶潛酷似臥龍豪千古隣陽松菊高莫信詩人竟平淡二分梁父一分驥之句以自況亦可以見其爲人矣配李青筠子本甯女枚孫均幼

甄士仁

甄士仁字壽珊麟遊人十五歲入邑庠側儻有大志清末入陝西陸軍中學堂肄業井勿墓介紹入同盟會辛亥之役從東路都督張伯英轉_三潼關商雒間陸建章督陝士仁集健兒爲游擊隊與北洋軍戰於岐鳳一帶事定散衆東遊靖國軍時與吳希真發難西路轉戰岐山武功興平及渭南之下郵上漲渡各地支持交口雨金間與靖國軍相終始十四年聯合國民二軍駐陝各部驅逐劉鎮華吳心田十五年與田玉潔固守三原力抗鎮嵩軍麻振武梅發魁王老五等三四師之衆解圍後復進圍麻軍於大荔斬獲甚衆于右任先生任國民二三聯軍駐陝總司令任爲國民軍第二集團軍第三師師長兼國民黨陝西省黨部執行委員剿平吳山巨匪王有邦等陝甘邊境賴以甯謐北伐成功首先請解兵柄任陝西印花稅局局長十九年憤劉郁芬據_陝甘抗命中央潛赴西路收集舊部組西北國民軍以討之蔣總司令授以陝西討逆軍第一路總指揮連克岐山扶風

武功興平等縣分兵略乾醴邠長轉戰涇原栒淳進逼長安劉衆瓦解楊虎城旋奉中央令派入關爲陝西省政府主席兼綏靖主任君至省商軍事竟死年四十四子瑞麟現任省參議會議員

武 士 敏

武士敏字勉之察哈爾懷安縣人年十六入宣化中學肄業喜讀孫吳兵書旋考入法政大學因民黨王金銘施從雲介紹加入革命團體嘗隨于右任張溥泉兩先生徧歷川陝晉各省與李岐山續西峯諸人組織河東軍聲討袁世凱嗣偕續式甫遊粵護法軍興自粵來陝助陝西靖國軍與陳樹藩軍戰數年及靖國軍解散察哈爾都統張錫元邀任財政廳長辭之十三年首都革命後任國民三軍騎兵旅旅長與敵戰於滄德間十五年國民一軍敗退南口至綏遠士敏與偕旋以所部交弓富魁加入國民軍所組蘇聯之觀察團爲團員居蘇一年對於政治軍事多有心得後返國住滬年餘十七年充中央第十七軍顧問旋任第一師第一旅旅長參加北伐駐防魯西是年冬移駐膠東剿平劉桂棠顧震諸軍閥餘孽十八年縮編爲新十四師第一旅第一團改任團長駐皖南十九年任十七師九十七團團長曾預駐馬店戰役旋從楊虎城入關奠定陝局升任第四十二

師一百廿四旅旅長駐韓城郃陽大荔朝邑華陰潼關等縣兼潼關警備司令長城之役奉令開順義塘沽協定成後復員廿三年率部剿匪陝北收復延長延川等縣地以功授雲麾勳章敍陸軍少將察北六縣淪陷後痛深國難自感學力不足於廿五年請假赴京將入陸大特別班以求深造旋因西安事變隨于右任返陝與馮欽哉郭仰汾諸人斡旋和平廿六年升任第一百六十九師師長駐防大荔七七事變起與馮欽哉首先請纓開赴保定於定縣安國深澤一帶阻敵使友軍得以安全退却旋抵石莊轉平山滹沱河娘子關各役與敵血戰三月既而開洪口保護白晉路時破壞同蒲路敵後方交通敵恨之屢調主力軍來攻皆力戰挫其鋒致敵不敢蠢動者年餘二十八年夏復與敵大戰於沁源沁縣間利用地形作迴旋戰敵受大創而退我軍安渡沁水在洪屯陽沁間奠定太岳政權基礎是年冬升任第九十八軍軍長改隸第五集團軍移防中條山二十九年秋開駐陽城改歸十四集團軍節制三十年以後屢與敵戰以沁東白晉路以西地帶作根據地同時奉命組織太岳區黨政軍聯合委員會任主任軍事政治次第推行成效大著是年九月敵集各處之兵約兩萬五千大砲四十餘門分九路來犯自二十三日接觸雙方傷亡均甚慘重激戰數日敵以飛機大砲集中轟擊彈中士敏腿部然猶裹傷督戰衝鋒

衝鋒十七次斃敵三百餘彈盡繼以白刃肉搏頭腰兩部均受重傷臥地不能起猶大呼
拚到底不成功便成仁迨官兵傷亡幾盡敵兵逼近猶手刃數敵仍以決不屈服繼續努
力勉勵官兵最後力竭乃自戕年四十日遺骸被敵運至長治以上將禮葬於城內蓋敬
之也士敏性敦厚有膽識立身行事一秉至誠馭下恩威並用不蓄私財故將士皆樂爲
之效死妻翁氏子三長鋪供職中央信託局次林次鉄事聞國民政府以陸軍上將卹國
史有傳

唐嗣桐

唐嗣桐字子封清城人靖國軍時入伍選送四川講武堂畢業隸第三路第一支隊
楊鶴部與北洋軍閥戰於武功年餘民十三年復選送廣東黃浦軍校隨蔣委員長討陳
炯明於東江轉戰綿湖潮梅十四年回陝創辦三民軍官學校於耀縣十五年西安被圍
南下謁蔣委員長陳報西安軍事情形蒙委曹萬頤軍軍訓處處長改任新一師副師長
調任十七路軍少將參議十九年任陝西省會公安局長二十一年任陝西警備第三旅
旅長逾年調任第一旅旅長二十三年移防商雒又調駐興安剿平積匪張海功劉九萬
余星五方海金等二十四年徐海東由鄂豫入陝嗣桐奉命尾追率部由山陽出發連克

小河口紅岸子各要隘至袁家溝口遇伏全軍覆焉嗣續治軍能與士卒同甘苦行不乘
騎雨不張蓋故軍士感而服從乘勝銳進遂及於難年三十五子二西省晉省

蔣世傑

蔣世傑字朗亭蒲城人幼好騎射十七歲入武庠因井勿幕介入同盟會參加辛亥
河東之役後隨岳維峻爲連長靖國軍時任第四路第三支隊營長駐守相橋與北洋軍
第十四混成旅張錫元激戰數月涉着暇擊敵軍嘆爲莫及後隨胡景翼岳維峻駐防信
陽十五年豫局突變吳佩孚使竇英傑劉鉄珊等率大軍圍攻信陽四十餘日莫能下吳
數浼外國教士來說謂或受編或退出悉聽自由均不爲所動會有自開封來者訛言維
峻已死乃泣而解甲後赴佩孚筵於漢皋座客或與之言曰昔之役使子深知吳公者
當早釋兵矣世傑曰軍中聞將軍令不知其他予守信陽時只知有岳公耳卽吳公親來
亦當誓死拒之况他人耶吳聞言大奇之深爲器重屢以武漢警備師長及援川總指揮
委使之皆不就及蔣總司令北伐至漢口乃出餉糧北招討使駐節隨縣十七年三月咯
血卒於宣年四十七子二廷棟廷述

何琰字西屏後改名秦陝西長安人性豪邁喜接納熱誠明快膽識過人幼肄業咸寧第一高小學校每試輒冠其曹旋從邑廩生馮助堂學略涉經史年十八以家道中落改習商業歲餘因抱不平痛殴經理之子被開除復考入縣立單級師範卒業琰父敏誠時已投效陝西靖國軍乃亦潛赴渭北居三原日聆于右任劉允丞吳希真諸革命先進言論思想大進民國九年琰年廿有二由陝西靖國軍總司令部保送四川陸軍講武堂翌年卒業歸陝分發某營充排長及胡景翼軍改編出關提升補充第二旅二團連長駐防澠池一日旅部擒匪七名交琰管押琰留心訊察悉其一人爲中學學生因家庭遭匪劫竄而從人思爲報復因不惜與他匪伍獻已定矣琰憫其情卽請於主官求寬釋陳詞半日繼之以哭竟得全活其命後琰隨軍轉戰豫冀國民軍興升任第七混成旅二團三營營長因入中國國民黨籍治軍有餘暇卽潛研軍事政治時以粵滬新出書報贈友好尤以服膺軍人須有主義信仰武力須與民衆結合諸要義常與部衆講解民十五年春國民二軍自豫敗退琰時駐防陝縣深以岳督不退豫北與國民一軍接連而西行入陝議曰率所部泛平矣圍入豫西諸山中繞道商雒返陝沿途接戰傷亡頗重比抵關中而

西安已被鎮嵩軍所圍所部亦僅餘數十人械彈兩缺遂出沒渭華一帶屢與敵部接觸入秋聞前所救匪某現充敵軍營長駐臨潼乃以所部交羅曜隻身往見某感前恩因留與暫居未幾荐充敵衛隊二旅參謀瑛佯應之而暗與舊部往還欲從中取事適黃埔軍校學生王大吉自學歸瑛與密計結連在鄉壯健伺機反正十一月初國民二三聯軍自西來援陝前鋒甚銳敵惶惶稍撤圍西安之兵於後瑛以時機已至乃約王羅定期襲敵總部由省東響應國民聯軍事機不密爲敵發覺遇害於臨潼斜口鎮年二十八時民國十五年十一月二十日咸陽克復之前三日西安解圍之前一週也瑛廣額燕額目炯炯有光善書法遺族未詳

黑憲章

黑憲章字子斌宜川世家子也民國初年地方多故憲章倡練鄉團土匪歛跡陽虎城改編國民三軍任爲第一游擊支隊司令作戰鳳翔寶雞一帶十五年隨楊入西安防守東關每遇敵軍攻城火力猛烈之際親身指揮士兵相機禦防屢獲勝利保全危城後復隨楊出關任國民革命軍第二集團軍第十軍二師三旅旅長改任陸軍十七師三旅旅長參加北伐常在前衛歸德之役某部被直魯軍大隊包圍憲章奉命馳援掩護大砲

衝鋒陷陣因及於難年三十九遺族未詳

李天佐

李天佐字襄初蒲城人父字香亭以舉人選授陝北某縣學官品端學粹和易近人天佐自幼隨父讀書穎悟過人稍長識時務見清政日非奮然有改革之志民元前六年留學日本井勿幕介入同盟會旋由東斌學校畢業因母喪歸初任健本學堂敎習繼復屢渡東瀛密運革命書報徧播孫總理主張聯絡黨人積極活動爲舉事預備辛亥九月朔西安舉義天佐適在原籍聞訊卽率鄉里子弟數十人起而響應加入渭北民團使署協同焦子靜輯匪安民保衛地方共和既奠解甲讀書護國之役復出參加討袁逐陸各戰役再造民國以功任混成團團長升任第五旅旅長駐蒲城靖國軍之初起也陝軍各部步趨極不一致朝敵夕友變幻無常天佐屢與胡景翼信使往還籌商陝事自念時機未熟主不輕動至民七九月景翼赴固市晤姜宏模天佐亦來會與定密約欲假調停名義計誘陳樹藩至渭北共薈圖之顧事出倉卒部署未能周詳樹藩急挾景翼以去是時景翼部岳維峻等已圍固市天佐與維峻本同鄉至好且有助守蒲城縣城擊斃耿直功當此之時陝西所謂正統軍人自陳樹藩以下皆主先挽回胡景翼一部與之合作以消

滅其餘天佐即屬此派因欲藉此時機商一善法一則可以保全景翼一則可以澄清混亂局而故於景翼入省之翌日急約岳維峻至固市附近之板橋村共議其事蓋夙知胡部與己平時主張固沈瀣一氣也而景翼下級幹部諸人憤其賣景翼也不能諒其苦衷隨維峻同來甫見面突出厲聲問曰吾總司令安在天佑錯愕未及答諸人即開槍亂擊維峻急以身障止之幾爲所傷回視天佐已中槍仆地矣乃歎恨使人歎其屍焉天佐死時年纔三十一于潛

石象儀

石象儀字宜川富平人幼家貧採石深山以膂力雄其曹辛亥光復初從胡景翼任秦隴復漢軍第一標隊長隨井勿幕出師河東克復運城癸丑丙辰諸役無不預靖國軍時任第二路支隊長兼高陵城防司令轉戰關山交口羌白及乾縣興平武功各地移防淳化整軍興學于總司令嘗贈修明教育匾額褒美之許爲陝軍老名將直軍入關三路議受編制象儀聯合馬青苑甄士仁等逐其主帥據高陵稱獨立誓擁護靖國軍旋爲胡景翼所執國民軍時任國民二軍第五旅旅長越三年以年老解兵楊虎城孫蔚如先後主陝政均聘爲省府參議二十八年夏疾卒於家年已七十矣象儀濃眉鬚髮貌凜凜若

可畏而性坦率簡易治軍不以銜勒視兵士如手足從之者皆終身無貳幼雖失學然居
恒涉覽古今歷史傳記與人談均能道其曲折儒士或不及也一子早卒孫乙學

杜 延 五

杜延五大荔人省立甲種農業學校畢業靖國軍時隨馬克齋在陝作戰數年任營
長十三年首都革命後改隸國民三軍十五年任國民軍二三聯軍援陝第一支隊第一
營營長南下解西安城圍十七年改任國民革命軍第二集團軍第七十師第一團團長
率部出關參加北伐至河南盧氏兵變與師長馬克齋同遇害年二十九子長安

史 登 魁

史登魁字天士扶風人幼學純篤手不釋卷講習之外每有心得嘗從同里史積誠
先生潛研六經諸子旁及音韻訓詁小學諸籍皆略窺其門徑旋從革命先進王伯明王
誠齋諸先生遊備聞世界大勢及革命理論時陝西靖國軍已樹幟於三原乃往投之在
張義安董振五軍中數年後入保定陸軍第十五混成旅學兵連實習軍事學術均冠其
曹旅長孫禹行深器重之胡景翼聞其名召至順德委以手槍營連長手槍營官兵夙多
來自草莽驕悍無紀律登魁以身爲範蚤興暮作曉之以義結之以恩化其桀驁納於正

軌不匝月間全連帖服景翼以爲能遷爲營副十四年春景翼率國民二軍與鎮嵩軍慾
玉琨戰於豫西戰線東西數百里敵前鋒據鞏縣登魁率部繞道潛出敵後毀偃師鐵道
覆其運兵列車奪輜重無算敵遂潰敗以功升第十混成旅第九營營長其年冬國民二
軍敗於山東吳佩孚乘機攻豫南鄭州警備司令楊瑞軒奉令南征部下團營長以十數
獨以登魁少年老成能負重任令其留代職務既而開封不守陝州覆師遂從衆間道歸
旋任甄士仁軍一團二營營長十七年率部進剿吳山股匪王有邦迭克八渡官村太小
栗子坪嘗在前鋒卽攻山腹匪巢彈穿腿部歸里調養其年四月陝局突變省城被圍登
魁在家爲匪所執不屈服毒自盡年三十一子從仁

陳發榮

陳發榮字滋生朝邑人辛亥光復隨衆起義民國成立解散歸里及討袁軍興招集
同志數百人隨曹世英高峻諸人舉義陝北驅逐陝督陸建章事定以功任陝西警備軍
某營連長民七隨耿直發難於西安討陳樹藩任靖國軍第一路營長在西路作戰累年
後從衛定一加入國民軍任旅長十五年李虎城衛定一楊虎城堅守西安發榮駐兵扶
風遙爲犄角城圍解後升任國民革命軍第二集團軍第二師師長十七年率部由商雒

南下欲取道豫南參加北伐中途兵變亡於山陽子二有娃妙娃

陳龍光

陳龍光字養虛藍田人保定軍官學校畢業歷充國民軍連長營附參謀等職十六年後充國民軍第二集團軍南路軍主任參謀兼第九支隊隊長又充新一師步兵團長改任楊虎城五十一旅副旅長十九年隨楊入關奠定陝局任陝西警備師第一旅旅長二十年駐隴南成縣天水一帶九五事變在天水西南娘娘壩殉難時年四十子桐蔭字梧軒充陝西警備師一團一營連附二十三年隨軍剿匪商雒陣亡年二十三

張成亮

張成亮字明甫三原人初入胡景翼部學兵連爲正兵以勇敢耐勞提升補營排長民國六年冬從張義安發難三原建立陝西靖國軍先後隨義安暨董振五出師討陳樹藩作戰興平郿縣臨渭河北各地張董之名由是大噪迨張董相繼戰歿鄧寶珊接統其衆改編爲第四支隊作戰年餘成亮任騎兵連連長後隨大軍出關十三年首都革命後以功任國民二軍第七師補充營營長連升團長十四年豫西之戰曾在前鋒是年冬又同國民二軍與奉軍李景林作戰克復天津以功升本師混成旅旅長十五年國民二

軍挫於魯吳佩孚收合殘部進攻豫南成亮率部與戰於駐馬店屢挫敵鋒及岳維峻棄師陝州豫南之軍孤立無援大部敗退成亮力戰歿於陣年三十六子海清

劉繼邦

劉繼邦富平人起自田間充胡景翼部備補營排長民國六年從張義安發難三原大敗陳樹藩軍曾旅嚴團悉收其械旋隨義安進軍討陳轉戰盩鄂進逼省城以功洩升靖國軍第四路第四支隊營長後隨軍東出關十三年首都革命後升任團長未幾又升任國民二軍第七師第二混成旅旅長十四年因京漢路防務交涉嘗率一營之衆直抵保定城下揚言如不立時讓防即攻城奉軍某師長於城上望見之歎爲生龍活虎因棄城去十五年岳維峻棄開封師潰於崤函他將皆棄兵渡河繼邦獨以所部與敵戰彈盡援絕竟歿於陣年三十二子忠善春善復善

華孝康

華孝康名三祝鄂縣人清末肄業上海中國公學及香港某教會學院歷充西安高等鳳翔中學英文史地各敎習宣統二年自辦秦隴派報社於西安并勿幕介入同盟會辛亥起義任北路招討使總部參謀護法之役復任陝西招討使耿直參謀靖國軍興常

往來各軍間爲行人民十一年銜命赴廣州謁孫大元帥蒙派送于總司令右任委任狀專員兼駐陝軍事委員十三年任陝西國民討賊軍西路總指揮部行政處主任兼黨務宣傳處長及北路總指揮部參謀中央黨部華北辦事處前方特派員及本縣豐聖公學校長國民政府統一後任陝西省政府參議三十五年九月十八日由鄂赴西安途中突遭暴徒狙擊逝世年六十一孝廉幼性英敏工於詩文初見井勿幕談論竟日遂傾心事之棄學奔走革命運動往來平津滬粵傳達南北軍事消息恆無終歲寧居坑戰以後昔年所與革命諸同志先後盡沒塊居寡歡因自述一生奔走革命經過都數萬言名曰迴憶錄足爲革命史事參考又手抄革命期間各重要函電文件若干篇存於家珍祕不以示人獨於民國三十二年因國民黨西安黨部公葬井勿幕以勿幕死難主賊不得乃出其前時所得各方證據爲井案紀實一小冊印布流傳並訴諸法庭請求昭雪晚歲家居對於地方公益人民疾苦及社會黑暗知無不言以是招忌終及於難遺子尤尙幼地方政府雖爲緝兇迄尙未成定讞也

史之照

史之照字麟川華陰人辛亥起義初入東路招討使李仲三幕爲軍需與清軍戰於

潼關閻鄉間民國建元被選陝西省第一屆省議會議員又被選第一屆國會參議院候補議員護法之役國會開憲法會議於廣州君遞補參議員十三年國民軍起君任國民二軍駐京辦公處處長旋兼任財政部印刷局局長十五年國民軍失利君冒險至滬與居正謝特等過從甚密對革命事業致力尤多十八年因事至北平臥病年餘卒於寓邸年四十八無子女一

張 欽

張欽字夢蘭蒲城人民國初元入上海中國公學肄業時謁民立報館主筆于右任獲聆革命理論民五畢業歸輒從胡景翼岳維峻諸人參加護國討袁諸役靖國軍時任第四路連長後隨胡景翼出關首都革命後升任國民二軍補充第五團一營營長十四年豫西之役奉命剿匪西洛新密各縣所向克捷十五年隨國民一軍退師南口經綏西轉陝解長安之圍十六年任國民革命軍第二集團軍第七十四師主任參謀是年冬隨軍開赴盧氏約期赴鄭州與中央軍會師北伐前鋒已就道僅留一營及師部待發突來匪徒千餘乘夜入城師長馬克齋參謀長彭季強同遇害欽與護兵二人突圍出至某營營部招集散卒與匪激戰竟日驅匪出城十七年升任本師第四團團長率部沿平漢路

北進轉戰河北新鄉進駐滑縣與敵激戰數十次被圍兩月之久馮總司令率兵來援卒安危城旋率部北進轉戰臨漳等處積勞成疾旋里調養逾年病歿於家年四十子寶恆

劉星涵

劉星涵字養伯岐山人清末留學上海中國公學日從于右任先生遊從事革命祕密工作民元被選陝西臨時省議會議員袁世凱稱帝時倡言反對終爲陝督陸建章所殺共和再造鑒於軍閥專政深念革命事業非有多數信徒不易成功聯合同志創辦民立中學自任校長兼省教育會會長以三民主義灌輸新青年十四年以教育專門委員代表陝西出席北京善後會議被委臨時參政院參政及中央農事試驗場場長十五年任陝西教育廳總務科科長當時國共聯合星涵性耿介嫉惡如仇深慮共黨勢力膨脹口角流露致爲反動派所銜十八年因爭教育經費忿而辭職當道苦留不得而向之銜恨者得以乘機構陷遂遇害年四十一星涵生平邃於算術民元以還充三秦公學教員時卽以圖解教授生徒著有算術各級圖解甚多均未出版惟中國公民一書由商務印書館印行焉

耿文鴻

耿文鴻字季儒三原人性豪邁多膂力同輩呼爲猿臂英雄初入西安陸軍小學畢業參加辛亥光復之役民國奠定升入保定軍官學校畢業民五回陝任西安模範營教練改任陝軍第一旅少校團副靖國軍興任第四路參謀十一年第四路改編出關留守後方佐馮毓東守富平十四年毓東任國民二軍第八師師長奉調出關以文鴻任第三團團長兼後方留守司令十五年國民二軍敗於靖函鎮嵩軍旋入潼關文鴻方與留陝各部協議防禦以部下有任意收納潰兵破壞軍譽收其槍時毓東未歸所部人心疑竄齊小乘機煽變遽誣以勾結外軍害之年三十七子競雄

史宗法

史宗法字可軒號平人幼讀書不事章句見革命書報而悅之因棄學與同學張德樞出走山西由華岐山續西峯諸人介入同盟會奔走革命事洩被拘押於晉幾遭不測辛亥光復嘗充晉省義軍某團團長民國既建留學東瀛七年歸充靖國軍第四路副官長十一年任營長隨胡景翼岳維峻東出關國民軍時任國民二軍第二師第二團團長十四年豫西役任中路指揮作戰新安以功遷第三旅旅長是年冬由新安率隊北伐已至天津因豫東吃緊奉調回豫赴援二軍失利於豫遂出游蘇聯十五年隨于馮兩總

司令由五原歸陝解西安之圍任三三聯軍師長改任政治保衛部部長十六年十一月以事至富平美原爲匪所害年三十九子福生

史國樞

史國樞字采臣華縣人幼讀書求有用之學不事帖括制藝辛亥光復服務省城稽查處旋入軍六年任靖國軍第三路游擊總指揮部參謀長七年任總部參議及廣東軍政府諮詢八年充靖國軍第七路參謀長九年任總司令部參謀長十三年任國民二軍援豫總指揮部參謀長十四年任國民二軍第五混成旅參議十六年任第八師參議國樞在軍彈無百發糧無再宿錢無五百文行軍所至費不累民卒得軍心及北伐成功念欲固國必先安定地方因任本縣保衛總團團長剿匪安民爲當道所倚重二十一年以疾卒年四十五子三維新憲新建新

史仲書

史仲書字漢岑華縣人畢業法政專門學校胡景翼初建國軍延任三原縣知事兼第四路軍法官調剝軍食申明約束因事制宜軍民兩受其益後隨胡部出關任行營軍法處長及國民聯軍總軍法處處長執法嚴明軍紀肅然十三年任河南菸酒事務局局

長十六年任國民革命軍第二集團軍南路軍防區財政專員時有前國民二軍師長李某改隸鄂軍率兵至老河口李某君之舊友也以故君逕往見之李某以索款不得囚君於營卒爲所殺聞者傷之時年三十九子志伊

張 昌

張昌字祥五白水人清末畢業本省陸軍測量學堂辛亥光復時嘗同本縣吳青純田誠齋等參加民軍攻克滿城旋從井岳秀部渡河歷經晉南潼關各戰後入西安講武堂畢業靖國軍時任第四路第二支隊營長與陳樹藩劉鎮華諸軍連戰數年國民軍興同馮毓東率兵數千趨二華斷敵後路毓東全軍覆沒昌獨以所部突圍出繞道終南轉戰月餘全師而還十四年馮部改編爲國民二軍第八師昌任第一旅旅長與第十師及二軍在陝各部合兵趨長安敗吳新田軍統一師豫駐防洛陽國民二軍失利崤函間道歸陝收集餘部抗劉鎮華之兵於富平及三原大程鎮陝局底定復出豫南參加北伐十七年釋兵歸里十九年以疾卒於家年四十二子斌

綠天相

綠天相字吉人臨潼人初營商業然性豪俠常與時賢交結與岳維峻郭堅高峻蔣

世傑諸人皆稱莫逆靖國軍初起時蒲城李天佐部緣章保延治軍需旋任營長以緣常與靖國軍爲敵頗不直之十五年鎮嵩軍圍西安章保復遣人通劉鎮華願以所部攻取富平三原且請益兵鎮華使麻允文率部至蒲城會師西進天相惡章保之引賊爲友也遂先期攻殺之代領其衆歸國民軍任師長牽制麻軍不得及時西進涇原之師得以從容佈防十六年任岳維峻南路軍後防副司令兼第三師師長十七年秋率部由商雒出武關東赴前防至商南爲宋哲元部所刺殺年五十三子振亞西安講武堂畢業從楊虎城任連長死於西安圍城之戰

衛總成

衛總成字定一華陰人貌魁梧性沈毅陝西第二師範學堂畢業民元後入秦軍第二師模範營卒業討袁護國之役從耿直郭堅等驅逐陝督陸建章事定以功任警備軍連長靖國軍興任第一路營長十一年于總司令移節鳳翔委任第一路第二支隊隊長兼岐鳳各軍總指揮護衛于先生脫於險阨十四年任國民二軍第二混成旅旅長十五與楊虎城李雲龍同守西安八閱月十六年任國民革命軍第二集團軍南路軍第三軍軍長隨岳維峻出兵汝南參加北伐移防安徽阜陽以事變遇難年三十七子繼美

劉鵬

劉鵬字雲飛華縣人初入三秦公學肄業年餘棄文就武改入陝西模範營畢業靖國軍興充第四路連長後隨胡部至彰德任中校團附十三年首都革命後以功任國民二軍第十一師第二十二旅旅長十五年駐防信陽兼任前敵總指揮與吳佩孚軍血戰三閏月十六年復任國民革命軍第二集團軍南路第四軍第一師師長十七年移防安徽軍隊縮編改任新一師第三旅旅長十八年開駐湖北宜昌爲人刺殺年三十四子二光裕臨祿

康霖蒼

康霖蒼郃陽人初肄業西北大學政治科民國五年討袁軍興投筆從戎入胡景翼部從胡軍進逼西安驅走陸建章七年充靖國軍第四路獨立連連長與陳樹藩軍作戰數年十三年國民軍革命首都常在前鋒敗吳佩孚軍於廊房景翼督豫後委任督署手槍隊隊長兼第四路運輸總稽查十六年任國民革命軍第二集團軍七十一師第六旅旅長又改任馬寅山軍部游擊隊司令十九年任討逆軍第十七路軍編第六師副師長兼第一旅旅長隨楊指揮虎城還定三秦完成西北統一迨軍事結束釋兵遠游廿一年

病歿於西安年四十一子百讓時方九歲

杜保田

杜保田華陰人北平朝陽大學畢業民七回陝任靖國軍第五路參謀兼本部騎兵團團附十四年任國民三軍第三師第二旅參謀長兼騎兵營營長十五年同楊司令虎城李督辦雲龍堅守西安擔任北關一帶防務指揮與敵對抗八閱月城圍解後隨楊出關參加北伐十八年隨軍駐南陽任總部軍事科科長調署唐河南陽等縣縣長十九年後歷署麟岐山等縣縣長二十二年調署臨潼縣長卒於任內年四十一子希牧

范升初

范升初邵陽人幼讀書通經史以家道中落改習商賈民五陝西護國軍起慨然從戎隨曹世英驅逐陸建章民七任靖國軍第三路營長作戰首東交口兩金等處無役不預十四年任國民二軍第八師獨立團團長兼二華剿匪司令馮毓東與劉鎮華戰二華之役亡於華陰年三十四子敬民

赤亞武

赤亞武臨潼人初受業於曹印侯辛亥革命充敢死軍營長靖國軍興任第四路李

雲龍部營長升團長十四年任國民軍第二師第二混成旅旅長豫西之役嘗兼前敵總指揮破慘玉琨於豫西十七年任國民聯軍第二軍第四師師長駐守涇陽與宋哲元戰兵敗被執死年四十一子三紀崗紀元紀盈

彭世銘

彭世銘字季強世安之弟也初肄業西安陸軍學堂辛亥光復與同學趨軍械庫爭取彈藥攻滿城身被重創失兩指共和成東渡日本入明治大學畢業民國七年歸國常往來北京天津間密爲靖國軍購運軍械能以智計肆應各方未嘗敗露後隨陝軍出關任行營參謀十四年冬國民軍攻下天津任爲保安司令十五年奔走數千里求援兵解西安之圍受任長安縣長十六年任馬克齋師參謀長銳意整飭爲反側者所忌與克齋同遇害於盧氏年卅三世銘性和易遇事剛斷輕財貨重然諾以兄世安殉難華陰蓄志結客復讐獲鎮嵩軍旅長馬瑞旺於天津手刃之卽殺世安者也夫人劉璉一三原人民元以省立女子師範學校高材生考得留學日本公費生先後在東京女子音樂專門學校及保姆專門學校畢業歸國後歷任私立立誠中學及省立女子師範等校教員開辦保姆傳習班並創設幼稚園奠陝西幼稚教育之基嗣後復任崇德女子中學及培華女

職兩校校董民二十年南京召開國民會議時被推陝西代表至京復被推爲主席團之一九一八事變發生後被邀出席國婦會議返陝後被任陝西省政府參議對於地方民眾痛苦政治革新婦女運動均極努力先後領導長安縣及西京市婦女職業促進會等團體奔走策畫勞怨弗辭實開西北婦運史上之新紀元三十五年復被選爲社會賢達代表出席國大製憲會議於十二月四日突患腦充血症歿於中央醫院年五十三子三啓文啓亞啓成女一啓明

馬彥森

馬彥森字克齋大荔人畢業高小學堂參與辛亥革命民國三年入同州軍官教導營卒業後入伍見習護國軍時充本縣民團團長維持地方七年充靖國軍第三路第一支隊騎兵團團長十三年充國民軍第三軍第一六隊補充營營長十四年任補充第二旅第二團團長轉戰南口晉北一帶十五年從國民軍由包頭渡河南下攻克樸陽交口雨金各鎮斷敵軍歸路解西安之圍十六年任國民聯軍駐陝總司令部第二混成旅旅長旋隨國民革命軍第二集團軍第十二路總指揮孫連仲參加北伐取道商雒進駐盧氏肅清嵩山一帶積匪以功升任第二集團軍獨立第七師師長授陸軍中將奉調北開

戒裝待發遽以兵變遇害年四十八子一有道有德

張景剛

張景剛字仰山藍田人受業牛夢周先生之門性剛毅膽略過人居鄉好持公道雖至親厚友莫能干以私辛亥光復充敢死軍第三標總稽查衝鋒陷陣靡役不從時以模範第三標稱之民二充陝西水利軍築修龍洞渠爲第四屯督屯靖國軍興嘗於藍田招集同志辦民團以圖響應旋被陳樹藩覺察使人殺之並毀其家年四十三子一翼良

韋良

楊介

楊介字季石鄆陽人清邑庠生入本省農業專門學校畢業辛亥時充本縣團練使兼保安公所所長民元入國民黨二年被選陝西第一屆議會議員護國之役充討袁軍模範團團長改編陝西陸軍第一團團長駐防澄城靖國軍興充第一路司令部副官權寶雞縣知事民八奉于總司令命赴上海傳通南北軍事消息道經河南闢鄉遇匪被害年三十五無子以姪連生嗣

楊文選

楊文選字萬青扶風農家子也面黑口大能容拳體貌魁梧性情豪爽嘗師事黨人王誠齋得聞三民主義及革命理論靖國軍時選送四川講武堂畢業歸任游擊司令部連長數年靖國軍解散後隨第三路第一支隊司令楊虎城支持殘局於武功扶風間及楊敗退陝北乃入甄士仁部十三年首都革命後與國民三軍驅逐北洋軍吳新田敗吳軍於渭南上漲渡以功升任團長十七年部隊遣散歸里十八年復起任討逆軍第一路第一師師長十九年縮編爲特務師任旅長二十一年爲變兵挾去楊虎城恨其爲甄士仁舊部捕而殺之年三十九子正錫

袁青雲

袁青雲字紫霄長安人清末因井勿幕介入同盟會辛亥光復時奔走聯絡之功居多癸丑丙辰兩役尤爲盡力同志中以其年長皆以兄呼之靖國軍之初起也以常與黨人往來爲陳樹藩所忌屢欲殺之乃潛奔三原佐胡景翼軍數年隨胡出關國民軍時任胡部參謀常往來爲行人河南事敗回陝復佐甄士仁軍十九年士仁奉命討逆敵圍興平奉命潛出呼援至馬趵泉爲敵所獲遇害年五十四子改過

丁增華

丁增華字仲英臨潼人先世業農父建仁始以邑庠生遊學甘隴徧交文學騎行之士增華性聰穎頗不喜讀書愛與鄉里豪傑交游有乘風破浪之氣概聞人談革命輒喜聽之不厭得預辛亥光復之役民元既建入陝西講武堂肄業護法之役充某營班長戰必爭先岳維峻見而異之許爲大器靖國軍興初充第四路李雲龍營排長于總司令右任拔升獨立團第五連連長未幾調升第一支隊第二營營長治軍嚴整有方略尤長於射擊胡景翼嘗稱許之曰仲英異日爲將必智勇全材也景翼率兵出關助直攻奉鄭州之役增華身在前鋒大破趙倜之兵十三年國民軍革命首都廊房一役增華突陣衝鋒不避槍彈經三晝夜卒破吳佩孚軍以功擢升補充團團長豫西之役尤在前列攻克陝州潼關調升國民二軍第十師第十九旅旅長十五年鎮嵩軍圍西安增華與李雲龍楊虎城衛定一諸人閉城堅守八閱月任西安城防司令兼軍警聯合處處長食糧殆盡而秩序井然敵屢使人以重金誘降佯爲應許致敵萬餘之衆於城下而殲之敵勢遂不復振城圍解後任第二集團軍第八路第四旅旅長兼代第一師師長出屯商雒十八年奉調駐鄂西一帶防共改任新編陸軍第三師副師長與敵戰於荊沙間十九年以母老病請假歸任西安綏靖公署少將參議兼陝西禁煙總局會辦抗戰事起任天水行營西安

辦公廳少將參議兼第十戰區動員委員會委員捐資創設中正中學並令舊部及姪輩受訓於戰幹團爲抗敵後備平生交人以誠事父母至孝扶弱濟困見義勇爲民國三十一年三月以疾卒年五十二子三武烈武威武平

樊俊榮

榮俊榮字茂生富平人保定陸軍學校第一期畢業派充陝西新軍見習辛亥九月隨同新軍起義攻破滿城東西路作戰無役不從民國建元保送北洋軍官學校帝制發生後歸陝與胡景翼諸人協力討袁事定充陝西陸軍步兵第二團副官遷一營一連連長靖國軍興任右翼軍第一支隊參謀升參謀長胡部出關後任陝軍第一師第一旅參謀長留守涇原十四年隨軍駐洛陽任國民二軍第二師參謀十五年以事假歸仍任後方留守司令部參謀長與諸軍同守三原城圍解後因勞致疾居家數年卒年四十七俊榮性恬靜寡言不汲汲於權利自軍興以來同學諸子踔厲風發競以擁兵有實權爲榮獨俊榮屏退深默常居帷幄爲軍謀坦然與人無忤在軍中十餘年雖無赫赫之功而始終一節儕輩莫能及也子二錫榮武漢大學土木工程科畢業鐵染留學美國海軍畢業現爲海軍中尉服務太康驅逐艦

丑彥俊

丑彥俊字秀珊富平人性沉靜寡言語幼時以家貧棄讀學吏主計蒲城縣署工房明習案牘爲同輩推重尤喜接納鄉里豪傑井岳秀岳維峻蔣世傑皆與相善因加入革命團體辛亥西安反正河北民團使焦子靜倡辦渭北民團召彥俊襄辦糧秣旋奉命整理富平契稅成績尤佳民五逐陸之役先期奉胡景翼命組織祕密機關傳遞消息變服來往蒲白富耀間調得敵情走告景翼遂於富平發難殲建章軍擒其子承武民六靖國軍起三原從岳維峻與樹藩軍戰於城下初任騎兵連長旋升營長作戰臨渭河北一帶無役不與改任步兵營長團長十一年景翼維峻率部東出以圖中原留彥俊駐乾縣儲糧練卒鞏固後方維峻督豫後擢升旅長兼邠長永警備司令剿除土匪保衛行旅陝甘孔道賴以暢通民十三年春西藏達賴入覲道經乾縣駐宿城內彥俊嚴其警衛豐其廩餉親赴行轅謁見言談融洽達賴大悅贈以名香禮器等物十五年鎮嵩軍圍西安別部渡渭擊三原田玉潔守三原兵力單弱檄調乾縣守軍一團分擔防務五閱月而城圍始解維峻自晉歸後舊部惟彥俊獨完因即其部擴編爲南路軍命彥俊率之爲前驅由商雒出武關轉戰豫南與友軍會以功任國民革命軍第一集團軍南路軍第三師師

長駐防南陽修治道路保商旅輯農村鄧宛之民至今懷之彥俊感知遇恩自效屢以假道許鄭協助北伐爲請顧格於形勢未獲竟其志願南路軍亦旋改編因自請解兵柄南遊滻瀆觀光京邑民十九年歸任陝西綏靖公署參議未幾舊疾作三十年十二月三日卒於西安寓所年五十八子四維勤維儉維恭維敬

王保民

王保民字佐庶白水人初隨陝北鎮守使井岳秀騎兵連長駐防榆林洩升營長民十三年調任國民軍易虎城部騎兵團團長率師驅逐劉鎮華於澄韶明年又同國民二三軍進攻西安追擊吳新田於岐山寶雞間改任國民三軍第三師騎兵團團長十五年與李副師長德陞同守渭北懋在關山高陵三原等處與鎮嵩軍麻振武梅發魁等部作戰八閏月西安解圍後又任國民聯軍第十軍騎兵旅長尋改步兵旅長十六年留守韓韶以疾卒於軍年四十五子建華

何順天

何順天字應人涇陽人高曾以下代有達人父紀先字子開嘗執教涇干書院學品兼長爲士林所敬仰順天幼性穎敏傳其家學久從興平張曉山張鴻山藍田牛夢周諸

先生讀書清釐正誼書院於程朱主敬窮理之說頗有心得又於暇時兼習柔術鍛鍊身體藍天湯仁天李養初趙蠱臣等皆夢周門人中之主張革命者順天得與交遊故年甫十八即加入祕密運動促成辛亥光復之功民元既建就學西安考得留日預科學生逾年將赴東而二次革命失敗三秦黨人星散乃隨衆奔走運動討袁護國之役順天初任郭堅軍中後以郭部多刀客難與伍棄去聞胡景翼練兵商雒招學生入伍即往投之胡命任團部書記不願也後從張義安作戰連年義安沒後嘗任本縣地方保安工作後復入田玉潔部任惠顯峯營運長升營長民十二年隨軍出關十五年山東大汶口之役忠旅被敵包圍諸友軍皆先退無往援者順天獨率三連突圍入援乃得全師還而順天亦負重傷就醫鄭州無效而卒年三十三子守中武昌中華大學畢業

劉 覺 民

劉覺民河南鞏縣人遜清附生居平尚俠義好結交憤清政腐敗外侮日深矢志革命奔走運動不顧家室辛亥民軍起武昌清庭出師討伐沿京漢鐵路南下以鄭州爲補給站覺民時在開封念京漢路以鄭州爲中樞北扼黃河鐵橋苟能襲而據之截斷南北往來要道則清軍之在前方者可不戰而自潰然後鄂秦各省民軍會師中原不待渡河

北伐而清室卽無能爲力矣因與鮑質夫諸同志密祕集合數百人尅期舉事爲河南巡撫張鎮芳所偵悉派兵捕之覺民走免至豫東邊境糾合豪傑謀再起既而清帝退位共和告成乃散其徒人從事政治運動癸丑二次革命失敗後覺民知袁氏必盜國因復加入中華革命黨往來秦豫各地廣事聯絡親赴陝北譴樊醒民樹討袁軍旗是爲護國之役民六又勸樊醒民加入陝靖國軍任第二路參謀民十一年走廣東謁孫總理得改編樊部爲建國豫軍並護衛總理脫陳炯明之難旋復往返平津粵豫傳達總理和平建國主張勞瘁弗辭十三年建國軍隨國民軍革命首都渡河作戰覺民均在軍中二十四年任國民政府監察院監察委員彈劾權要頗著直聲抗戰軍興奉派視察鄂陝兩省政務助程將軍潛聯絡西北軍民合力抗敵覺民氣性豪爽接人一本赤誠故所至人咸信仰之從事革命數十年出生入死不少餒晚值國難任職憂勞乃致篤疾民國二十九年卒壽六十二遺子女各一國府明令褒揚地方人士營公葬焉

李維植

李維植字自立鎮巴人鎮巴在清時爲定遠廳卽漢代班超食邑維植生而穎異讀書慕投筆從戎事決計效之乃背父兄赴省城考入陸軍小學時革命風潮瀰漫全國維

植隨衆倡言不諱旋被除名復入農林學堂宋元凱介入同盟會辛亥起義隨軍作戰鳳翔負傷不退民國建元奉派赴日本學陸軍過滬爲黃克強所留遂入大同學校補習民二宋教仁被刺經植激於義忿計捕刺殺武士英嗣從黃克強入南京宣布獨立旋失敗署北極閣地室中七日脫險後流亡日本入士官學校又以北京來令除名乃復歸國由粵赴潘陽被捕入獄旋釋再至日本加入中華革命黨密祕回陝策動復被捕是爲護國之役嗣後護法靖國諸役皆參加作戰民九至閩民十至粵任大元帥府軍事特派員奔走南北略無寧居民十五至滇隨軍參贊北伐九一八事變潛赴東北集合健兒組織義勇軍參加長城戰役腿部受傷不良於行同志皆以李鐵拐呼之抗日戰起奔走大河南北領導民衆作自衛戰嗣任天水行營高級幕僚中原太行各戰役無不預焉日寇投降後注意戰後經濟親赴沿海各口及東北考察漁業森林煤礦爲嚴寒所侵風疾盡發遂患臌脹在瀋治療數月無效於民國三十六年四月二十八日逝世年已六十維植一生奔走革命屢被緝捕入獄皆不以介意每作豪語曰革命者唯犧牲耳他非所計也一子

志任女志賢

雷 電

雷電字季陽蒲城人性俠烈居鄉遇不平事輒加干涉讀書不求仕進見四川鄒容
排滿書悅之加入同盟會與常銘卿井崧生諸人組織教育分會充書記聯合草野豪俠
待機舉事擬以蒲城爲革命策源地民國紀元前四年（清光緒三十四年）重九夜親
帶暗殺團員潛至巡警局欲殺縣紳張某不遂與縣令李體仁構隙因有二十四日捕拿
教育會長常銘卿及學堂全體學生之事辛亥舉義時渭北各地民軍鑿起季陽鼓動之
力爲多嗣後護法靖國諸役皆奔走各方爲運動旋被陳樹藩繫獄年餘人皆稱爲老革
命云又有蒲城劉養正字芳初寇重慶字孝庭常瀛字仙洲及原振之皆最早同盟會員
與季陽同在教育會鼓吹革命從事社會教育畢生不懈後皆終老於家

賀家棟

賀家棟字伯隆湖南長沙人父耆謙以知州爲伊犁將軍署總文案家棟時爲諸生
隨至伊犁助其父遂嫻文牘摺奏才思敏捷處事精幹舉止瀟灑無官場惡習父沒繼其
業軍署事權集於一身官至伊犁知府革命時多所贊助後任新疆民政司長未就職卒
於家

黃立中

黃立中字執甫安徽祁門人前清末年客遊北京其族某公以言事下獄家人悉南歸餵橐之任立中以身肩之者數年事解某公爲納粟得一官會伊犁將軍長庚訓練新軍購械於上海委某甲運往蓋言事下獄者之子憚於遠行商之於立中立中毅然任之既至卽畀以管庫之任兼充參謀處調查股提調革命軍興立中長財政迨新伊媾和仍任原職擘劃有方度支不匱後解職舉衆議院議員其在新疆時伊犁革命同志有不能歸者悉資助之新疆主席易增新遇刺後其家屬旅居平津者立中待之如昔金樹仁以失職被檢舉又爲營救且延律師爲之剖辯曰國法自國法私交之情誼須盡也其在北平自營之產業坐是棄而不顧其篤於友誼如此民國二十五年歿於上海

郝 可 權

郝可權湖北蘄春人清光緒末年以諸生從軍伊犁懷大志饒遠略居恒沉默寡言每有籌劃精詳周密其靜坐時卽其用心時也伊犁革命前一切計畫多出其手起義之夕率領十數人首先攻入軍署開東門放入民軍復馳往軍餉庫力保護之軍需得以不竭民軍與袁大化之軍相持於精河可權赴前線視察陣地隨行者四五人至山凹爲敵所見約一營之衆風馳而至從者大懼請速奔避可權矗立不動令從者隱身崖罅間持

槍以待敵兵迤邐行山徑間可權視子彈可及發令衆槍並舉子彈纍纍不絕敵猝中彈
不知我軍多寡崩潰而去乃從容歸沉毅勇敢此一端耳新疆都督重其才畀以邊防要
務因忌者昌言反對遂返里民國四年由滬赴滇討袁軍興同井勿幕入蜀隨軍轉戰備
極辛勞至陝任警備軍參謀長未幾病歸歿於家

陳金勝

陳金勝湖北漢陽人伊犁新軍山砲隊隊官革命後充新軍統領改任蒲犁縣知事
曾出使阿富汗始不識字使人讀操典而聽之一過不忘書記草文贊成亦使誦而使正
焉久之遂能自讀書報其爲知事時俄邊軍官見而訝曰君非曾爲高級將領者乎奈何
爲是曰職事高下惟長官命余不能自定也後歸里歿

馬望亭

馬望亭伊犁寧遠人世奉天方教黨人與回族聯絡多出其力民國三年忽有謠傳
謂黨人李某至伊犁主其家將有所爲楊增新密令楊飛霞圖之遂遇害

方孝慈

方孝慈字忠黃湖北孝感人從軍伊犁少年英銳勇於赴義嘗因緊急事非至金頂

寺兒賀家棟莫能解乃借友人馬馳赴之以三小時往返九十里起義時率隊東征屢有戰功卒以臨陣馬行過速猝中伏而歿

盧子山

盧子山湖北人氣概粗豪冶遊縱博若無所顧惜而獨與李嘯風善伊犁革命後有密謀去李者以子山鄂人召而議焉子山推案而起挺槍斥責其事遂已民國五年討袁軍興李介之入游擊司令部充副官卒以不得意而終

上海图书馆藏书



A541 212 0009 1001B

